

VASEGA MATUTUA 2025

ASO SA: 26 IANUARI 2025
(ASO SA O TUPULAGA)

MATAUPU: O LE MALOSI O LE MAMOE UA ALOFAINA
(*The power of the loved sheep*)

SINI: A’oa’o tamaiti ia latou iloa o le Atua, o le malosi o Ia e alofagia tatou ma tagata uma lava.

TUSI FAITAU: 2 Samuelu 12: 1 – 6

FESOASOANI MO FAIAOGA:

O la tatou mataupu o lenei Aso Sa, o lo o fesootai lava i le Autu o lenei vaiaso atoa; “O mamoe ma leoleo mamoe” (sheep and shepherds). O le vaaiga masani, i le va nonofo ai o tagata, ma le Atua na faia i tatou. O faatusa ai le Atua i le leoleo mamoe, ao tatou tagata, o mamoe. O la tatou mataupu la e tusa o la tatou tusi faitau, o le tala i le va o le mauoa e tele ana mamoe, ma le tagata mativa, e tasi lava si ana mamoe, sa fa’aalu lona taimi, lona malosi, ma nai mea iti na ia maua e tausi ai ma le faapelepele si ana tamai mamoe

O le tagata malaga na alu ane i le mauoa, ae nofo le mauoa, ma fasi le mamoe e tasi a le tagata mativa, e tali ai le tagata malaga, auā o ia o le pule, po o le taitai, e faalogo ma usiusitai tagata i lana faatonuga.

Ona auina lea e le Atua Natano lana perofeta, e ta’u le mea ua tupu, e pei o le faataoto sa tatou faitau nei, ia Tavita, o le tupu. Sa matuā ita Tavita i le mauoa, ma fai loa ia Natano. O le iuga o lena tagata lē alofa o le oti, a’o le tamai mamoe, e toe taui atu i mamoe e fa (4). O le 2 Samuelu 11: 1-27. O le tala atoa lena i le mea leaga na fafau e Tavita, ina ia oti ai Uria le sa Heti, ae fai ai Patisepa lona toalua ma ana ava. Ua tei la Tavita i le fai atu o Natano, o oe lava Tavita le tagata mauoa, ua e faia le mea leaga i le tagata mativa O lo o taua i le 2 Samuelu 12: 7 (ff) le iuga o Tavita mai le Atua.

E ui o le tala o faapitoa ia Natano, na ia tau atu ia Tavita le toe pa’u atu o lana agasala i ona luga, ae o aliae mai ai isi a’oa’oga taua mo tatou..

E le itiiti i luma o le Atua le leoleo mamoe, tatou o ana mamoe. E mafai e le Atua ona faatulai mai se tasi, e finau ma tautala mo tatou i le tulaga pule ma le mafai, e pei ona sa faia e Natano e tusa o le tala. O le Atua na te amanaia ana mamoe, ma na te faamasinoina mea le tonu uma ma lē sa’o. e tutupu i ana mamoe o alofagia e Ia, e i ai oe ma a’u, ma tagata uma lava.

Fanau, o le uiga loloto lena o la tatou mataupu. E ui ua oti Uria le sa Heti ona o faufauga a le tupu o Tavita, ae lei gugu le malosi o le Atua. Sa fa'aali lava lona alofa faamaoni, o Ia o le Leoleo Mamoe Sili, i lana mamoe sa alofagia e ia. E tusa o le iuga o Tavita na faia e le Atua. O le Atua o le malosi, mo tatou uma ua alofagia o Ia. Le Alofa Tunoa sa fa'aalia i le Taulaga faaola na faia e Iesu Keriso, ina ia ola tatou uma. Talitonu ma faatuatua nei i lo ta malosi, o alofa mai pea e le aunoa ia tatou uma.

GALUEGA FAATINO: (Tatala le mafaufau)

Faamatala mai i au lava upu, le uiga o le lē alofa o lo o iloa mai le tala, ae o la sa fasi le mamoe e tali lelei, ma fa'aalia ai le alofa ma le fa'aaloalo i le tagata malaga.

PESE: 222 (Aue loto ua leaga, soesa")_

A'OA'OGA:

1. 'Aua le mana'o fua i le mamoe a le isi tagata.
2. E malamalama mea uma i le silafaga a le Atua
3. Tapena lelei le ala e ave ai le feau, pei o Natano.
4. Alofa i ē lē tagolima.

.....

ASO SA: 2 FEPUARI 2025

MATAUPU: TAPENAINA O LE ALA
(Preparing the way)

SINI: A'oa'o tamaiti ia latou iloa ona tapena nisi tagata mo le Alii, e pei ona faia e Ioane.

TUSI FAITAU: Luka 3: 1 – 22

FESOASOANI MO FAIAOGA:

Ona o le telē o la tatou tusi faitau, ua ou manatu ai, o le a le vailiilia le toatele o taua i le f(1), o tofiga lava a le malo o Roma ina ona po, a'e o le a talatala atu i le vaega o mulimuli mai, o le uiga o upu ma fuaitau. Vagana Ana ma Kaiafa, o ositaulaga o ta'ua, ma Ioane le atalii o Sakaria o taua i le f(8). O Ioane lea le tagata autu o la tatou mataupu o lenei Aso Sa, e pei ona iloagofie iā Ioane le

papatiso. O Ioane o le atalii o Sakaria, sa faailoa mai e le agelu a le Atua o le a fanau mai, Luka 1: 11 – 17. Ae sa muai valoia mai foi e le Perofeta o Isaia 40: 3 – 5, e pei o upu sii o i ai i le f 4 – 6 o la tatou tusi faitau, Ioane lea o le teuteu ala mo le Alii. Na fa’aali i ai le Atua i le vao, ma amata ai loa lana galuega, o le papatisoga lea o le salamo, ina ia faamagaloina agasala. O lo o taua i le f 7 – 14, le galuega po o le aoaoga a Ioane, o le tapenaina lea o loto o tagata, ina ia afio mai Iesu, ua latou iloa ma talitonu ia te Ia. O le uiga lena o le papatisoga o le salamo, o loto ia suia mai le olaga tuai, ae suia le olaga fou o finagalo ai le Alii.

O Iesu la le Mesia o folafola atu e Ioane, lea e fa’amauina e le perofeta o Isaia 9: 6(ff) lona afio mai. O le mataupu tele lea o faatalitali i ai Isaraelu, ma lo latou faanaunautaiga na te suia mea uma e pei ona latou manatu i ai, pe a afio mai. O le suiga la o olaga o taumafai atu i ai Ioane lea e faapea ai tagata, o le Mesia lea e faatali i ai ua afio mai, (f 15-22). Peitai e leai o lo o tautino atu lava e Ioane, o ia na ona papatiso atu i le vai ma talai le salamo. Ae o mulimuli mai le e sili ia ia, o le Mesia lena. O Ia na te papatiso atu i le Agaga Paia ma le afi. E ui lava o Iesu le sili, a’e sa papatisoina lava e Ioane, e pei ona Ia papatisoina le nuu. Pau le eseese, o le taimi na papatiso ai Iesu, sa tatala ai ma avanoa ai le lagi, ona afio ifo le Agaga Paia, faatasi ma le siufofoga malele mai – “O lou atalii pele oe ua ou fiafia lava ia te oe.”

O lo o aliae i le tau faiuga o le tusi faitau, le tuuina o Ioane le teuteu ala i le falepuipui, ona o mafuaaga o taua. A o le faailoga lena o le auuuna faamaoni, e le fefe e tautala atu i le mea moni,

Fanau o le aoaoga lena mai le tala mo tatou, ia tatou fa’aa’oa’o ia Ioane le papatiso, i lona faamaoni ma le loto mau i lona valaauina. Ina ia tatou mafai foi ona tapenaina nisi tagata ia liliu i le Alii e ola ma manuia ai. O Iesu Keriso ma le taulaga faaola na ia saunia, e mo tagata uma ina ia liliu e ala i le salamo mai agasala ma ola ai i le faatuatua i le Atua.

Uiga o Upu ma Fuaitau

- | | | |
|--------------------------|---|---|
| i) Tiperio Kaisara (f 1) | - | O le Emeperoa o Roma mai le TA17-37 |
| ii) Ponitio Pilato (f 1) | - | o le Kovana o Roma mo le itumalo o Iutaia |

- iii) Herota (Anetipasa) (f 1) - o lona igoa muamua lena (o le atalii o Herota le sili, le tupu sau ma le leaga i ona taimi). *O* le tupu o Kalilaia)
- iv) Filipino - o le uso o Anetipasa (1/2 brother) e tamā faatasi ae tinā eseese) o le tupu o nuu o taua.
- v) Lusanio (f. 1) - e pei foi o Pilato, Anetipasa ma Filipino. E tutusa lava o latou tulaga i itumalo eseese o tofia i ai i le pule a Roma.

GALUEGA FAATINO:

Faamatala mai i ni au lava upu faigofie, le uiga moni o le tapena po o le teuteu o le ala mo le Alii, o tautala i ai le mataupu o lenei Aso Sa, aumai sau faataitaiga e iloa ai ua e malamalama lelei i la tatou mataupu.

PESE: 177 (Galue ia seia uma ai..”

A’OA’OGA:

1. O le salamo faamaoni le ala i le Alii.
2. Fai oe ma tagata, e tapenaina le ala mo isi i le Alii.
3. Ofo atoa oe i le Atua ma lana galuega e pei o Ioane.

.....

ASO SA: 9 FEPUARI 2025

MATAUPU: FAI, E PEI ONA OU FAIA, AE LE PEI ONA OU FAI ATU (*Do as I do, not as I say*)

SINI: A’oa’o tamaiti ia latou iloa, e taua atu le faatino nai lo le na o le faupu.

FESOASOANI MO FAIAOGA:

E le faatonua le tofa i susuga i faiaoga, ae ou te talitonu tatou te au faatasi i se lagona vaivai o le a taumafai atu. O la tatou mataupu, e foliga faigofie, ae ao lava ina tatou faaeteete i lona faamatalaina, ae maise lava le uiga o la tatou galuega. O le a'oa'o atu lea o le finagalo o Iesu i ifanau. O le uiga o le manatu, ona o lo tatou Alii o Iesu, e taua tutusa ia tatou mea o Ia faatino, ma mea o Ia fetalai mai ai. Ae po o le a lava le itu, o le a tatou tuliloa ma faamamafa, e tusa o la tatou mataupu o lenei taeao. E le aveesea ai le tonu ma le sa'o o le tatou talitonuga i lo tatou Alii, e taua tutusa iā tatou, mea e faatino e Iesu, ma mea o Ia fetalai mai ai.

O la tatou mataupu la o lenei taeao, o lo o faamamafa le faatino, nai lo le faaupu. Auā o le tatou taumafai ia tino mai Keriso i lo tatou ola i aso fai soo, e moni e taua le folafola ma tau atu, ae sili ona taua lo tatou olaina, e ala i le faatino. O la tatou tusi faitau o lenei Aso Sa, e amata i mea e faasino mai e le Alii, e ao ina tatou faatino ma fai. I isi, e pei o le alofa, faamagalo atu ma isi; ma mea foi e le tatau ona tatou faia i isi, e pei o le faamasino atu, ma isi. Aua o mea lelei e te faia i le isi tagata, e toe fai mai foi ia te oe (f37 – 38). Faasolo ane i le faataoto o i ai i le (f39 - 40) o faatau mai ai le aoaoina mai le vaai i le mea o faatino ma aoao mai e le faiaoga. E le o le uiga o le fetalaiga a Iesu o i ai i le (f41 - 42), e le tatau ona tatou ano i le mea sese ua fai. Peitai, o lapataia lo tatou popole tele i sese o isi, ae galo ai o tatou foi faaletonu.

A e iloa ou lava faaletonu, ona mama foi lea o lou faitio fua i isi, fai lau faatinoga muamua mo lou lelei, ae 'aua e te tautala fua i le isi tagata ma ona sese. O le tagata faafiaamiotonu o taua i le (f42), e le o se tagata o taumafai e faatino le lelei, ae le mafai. A o le tagata e fa'aaliali mai uiga lelei faa-le-Atua ina ia tauleleia ma amanaia ai e isi, a o le loto e le o i ai.

O le fetalai o Iesu i laau ma o latou fua, o i ai le (f43 - 45) o faamanatu mai ai e le Alii ia tatou, O a mea o i totonu o lou loto, e fa'aali mai pe iloa mai i lau saunoa ma lau faatinoga. Ona faasolo lea i le faaiuga o la tatou tusi faitau (f46 - 49). O le loto talitonu, faatuatua ma usitai i le Atua, o faatusa i le tagata poto, o faatino ma fau lona fale i le faavae mautu, e le osofiagofie e tafega ma matagi malolosi. Ia mautinoa o fausia o tatou ola i luga o faavae mautu, o le iloa lea ma talitonu ia Iesu.

O le faamamafa la o la tatou mataupu e uiga i le faatino nai lo le faalele – o iloa mai le faavae o o tatou ola ia Keriso, ae aliali mai le faatinoina o le alofa, le faamagalo ma le agalelei i o tatou tuaoi. Ina ia faamalolosi ai foi latou, e faailoa atu na uiga lelei i isi. O le gasologa o le olaga, o faatauaina ai pea le vaai ma

faatino ma faataitai, itu lelei ua iloa. E pei foi ona fetalai Iesu o iai i le Ioane 13: 17, o ave ai lana fa'aamuia i le taua o le fai po o le faatinoina o le iloa ua maua. E masani ona tatou faalogo i le faaupuga faapea - “Fai le mea lea ou te faatonu atu e fai, ae ‘aua e te faia le mea lea e te vaai mai o o’u faia” E i ai le lē fetau po o le fete’enaiga o lea manatu. Auā o le a taua le faatonu mai e fai le mea lea ae na te le o faia. O le uiga moni lava o la tatou mataupu, o le ala e sili ona taofi gofie ma mauaa i loto, o mea o vaai atu i ai o fai ma faatino. O le ata faigofie, o le va nonofo o matua ma fanau. E galo gofie i le tama ma le teine le upu ma le faatonuga e fai atu e le tamā, po o le tinā iā te ia. Ae o le vaai atu o fanau i mea lelei e le aunoa ona fai e matua, o le a nanatua pea ma mulimuli ai. O le toatele foi o le au Kerisiano na ona faalogo lava i le mālīe ma le tonu o mea o fetalai mai ai Iesu, ae latou te lē taofia ma faia. E pei ona fai mai le (f46) – “Se a le mea e taua ai a’u e outou, le Alii e, le Atua e, a’e tou te le faia mea ou te fai atu ai?” Vagana ua vaai tino atu, ua malolo le pipili, pupula le tauaso ma isi vavega mamana e faia e le Alii, ona le galo lea, aua ua vaai tino i le moni ma le tonu o faatinoga a le Alii. O lo tatou olaina la o se olaga e sili ona sa’o ma tonu, o lo tatou faia lava lea o mea e finagalo ai Iesu. Aua o Iesu, o le faiaoga aupito sili lea ona lauiloa i le Tala faasolopito. Sa mulimuli le toatele iā ia i so o se mea sa alu i ai, ona sa ia olaina le mea sa ia laugaina atu, ma sa mafai ona iloa e tagata o le mea moni ma lelei. O Iesu sa i ai, o lo o i ai nei lava, o Ia o se matua alofa ma toafilemu. Fai le mea e pei ona faia e le Alii, pe afai e galo ia oe, le mea sa fetalai mai ai.

Fanau o le feau lea mo tatou mo lenei taeao. Ola le olaga sili e finagalo ai Iesu mo tatou, e sili ona aoga, e a’oa’oina ma ola ai foi nisi o mulimuli mai i lau faatinoga. Pei foi ona fai e Iesu le Taulaga o le Alofa Tunoa, ina ia tatou ola ma saoloto ai mai le agasala.

Uiga o Upu ma Fuaitau:

Luka 6: 38 – O le fuaiupu lea, o lo o fa’aaoga e Iesu le ata o le fuaina o fatu laau aina(saito) i totonu o le ato, ina ia mautinoa ai le tumu lelei.

- i) Ie pulupulu O faasino i le su’iina o le ie pulupulu i fafo (outer garment), e su’i ai le gauga tele i luga o le mea e fusi ai le fusipau, e fai ma taga e utu pe fue ai, se saito tele ma lava lelei. O le faailoga o le foai ma le loto alofa.
- ii) Lolomi & luluina- O le fueina o le taga saito lea, e lulu ma oomi, ia mautinoa le tumu lelei.

GALUEGA FAATINO:

Faamatala mai sou iloa, i le itu e le fetau, pe fete’enai ai le faaupuga lea; “Fai le mea lea ou te fai atu e fai, ae ‘aua e te faia le mea lea ou te faia.”

PESE: 368 “Fai mea tonu, o mea lelei”

A’OA’OGA:

1. Usitai ma fai le mea o fai e Iesu.
2. ‘Aua na o le iloa, ae ia iloa ma ola ai.
3. Fai le mea e te loto e fai mai e le isi ia oe.

.....

ASO SA: 16 FEPUARI 2025

MATAUPU: O E NA PULE (*The Powers that be*)

SINI: Ia malamalama le vasega, o e na pulea le lalolagi i taimi o le fanau mai o Iesu.

TUSI FAITAU : Luka 2: 1 - 7

FESOASOANI MO FAIA’OGA:

Fai mai la tatou mataupu, o e na pule ina ua fanau mai Iesu. O le faaaliga na iloa e Tanielu, o le valoaga lea o lo o faamauina (Tanielu 2: 44). “O ona po o ia tupu e faatuina ai e le Atua o le lagi o le malo e lē faaumatia e faavavau; o lea malo foi, e lē tuuina atu ia i se tasi nuu, na te tuimomoina ma faaumatia ia malo, a o Ia e tumau lava e faavavau.’

A o le taunuuga foi lea o le famanua a le toeaina o Iakopo i lona atalii o Iuta, o lo o faamauina i le Kenese 49: 10. E le avea le to’oto’o ia Iuta, po o le faipule i ona vae seia maliu mai Sailo, e ususitai foi atunuu ia te Ia.

O e na pule e tusa ai ma le fa’aaliga na iloa e Tanielu, e amata mai le taimi o Nepukanesa le tupu o Papelonia, na faatafeaina le malo o Iuta ma faatafunaina le malumalu i Ierusalem. Ona sosoo mai lea o Kuresa le sili le tupu o Peresia, na ia faatoilaloina le tupu o Papelonia o Nepukanesa. Na ia toe faafoiina le tafega a Iuta ma faatonuina e toe fausia le malumalu i Ierusalem.

Ona sosoo mai ai lea o le lona tolu o Malo; o le malo lea o Eleni, o lo latou tupu o Alesana le sili ma faatoilaloina le tupu o Peresia o Tariu i le tausaga e 331, a o lumanai le fanau mai o le Mesia.

O le malo lenei o Eleni na tulaga ese foi lona tulai mai aua na tosina i ai loto o tagata Iutaia ma le lalolagi i ia ona taimi, e oo lava i le gagana Eleni ua fai ma gagana e fesootai ai le lalolagi i ia ona taimi. E oo foi i ana fuafuaga o fale mataaga e fai ai taaloga i ia ona taimi, ua atili ai ona lauiloa le malo o Eleni.

Peitai, na faafuasei ona maliu le tupu o Alesana le sili, a e le'i tofiaina sona suli, na te tauaveina le taitaiga o le Malo. Na vaevaeina ai le malo o Eleni i ona taitai-'au ma i'u ina taapeape ai le malo. Ona tulai mai lea o le malo lona fa, o le malo lenei na tulaga ese lona malosi ma lona matautia; e leai se malo o malo e toatolu na muamua e faatusaina i ai lona malosi ma le maopoopo lelei ana puleaga, ma aumai le nofo filemu i le lalolagi atoa. O ona po la o le malo lona fa, o le malo lea o Roma. Ua ia pulea le lalolagi uma ma ua leai se isi malo na tulai muamua mai, e pei o le malo o Roma.

O le taimi la lea o lo o ta'ua e le tusitala a le Evagelia a Luka 4 : 19; e tala'i i le tausaga e finagalo malie mai ai le Alii.

I le taimi o Kaisara Aokuso, o le uluai Emeperoa o Roma, na ia ave le poloaiga i malo uma o le lalolagi, ina ia tusia o latou igoa uma mo le faamoemoe o le aoina lea o lafoga mo le atina'eina o le malo o Roma, e aofia ai ma Iutaia. O le taimi foi lea na fai ai Kurenio ma Kovana Roma i Suria. Le taimi tonu lea na fanau mai ai Iesu le Mesia na valoia.

Talu ai o Iosefa o le na faufautane o ia ia Maria, o lona tupuaga mai i le aiga o Tavita, e tatau ai ona malaga atu i Peteleema o le aai a Tavita e tusia ai i la'ua ma Maria.

O lo la auai atu ai i Peteleema i le tusiga-igoa, ua o gatasi ma le taimi e fanau mai ai Iesu. Ia taunuu ai foi ma le valoaga a le perofeta o Mika 5: 2; A o oe Peteleema – Efarata, e itiiti oe i afe o Iuta, ae tupu mai ia te oe mo a'u o lē na te fai ma faipule ia Isaraelu, o lona tupu mai, anamuā lea, talu mai ona po o le vavau lava.

O le fanau o le Alo o le i i Peteleema o le aai a Tavita. O Tavita o le leoleo mamoe o ia, na valaau i ai le Atua e fai ma tupu o Isaraelu. Ae le gata i lea, o le uiga o Peteleema, o le fale o falaoa; o Iesu foi o le Alo o le Areto o le Ola, na afio mai le lagi.

Ua fanau mai Iesu i le fale povi, aua ua leai se fale o avanoa i fale e tali ai malo, mo Iosefa ma Maria, ae ua na'o le fale povi. Ua tã'ai foi le tino o Iesu i fasi icie, o le faailoga masani, o le alofa faatina i lana tama ua fanau mai.

I le taimi o le logologoã o le malosi o le malo o Roma, na fanau mai ai Iesu le Alo o le Atua. O le Mesia na valoia mai e auga-perofeta i se auala maualalo ma le faaleiloga. Ua manatu ã na pule, o le latou matautia ma lo latou malosi ua pulea ai le lalolagi i ia ona taimi. Peitai, ua latou leiloa lava ua faatagaina e le Atua lo latou malosi i pulega o le lalolagi. A o le taimi lava lea ua Ia fatuina ai

lona Malo e faavavau. Aua o lona Malo, o le Malo e pulea agaga o tagata o le laolagi.

O le finagalo foi lea o le Atua, na ia fuafuaina, o le taimi lea e tatau ai ona afio mai lona Alo pele e toatasi, o le Malo lava lea o le Atua e faavavau. O le fanau mai o Iesu, o le ogatotonu lea o le Malo o le Atua ua taunuu mai i le lalolagi.

O le Tamā o le faavavau, ua avea ma pepe meamea, o le faailoga o le alofa tunoa o le Atua mo ona tagata i le lalolagi. O le ala o le loto maulalo o Iesu le Alii, o Ia o le Faaola mo i tatou ua pulea e le agasala.

Ia aoao mai ia i tatou, o le ala lea o le manumalo. A o le manatu o Roma, o lona malosi ma le matautia ua pulea ai le lalolagi. Peitai ua faaaogaina lo latou malosi, e fai ma auauna i le faataunuuna o fuafuaga uma ua Ia finagalo ai. O le Malo o le Atua ua oo mai i le lalolagi, e faaaogaina ai ē na pule e ala i le fanau mai o le pepe o le Kerisimasi.

Ia manuia lenei Aso Sa.

Uiga o Upu:

- i) faufautane – faatosina/moomoo i ai
- ii) ‘aui – afifi

GALUEGA FAATINO:

Faatino le tala i le fanau mai o Iesu.

PESE: Pese ma Viiga : 259

A’OA’OGA:

1. O pule uma mai le Atua.
2. E fa’aaoga e le Atua le matautia o le laolagi i ana fuafuaga.
3. O le ala maulalo e finagalo ai le Atua.

.....

ASO SA: 23 FEPUARI 2025

MATAUPU : KONELIO .. O SE TAGATA FAAMAONI E MATA’U I LE ATUA
(Cornelius was a devout man who feared God)

SINI: Ia malamalama le vasega, o le faamaoni ma le ola mata’u o Konelio i le Atua, sa iloa lea i lona lotoalofaiso o se tagata o lona nuu, ma lona saili i le Atua i aso uma.

TUSI FAITAU : Galuega 10 : 1 - 24

FESOASOANI MO FAIA’OGA:

O le tatou mataupu i lenei Aso Sa, ua faailoa mai ai o Konelio o le ulua’i fua o le Talalelei, a o se matati’a fou i le Ekalesia Kerisiano, ina ua taliaina tagata o nuu ese, ma ua folafola atu i ai le talalelei.

O Konelio, o le taitai ‘au o le to’aselau o le Malo o Roma, i totonu o Kaisareia. E m asani ona ulufale i sunako o le ‘au Iutaia ma faalogologo i ai. Na ia taliaina ai le Atua o le lagi ma le lalolagi, ua na o Ia lava na faia mea uma. Ua pau lea o le talitonuga a Iutaia ua ia taliaina, a o isi tu ma aga o tapuaiga ua ia le taliaina. Na suia ai le ola o Konelio ma ia saili ai le Atua i lona loto faamaoni i lana tatalo i aso uma. Peitai ua saili mai o ia e le Atua ma maua ai o ia.

O Konelio o se tagata faatuatuaina ma le loto tele ma lona faamaoni. O le ala foi lea ua tofia ai e le Malo o Roma e fai ma taitai ‘au. O Konelio o se tagata mata’u i le Atua. Ua avea lona ulufale so’o i le malumalu o tagata Iutaia ma faalogologo pea i tala e uiga i lo latou Atua. O ia o se tagata ua saili faamaoni i le Atua. A o lana sailiga i le Atua, ua maua ai o ia e le Atua. o le tagata lima mafola i mea ua ia maua ma foa’i atu i so’o se mea ua ia maua, i tagata uma ua manaomia se fesoasoani. O ia foi o le tagata tatalo, e ui ina leai sona malamalama tele i le Atua, oloo ia tatalo i ai i aso uma, a o si ona tama’i malamalama ua maua, ua fai ai o ia ma tagata ua ola i le mafutaga vavalalata ma le Atua.

O agavaa ia o Konelio, o lona faamaoni ma le mata’u, ua oo ai i luma o le Atua. Na faailoa mai i le faaaliga a o tatalo o ia i le Atua. Ia auina atu ana auauna ia Peteru le aposetolo, oloo mau o ia i Iopa, i le fale o Simona le fai pa’u o manu, e na te faamatala atu le talalelei o le alofa tunoa o le Atua. A latalata ona taunuu ave feau ia Peteru i Iopa i le fale o aumau ai o ia. Na ia vaai ai foi le faaaliga mai le Atua. O le mea pei se ie lautele ua tuutuu ifo mai le lagi, ua tumu i manu vaefa uma e tata’a ma mea fetolofi, ma manu feai, ma mea fetolofi ma manu felele. Ua faalogo foi i le siufofoga ma tulei mai, “Peteru e, ina tulai ia i luga e fasi ma ‘ai. A ua tali atu Peteru, “Le Alii e, ‘aua lava aua ou te le’i ‘ai lava se

mea e sa, po o se mea leaga. ua fo’i faalua mai le siufofoga ia te ia. O mea ua faamamaina e le Atua, ‘aue e te ta’ua e sa. Ua fai faatolu mai lenei mea, ona toe ava’e lea o le mea i le lagi.

Ua le mautonu le loto ma le mafaufau o Peteru i le uiga o lenei faaaliga. A ua saunia o ia e le Atua i le taunuu mai o le ave feau mai ia Konelio. A o le aoaoina lea o Peteru, o le Atua mo tagata uma, ae le o faapito mo na’o se vaega o tagata. Ua taunuu ifo ia Peteru e na auina atu ia Peteru ona afio ifo lea o le Agaga paia ma fetalai mai, “Faauta oloo saili ia te oe tagata na auina mai e Konelio. Ia tula’i ma o mai i latou aua o a’u na ou auina i latou. Ua malamalama Peteru i le uiga o le faaaliga, ua iloa ai o le talalelei o le alofa tunoa o le Atua mo tagata uma, e le faailogaina se tagata. Ua taunuu atu Peteru ma lana au malaga ia Konelio ma ua ulufale ma feiloai e aunoa ma se taofiofi e pei ona masani ai. Ua feofofoa’i ma feasogi, ua leai se faailoga tagata. Ua faasoa atu ma faasoa mai e uiga i faaaliga ua la iloa. Ona mautinoa loa e Peteru, o le finagalo moni lava o le Atua, i le afio mai o Keriso i le lalolagi, e momoli mai le talalelei o lona alofa tunoa mo tagata uma o le lalolagi ina ua faasatauroina Iesu ma ua toetu manumalo mai le oti ma le tuugamau, ia faamagaloina agasala ma faaolaina tagata uma.

A o folafola atu e Peteru le talalelei ia Iesu Keriso, ua faate’ia i latou o le ‘au Iutaia na o atu ma ia, ua afio le Agaga i luga o Konelio ma ona tagata na faalogologo ma ua latou gagana mai i gagana eseese, e pei o le uluai taimi o le Penetekoso, ona latou tau faiofo ai lea ua latou faapea ifo i o latou loto, E moni lava, e lë faailogaina tagata e le Atua, ae peitai o lë mata’u ia te Ia ma le amiotonu. O nuu uma lava ua talia i latou e Ia; ona papatisoina ai lea o Konelio ma lona aiga atoa ma tagata uma sa faalogologo ai ia Peteru.

O le matāti’a fou lenei ua ausia e le talalelei ina ua mua’i folafolaina atu i nuu ese. O le faitoto’a o le ulua’i Ekalesia, ua tatalo mo nuu ese ma so’o se tagata e talia Iesu o le Alo o le Atua, ua afio mai e faaola i ona tagata i le lalolagi.

O le tatou mataupu lena i lenei Aso Sa.

Uiga o upu ma fasi fuaiupu.

- i) matelaina - fia ’ai, mole le manava
- ii) noatia - tulimanu

GALUEGA FAATINO:

Faamatala mai ni au lava upu le uiga o le faaaliga na iloa e Peteru i laina se lima (5).

O le a se a’oa’oga na maua mai e Peteru i lenei fa’aaliga?

PESE: Pese ma Viiga : 180

A’OA’OGA:

1. E silasila mai le Atua i mea uma tatou te faia.
2. E lē faailoga tagata le Atua.
3. O le Talalelei e mo tagata uma.

.....

ASO SA: 02 MATI 2025

MATAUPU : IESU, LE ALA UPU MONI MA LE OLA (*Jesus, the Way, the Truth and the Life*)

SINI: Ia malamalama le vasega, o ala o Iesu e sasa’o ia, o upu foi e saunoa i ai, e moni atoatoa lava, auā e ola manuia ai le tagata e faatuatua ia te Ia.

TUSI FAITAU: Ioane 18: 28 – 40

FESOASOANI MO FAIA’OGA

O Iesu le ala, le upu moni ma le ola. O le apoapoaiga lava lenei a le Atua ia Mose a o sauna le nuu o le Atua e ulufale i le nuu folafolaina (Teuteronome 5 : 32 – 33). Ia outou savavali i le ala uma lava na poloa’i ai le Alii lo outou Atua ia te outou, ina ia outou ola ai ma ia manuia ai outou, ma ia outou nofo tulu’i ai i le nuu o le a fai mo outou.

E sa’o loa ma maua’a le ala e te savali ma ola ai, ua na’o mea moni lava ma le sa’o e te faia ma e tautala ai i aso uma; ona e ola lea i se ola faamalieina aua ua suamalie i lou loto le upu moni. Ua faamasinoina e Pilato o Iesu, e pei ona molia mai ai e ta’ita’i o le lotu Iutaia. A o le taunuuga lea o le faatinoga o le ala, le upu moni ma le ola. O le manatu o le ‘au Iutaia ma Pilato ua latou faamasinoina Iesu. Peitai, ua latou le iloa lava o loo faamasinoina i latou. Auā foi ua na’o tuua’iga pepelo ma le le moni ua latou momoli mai ai Iesu. A o Pilato foi, ua na

iloa le lē moni o tu'ua'iga ua latou aumaia ai Iesu i ona luma. Ua ia faia le faaiuga sese ma le lē sa'o ma faasatauroina ai Iesu ona o le faatinoga o le ola, le ala, le upu moni ma le ola.

E lamatia le ola o le tagata e ola i le upu moni. O le ola faia o le mea piopio, le tala pepelo ma fiafia e tu'ua'ina isi tagata i mea le moni, ua masani ai tagata o le lalolagi. A o le faamata'u ma le ola lamatia, e feagai ma i latou e savavali i le upu moni.

O le faamasinoga o Iesu ua tatou iloa ai, le tulaga maualuga o Ia o le Tupu, a o le Atua soifua fo'i. E na te le'i finauina foi nei tu'uaiga pepelo ua aumai i luma o le faamasinoga. Aua ua silafia e Iesu, o le motu o tagata ma ta'ita'i o le lotu Iutaia ma Pilato o le kovana, ua na'o o tagata o le efuefu lava i latou. Ua uma ona faamagalo atu i ai. Aua o le finagalo lava lea o le Atua lona Tama, e ala i lona soifua e foaiina mai ina ia ola tagata uma ma ola atili ai lava. O le uiga lea o le alofa tunoa o le Atua ma lana amiotonu. E faamaualaloina lana upu moni ina ia ola ai i latou o savavali i le agasala ma le amioletonu.

O Iesu le ala, le upu moni ma le ola, o i latou uma ua latou ausia, e tatala mai i ai le Malo o le Atua.

O le Malo o le Atua, o le malo o agaga o tagata ua i ai i o latou loto, le ala, le upu moni ma le ola. O Iesu lava lea, o le Atua ua afio mai, e na te faaumatia le fili mata'utia o tagata, o le agasala ua pulea o latou loto ma agaga. O le ala lea o le ofo o Pilato ina ua fetalai Iesu, o lona Malo e lē mai le lalolagi. O le mea lea na afio mai ai i le lalolagi, e molimau i le upu moni. o i latou uma lava o i le upu moni e faalogo mai i latou lo'u leo.

O le upu moni foi, e tatau ona toe foi e alu i lona Tama ua auina mai o Ia, e ala i le satauro ua alalaga ai Iutaia ma le motu o tagata inā faasatauro ia ia te Ia. A o le ala foi lea e maua e tagata uma, ua ia i latou le ala, le upu moni ma le ola. O le ola lava lea ua ola i totonu ia Iesu Keriso.

Uiga o Upu:

- i) paseka – o le tausamiga e faamanatu ai e Isaraelu le faasaolotoina e le Atua o Isaraelu mai le nofo pologa i Aikupito.

GALUEGA FAATINO:

Faamatala mai ni au lava upu lou iloa i le uiga ia Iesu; o le ala, le upu moni ma le ola. O a foi ni amio a se tagata ua ia te ia mea e tolu (3), ala, upu moni ma le ola. ('afa itulau le umi)

PESE: Pese ma Viiga : 147

A’OA’OGA:

1. Ia ‘aua le ola tala pepelo.
2. Ia ola Keriso i lou loto.
3. Ia maua’a le ala, le upu moni ma le ola ia i tatou uma.

.....

ASO SA: 9 MATI 2025

**MATAUPU: FA’AILOAINA O LE MALO FEFULISA’I.
(Introducing the upside-down Kingdom).**

SINI: Ia malamalama le vasega, o le malo o le Atua e mo i latou ua ola i le amiotonu a le Atua . Tusa lava po o a faigata latou te fetaiiai e naunau lava ia e fia mafuta ma Iesu.

TUSI FAITAU: Mataio 5:1 -12

.FESOASOANI MO FAIAOGA:

O so o se malo lava i le lalolagi, e moomia ai tagata popoto ma atamamai. E moomia tagata malolosi ma tagata e lelei le tamāoaiga i tupe ma oloa, e fua i ai le lelei ona atina’e, i le tulaga o le soifuaga o tagata uma, e vaega tau tupe ma oloa. O le tele foi o malo o le lalolagi, o lo o fa’amoemoe i le malosi o le itu tau fitafita, aemaise lava i atunuu tetele fa’apei o Amerika, Saina, Korea ma isi. Ae o le va’aiga taatele lava i totonu o ia faigamalo, o lo o si’omia e tagata malolosi ma tagata mauoa, fa’atasi ai ma tagata o lo o soifua ma ola taumafai, ola matitiva ma ola finau.

O le mataupu o lenei aso Sa, o lo o fa’ataatai i le lauga a Iesu i luga o le mauga. O nisi ua latou fa’aigoaina lea lauga, o le “Lauga fa’aamuia a Iesu”. O lea lauga, e lē gata mo le au so’o o Iesu, ina ia saunia ma tāpena ai mo le galuega fa’a-So’o, ae fa’apea foi mo le motu o tagata o lo o fa’alogologo i ai. O le aotelega o lea lauga a Iesu, o lo o tuu ai le fa’aamuia po o le fa’amanuia i le tagata maualalo po o le tagata mafatia ma vaivai. O le tagata ua mativa i le agaga, o le tagata ua fia mauoa pe ua fia tamāoaiga lona agaga i le Tala Lelei ia Iesu Keriso. O ona lagona, o lo o naunau ina ia iloa atili Iesu ma le Talalelei.

O le tagata ua fa’anoanoa, ua leai se fiafia, ae fa’amoemoe e fa’amafanafanaina e le Agaga o le Alii. O tagata agamalu, o tagata e fia aai ma fia inu i le amiotonu, o tagata e alolofa atu, o tagata loto mamā, o tagata e faatupuina le filemu, o

tagata e sauāina ona o le naunau i le amiotonu, ma tagata e tu'aa'ina pepelo, ona o le Tala Lelei ia Iesu Keriso. O i latou ia e mafai ona fa'amatalaina, o tagata ua āfāina lo latou soifua i faigata o le ola, poo tagata ua mo'omia le fesoasoani ma ua fia fa'asa'olotoina mai puapuaga ma faigata o le ola o loo feagai ma i latou. O i latou ia o tagata ua leai se fa'amoemoe, ma ua na o le Atua le mapusaga o i latou.

O loo faavae le finagalo o Iesu i lana lauga, i le tulaga o loo soifua ma ola ai le lalolagi o tagata, e ala lea i le va o le isi i le tasi. Lea lava foi o lo o atagia i totonu lava o le siosiomaga o tagata Iutaia. E taulia le tagata mauoa, ae lē amanaia le tagata mativa. E leai se faamoemoe o le tagata fa'anoanoa, aemaise lava i le mafutaga motusia o le va o le tane ma le fafine, pe a oo ina maliu le tane ae tuua na o le fafine. E faapena foi i le olaga o aso uma i le li'o lava o tagata Iutaia, e lē tupu ai se filemu, leai se amiotonu, ma ua a'afia ai ma le alolofa o tagata, ona ua fa'amamafa le tulafono, e sa'oloto ai le au fai tulafono ma tagata e maualuluga o latou tulaga i le fa'apotopotoga o tagata, ae pologa ma fa'asinomia ai le tagata vaivai poo tagata matitiva. Ma o le lē paleni lea o lo o atagia i le siosiomaga o tagata, o lo o soifua ma ola i totonu o faigamalo o le lalolagi.

Mo le au so'o o Iesu o le a o e fa'atino le galuega fa'a-so'o, e ao ona manino ma malamalama lelei i foliga ma uiga o tagata, auā o i latou tonu ia, poo tagata tonu ia e tataui ai le fa'aamuiia poo le fa'amanuia a Iesu e tusa o lana lauga. Ae mo le motu o tagata o loo fa'alogologo, ae o loo i ai i totonu o ituaiga o tagata o lo o tā'ua e Iesu, e tataui ona fiafia ma le loto fa'afetai, auā o le a avea i latou ma tagata o le Malo o le Atua.

O le feau ogatotonu o le tusi a Mataio, e pei ona i ai le tusi faitau o le mataupu o lenei Aso Sa, "o le Malo o le Atua, e fai mo le tagata Kerisiano ua talitonu, galue, onosa'i, ma alofa moni i le Atua e ala i lana amio ma lona ola i aso uma". O lona uiga, o le Malo o le Atua, e lē mo'omia ai ni tagata mauoloa e lē alolofa, o ni tagata e malolosi tino malolosi atu ai ma loto, po o ni tagata e atamamai i le olaga ma mea a le lalolagi, po o ni tagata e faatupu vevesi, ia po o ni tagata ua iloa le Atua ma le Tala Lelei, ae lē o ola ai e ala i le amio.

O le eseese ia o malo fa'a-le-lalolagi ma le ma le Malo o le Atua ua fa'a'iloina mai. O le malo fa'a-le-lalolagi, e moomia ai tagata popoto ma atamamai po o tagata e i ai fa'a'iloga maualuluga i le poto salalau. E moomia ai tagata taualoa i o latou tulaga fa'ata'ita'i, e mafai ona puleaina se malo. E tataui ona i ai tagata malolosi, e galulue mo le atina'eina o le tamaoaiga o le malo. Aemaise, ina ia fa'atupula'ia le aofa'iga o le faitau aofa'i o tagata, e fuafua i ai le tamaoaiga i lona lelei ma lona fa'alētonu.

Peita'i, i le finagalo o Iesu ma le mataupu o lenei Aso Sa, ua fa'ailoa ai e Iesu le Malo o le Atua, o le Malo e fa'afeagai ma le malo fa'a-le-lalolagi, i le tulaga o tagata moomia. O le Malo o le Atua, e fai mo tagata latou te talia Iesu i o latou olaga, ma ola i le olaga faa-Iesu. E lē fai mo le tagata o loo teena Iesu, o Ia o le Alo o le Atua, faapei o le to'atele o tagata mauualuluga o le nuu o Iutaia. O le Malo o tagata o lo o pito i lalo o tagata o lo o i le malo fa'a-le-lalolagi, pe a fa'atusatusa tagata o le sosaiete.

O le feau mo i tatou uma i lenei aso Sa, e tatau ona toe silasila lelei poo le fea le malo o loo tatou i ai. O le fa'amaualuga, o le lē alofa, o le faatupu vevesi, o le faia o le leaga, o le ola lena i le malo o le lalolagi. E lē o foliga na o tagata mo le malo o le Atua. Ia manatua, o le tagata ua ola i amio faa-Iesu, e pei o le agamalu, alofa, naunau i le Atua, ma isi uma uiga e atagia ai le loto mauualalo, o le tagata lena o lo o fa'aamuia ai Iesu, auā ua mautinoa e fai mo ia le Malo o le Atua.

GALUEGA FAATINO: FA'ATINOGA

O le tala o lenei aso Sa, o le fa'ailoina o le Malo o le Atua. Ia tuu le avanoa i le vasega, latou te lisiina mai ai itua'iga tagata e agava'a i le Malo ua fa'ailoaina. Ae o le a foi so latou talitonuga e mafua ai ona agava'a lea tagata i le Malo o le Atua ua fa'ailoaina.

Fa'ata'ita'iga: O tagata e matitiva i le Agaga.

PESE: Le malo e lelei (79 Pese ma Viiga)

A'OA'OGA:

1. Ia avea i tatou ma tagata o le malo o le Atua.
2. Ia fiafia i le Atua, ona Ia famanuia mai ai lea.
3. E lē o luga, a'o lalo lava e maua ai le manumalo.

.....

ASO SA: 16 MATI 2025

MATAUPU: OLIOLI I LE AVEA MA SOO.
(Joy in Discipleship).

SINI: Ia malamalama le vasega i le tāua o le ola e fai ma so'o o loo tatou Alii o Iesu, e tupu ai le fiafia ma le oioli i o latou loto.

TUSI FAITAU: Ioane 15: 8 – 11

FESOASOANI MO FAIAOGA:

O le avea ma soo, o le avea lava lea ma auuuna mo Iesu ma lona finagalo. O le upu soo (disciple) i lona uiga i le Gagana Eleni (Greek language), o le tagata ua a'oa'oina lelei, ma ua ofoina lona ola, e fa'auuau ai se galuega a lē na ia a'oa'oina mai ai. O se ola ua ofoina e manatua ai lē na tapenaina lona iloa ma lona talitonuga, ua ia tumau ai ma ua fiafia e mulimuli ma ola ai. O lona uiga pe a toe fa'amatalaina, o le tagata ua mausalī lona talitonuga i lē na a'oa'oina o ia, ma ua fa'amoemoe foi i ai lona ola, i mea uma lava e na te faia, ma ana galuega uma e faia.

Sa faia soo o Ioane le papatiso, e pei ona faamauina i le Mareko 2:18. O i latou ia sa nonofo faatasi ma Ioane, fa'ata'ita'i i le olaga (lifestyle) a Ioane, ma mulimuli i a'oa'oga a Ioane, faapei o le ola fa'apaiaina e ala i le papatisoga i le vai, e atagia ai le tagata ua salamō i le leaga, ma ua fa'afouina le ola i le itu faale-agaga.

Peita'i o le mataupu o lenei Aso Sa, o loo fa'atatau i le soo ua fa'alogo ma ofoina le ola e avea ma so'o fa'amaoni o Iesu. Ua fa'atatauina i le la o le vine e fua mai, ma le la e lē fua mai. O le ata o le soo o lo o olioli ma fiafia i le avea ma so'o, e na te fua mai i fua lelei, e ala lea i lona ola o lo o soso'o lelei ma le pogai o lona valaauina ma lona ola, o Iesu lea. E fa'apea foi i le soo ua na o le fa'alupe o le so'o, ae lē o atagia i ana fa'atinoga le olaga faa-soo. O le taimi ua pipi'i i le Alii, o le taimi ua leai. O lona i'uga, o le aveesea mai le vine, ma o le ata lea o le tagata ua tu'ueseina e le Alii mai lona alofa.

O fuaiupu ua fai ma tusi faitau o lenei aso Sa, e mafai ona fa'amatalaina, o le fa'amanuiaga o le tagata o loo tumau lona ola i le Alii, e pei ona fa'atusaina i le lālā, o lo o pipi'i ma mau i le vine, ma le tau i le tagata e lē o tumau lona ola i le Alii. E pei ona fa'atusaina i le lālā o le vine o lo o pipi'i i le vine, ma le lālā ua aveesea pe ua lē pipi'i i le vine. Ua fa'ailoa manino e Iesu i ona so'o e ala i ana upu taumavae, e tatau lava ona tumau le ola talitonu ia te Ia, ma ia fa'amaoni i ai, ona tumau lea o lona alofa ia te i latou, fa'apei ona tumau o le alofa o le Atua le Tamā ia te Ia. Ma o le olioli sili lea i le Alii o Iesu pe a mavae atu o Ia, o le so'o o loo moni ma fa'amaoni lona tumau ia te Ia.

O le upu "olioli" o lo o i le fuaiupu e 11 o le tusi faitau o lenei aso Sa, o loo fa'aliliuina mai le upu "joy" i le gagana faa-Peretania. Peita'i o le gagana Eleni (Greek language), o loo i ai le upu χάρά (chara), o lona uiga pe a fa'amatalaina, o le olioli poo le fiafia e tupu pea ona o le alofa tunoa o le Atua. O se fiafia e lē na o le sau ma mou ese atu. O lo o fa'atatauina lea fiafia i le Alii o Iesu, pe afai

ae tausi e le tagata ana poloa'iga ma ana tulafono, ma ola i a'oa'oga uma e pei ona Ia fa'aioa mai i le lalolagi.

Ma o le lagona foi lea e tatau ona maua e le au so'o, pe afai e fa'amaoni lo latou avefa ma so'o. E ui i le faigata o le galuega faa-so'o, ona e feagai ma le sauaina, o le inosiaina, ma le tele o fita eseese, peita'i, o le tagata ua moni le ofoina o le ola e avefa ma so'o moni o Iesu, e le fa'avaivai ai, ae finau pea ina ia fa'atino le feau e tusa ma lona valaauina.

O le mafuaaga lea o le fa'amalosi atu o Iesu i ona so'o, ona o le a tu'ua ia i latou le fa'aaauina o le galuega tala'i, e tusa o le vaega o le tusi faitau o le mataupu o lenei Aso Sa. O le fesili lava mo i tatou uma i lenei aso, "o ai la se tasi e mafai ona ofoina lona ola e avefa ma so'o?" Tatou te le'i va'ava'ai ma fa'alogo ia Iesu, a'o Ia a'oa'o mai, fa'apei o ona so'o. Ua na o le fa'atuatua e ala i lo tatou fa'alologo ma talitonu. E mai le fia afe o tausaga talu ona mavae atu Iesu ina ua maliu ma afio i le lagi, e le muta lava le i ai o ona so'o i le lalolagi mo lana galuega tala'i, i ana auuauna faifeau, o a'oa'o, ma so o se tasi lava ua faia se galuega e atagia ai uiga faa-Iesu.

Le fanau ma i tatou uma, o lo o manino lava le finagalo o Iesu. O so o se tasi lava e tumau lona ola i le Atua, ma fua tele mai uiga ma amioga e atagia ai lona alofa i le Atua, e ta'ua o ia o ona so'o. Ua tele nisi o tupulaga i lenei vaitau, ua le ava i matua ma nisi o tagata matutua. O nisi fo'i o tupulaga ua fa'atupu pea le vevesi i taulaga ma nisi o nofoaga. E le ni uiga ia e atagia ai se tupulaga e fia avefa ma so'o o Iesu. O lo o manino le fetalaiga a Iesu i le tusi lava lenei a Ioane mataupu e 13, fuaiupu e 35, "O le mea lea e iloa ai e tagata uma lava o o'u so'o outou, pe afai ua outou fealofani". Ia olioli oe le tama ma le teine i le Alii, ina ua ofoina lou ola e avefa ma so'o fa'amaoni o lo tatou Alii o Iesu.

GALUEGA FAATINO: AVANOA FAIGALUEGA

O so o se galuega lava e fa'asalalauina se avanoa faigaluega, e tatau lava ona i ai vaega moomia (selection criteria) mo agava'a e tatau ona fa'amalieina, e fua i ai le filifilia o se tasi mo le avanoa.

Tusi mai se fa'asalalauina o le avanoa faigaluega "so'o o Iesu". E pule oe i vaega moomia, o le matua o le soifua, o se alii po o se tama'ita'i, e i ai pe leai ni mana'oga fa'apitoa ma isi. A mae'a, ona ta'ito'atasi lea ma faitauina le fa'asalalauina a le tagata i luma o le vasega.

PESE:

Tumau i le Alii.

Tumau i le Alii aua e te popole

Na te le tuua oe e faatasi ma i pea

E ia te oe le manumalo moni
Pe a e valau atu mo ia

Tali: Tumau, tumau, tumau i le Alii
Lototele o lo o ia ta'ita'iina oe
Tumau, tumau, tumau i le Alii
Viia ia mo lou manumalo

Ia e ofuina ofutau na ia tuua mai
Fa'atuatua na te le tuua oe
O ia le sulu i ou ala uma
Le lafitaga mai fili fita

Tumau i le Alii aua e te popole
Na te fa'ato'ilalo i ou fili
Ia lototele ua ia te oe le manumalo
Na te puipui i ou ala uma

A'OA'OGA:

1. Ia ofoina le ola e auauna ai mo Iesu ma lana Talalelei.
2. Ia fa'ailoa lo tatou olioli i le Alii, i le amio o aso uma.
3. Ia tumau le ola talitonu i le Atua, ae lē o le femoumoua'i.

.....

ASO SA: 23 MATI 2025

MATAUPU: O SE MAFUTAGA E ALOFA-INOINO. (*A love-hate relationship*)

SINI: Ia malamalama le vasega, o le mafutaga o le a i ai se au so'o ma e o le a agai i ai le talaiga o le Tala Lelei, o le a I ai le taimi o le a alofa mai ai, e i ai le taimi e inoino mai ai. Ia latou iloa lelei ua alolofa pe inoino muamua lava i le Alii, e tapena ai i galuega.

TUSI FAITAU: Ioane 15:18 – 25

FESOASOANI MO FAIAOGA:

O le upu mafutaga (relationship), e fa'atatau i se so'otaga i le va o tagata. Mafutaga i le va o matua ma fanau, o le va o le tane ma lana avā, o le va o le tuagane ma le tuafafine, o le va o le uso, ma soo se mafutaga lava. E mafai foi ona fa'atatauina i le va o le Atua ma le tagata. O le alofa-inoino (love-hate), o le tu'ufa'atasiga o ni lagona se lua. Fa'apei o le talitonu ma le lē talitonu, poo le lelei ma le leaga, ma le alofa ma le inoino.

O le mataupu o lenei aso Sa, o loo fa'atatau i le mafutaga a Iesu ma ona so'o. O lo o fa'amalosi atu ai Iesu i ona so'o, auā le feagai ai ma le galuega faa-so'o. O toe taimi o le Alii o Iesu ma ona so'o i le mafutaga o le fefa'asaga'iga, e ala i le militino fa'atasi, aemaise o le tilotilo atu ma le va'ava'ai mai, a'o aga atu i le satauro.

I le finagalo o le Alii o Iesu, e ao ona tapena lelei le lotoifale o lona au so'o, ina ia saunia i fa'afitauli o lo o ta'oto i totonu o le galuega faa-so'o, pe a o'o ina fa'atino la latou galuega. O lo o silafia lelei e Iesu, le teena o Ia e le lalolagi, ona o le lē talitonu, o Ia na auina mai e le Atua i le lalolagi. Ma o le a'afiaga lea o le a feagai ma le au so'o, ona o Ia ma loto o tagata. O le upu moni, o le a inosia le au so'o ona o Ia. O le inoino poo le ita o tagata i le au so'o pe a feagai ma le galuega, o le inoino lava lea ia Iesu. Peita'i, o le alolofa o tagata i le au so'o, ina ua manatu i so'otaga faa-le-tagata, i le va o le isi i le tasi. Aemaise lava, ina ua fa'amuamua e le so'o o ia lava, ae nanā lē e ana le feau. O le uiga o lea manatu, o i latou ua avea ma so'o, o tagata o le lalolagi. Sa galulue i feau masani a le lalolagi faatasi ma tagata. Peita'i ina ua filifilia e Iesu e avea ma ona so'o, ua lē o toe tagata ai o le lalolagi i latou, a'o tagata o le malamalama o le Tala Lelei ua ola i la le Agaga. E foliga mai ai, o le alofa mai o le lalolagi i le au soo ina ua faa-le-tagata le galuega, ae lē mafua ona o lē e ana le galuega, o Iesu lea. Ma o le uiga lea o le alofa-inoino o lo o atagia i le tala o lenei aso Sa. A alolofa ane le lalolagi i le au so'o ma la latou galuega, o le alolofa lava lea ia Iesu ma lana feau. Ae a inosia le au so'o e le lalolagi, o le inosia lava lea o Iesu ma lana feau. Mo le au so'o lava ia mo le galuega tala'i, e ao ona fa'amuamua ma fa'asili Iesu e ana le feau, nai lo latou o le au ave feau. Ia galulue ma fa'amalolosi e momoli le feau i tagata uma, tusa lava pe inoino mai. Ia fa'asili i so o se tasi ua avea ma so'o ona savavali fa'atasi ma Iesu mo lana feau. O le tagata moni lenā ua soifua ma ola i le faa-le-Agaga, e alofagia toe itagia, ae lē fa'avaivai ai lava. O le uiga moni lena o le mafutaga e alofa-inoino. O le alofa-inoino mai o le lalolagi ia i tatou ua mafanafana la tatou mafutaga ma Iesu, ma ua mausalī le fa'avae o le tatou so'otaga ma Ia, e ala i le fa'atuatua ma le fa'amaoni, o Iesu lava na auina mai e le Atua e fa'aola le lalolagi uma lava e ala i le fa'aolataga.

E lē tatau i le lalolagi ona inoino i lo tatou Alii o Iesu. Peita’i, e mafua ona tupu le inoino, ona o le lē talitonu ma le leai o se fia ola i le faa-le-Agaga, ona ua suamalie le ola i le lalolagi ma ana faiga, o le ola lava lea i le agasala. Mo i tatou le fanau ma tupulaga uma, amuia se tasi e fa’amaumau lona ola ma lona malosi, e finauina ai le lalolagi ina ia alolofa ia Iesu, ae lē o le inoino. Amuia foi se tama ma se teine ua fuafua lona malosi, e auauna ai mo Iesu i so o se feau e finagalo i ai.

GALUEGA FAATINO: TUSI FA’ATOESE

Tusi mai sau tusi fa’ato’ese, e fa’ailoa ai ou lagona ua salamō, ona o lou ita ia Iesu, ua mafua ai ona e teena lona au so’o ma le feau na oo mai ia te oe. O lau tusi e ave ia Iesu. Pule oe i le telē o lau tusi.

PESE: Fiafia outou auauna a Iesu (355 Pese ma Viiga)

A’OA’OGA:

1. Ia fiafia e auauna mo Iesu, tusa lava pe inosia ai.
2. Aua le popole i uiga o le lalolagi, ae manumanu i le Talalelei a Keriso.
3. Ia finau ma lototetele, mo Iesu ma ana feau.

.....

ASO SA: 30 MATI 2025

MATAUPU SA’ILIGA O LE ATAMAI PO’O LE POTO
(Seeking wisdom)

SINI Ia malamalama le vasega, o le sa’iliga o le atamai po’o le poto, e maua lea i le tatalo i le Atua.

TUSI FAITAU Efeso 1: 15 – 23

FESOASOANI MO FAIA’OGA.

O le atamai po’o le poto pe a fa’amatalaina lona uiga, o le iloa lea po’o le malamalama o le tagata, i uiga loloto o mataupu tau le olaga fa’aletino ma le soifuaga fa’aleagaga. E le toe tau fa’ailoaina le to’atele ma le anoanoa’i o tagata ua lat+ou sa’ilia le poto po’o le atamai, ina ia maua ai le fa’aeaina ma le tamaoaiga. O lea ua o se logo e tagitagi pea le nofo tatalo ai o matua ina ia maua le poto e pei oua sa’ili i ai a latou fanau, aua ai so latou lumana’i manuia. Ua tatou fa’amaonia lenei tulaga i le tele o aiga ua siitia tulaga o o latou tamaoaiga,

talua ai ua i'u manuia le sa'iliga a fanau i a'oa'oga maualuluga ma iunuvesite. Ua to'atele foi i latou ua avea ma ta'ita'i o Ekalesia, ta'ita'i o le Malo, o Ulu o Matagaluega ma Pule o Pisinisi ma Kamupani, e o'o lava i Foma'i, Faia'oga, Loia, ma tomai eseese, o le ta'ita'iga foi o Aiga i le Aganu'u ma Agaifanua, e o'o lava i le potou i ta'aloga ma tauvaga eseese ua manuia ai foi nisi tamafanau, talua ai lava le nofo tatalo a matua ma faife'au. O le taunu'uga lena o le nofo tatalo i le sa'iliga o le atamai po'o le potou sa latou tauivi ma tausinio ai.

O le fa'ata'otoga foi lena e le aposetolo o Paulo o le ala i le maua o le potou po'o le atamai, e pei ona ta'ua i lana tusi ia Efeso 1:16-17 "O le mea lea ou te le mapu ai i le fa'afetai ona o outou, o ta'uta'ua outou i a'u tatalo; ina ia foa'i atu ia te outou e le Atua o lo tatou Alii o Iesu Keriso, o le Tama e ona le mamalu, le Agaga e ona le potou ma le fa'aaliga, ina ia outou iloa lelei ai o ia.

O tulaga lelei ua ausia e le au fa'atuatua i Efeso, ma fa'apena le maualuga o le potou ma le atamai i la le tino ma le agaga ua o'o i ai, o le taunu'uga lena o le nofo tatalo ma le tapua'i tatalo a le aposetolo sa ole ma vala'au atu ai i le Atua e ona le Agaga o le potou ma le malamalama.

Ua tusa le nofo tatalo a le aposetolo ma le upu fa'a-Samoa e ave i le tapua'iga tatalo a matua, faimai sa latou feula le mulila, ma latou ta'i le mulipapaga. Ma o le 'a'ano moni o le sa'iliga o le potou ma le atamai ua fa'aogatonu i ai le ola tatalo o Paulo le Aposetolo o Nu'u Ese i lana tusi atu ia Efeso, o le potou ina ia iloa lelei ai le Atua ma lona finagalo, ia tasi tagata uma i le fa'aolataga,

Sa lamatia le lotoifale o Ekalesia Kerisiano i Efeso, Kalatia, Roma ma isi nu'u, i fete'ena'iga i le va o Kerisiano Iutaia ma Kerisiano Nu'u Ese, ona e le talia e Iutaia le ofi mai o Nu'u Ese e fai ma o latou Alii Iesu o le tagata Iutaia, ae latou te le tausia le tu a Iutaia e pei ona aumai e Mose, aemaise ai o le tu i le peritomega. O le a'oa'oa atu a Paulo ia Efeso, ia maua'a le tagata Kerisiano i le sa'olotoga ia Keriso e aunoa ma le tausia o le tulafono a Mose, ae o lona naunauta'iga sili ia tausi le fealofani ma Kerisiano Iutaia. O le 'a'ai o Efeso na suia mai i ai le ogatonu o le Galuega Fa'a-misionare a le Aposetolo ina ua aveesea mai Anetioka i Suria sa i ai muamua. Na lauiloa Efeso i ona tala o le vavau e uiga i lona atua fafine o Tiana po'o Atemisa, aemaise ai o le malumalu o lona atua fafine na fausia mai le potou fa'atufugaga e matua ofoofogia lava. O a'oa'oga foi o le olaga fa'aleaso ma tu ma aga fa'a-Efeso e matua aliali manino ai le maualuga o le potou po'o le atamai fa'a-Eleni. Peita'i o lenei potou fa'a-Eleni ua avea ma ala e le fealofani ai le va o Kerisiano Iutaia ma Kerisiano Nu'u Ese. O le a'oa'oa atu la a Paulo i Kerisiano Efeso, ina ia latou sa'ili le potou po'o le atamai e iloa lelei ai le Atua o le Fa'aolataga, ona fa'ato'a mafai lea ona latou maua le fealofaniga ma tagata Kerisiano Iutaia. O le potou e maua mai le tatalo i le Atua, e le fe'ese'eseai ai ae maua ai le atamai e iloa lelei ai le finagalo o le

Atua, ina ia tasi tagata uma i le alofa. A fealofani ma galulue fa'atasi, o le fa'aailoga lea ua ia i latou le poto po'o le atamai, ma ua latou iloa lelei ai le finagalo moni o le Atua, ia tasi tagata uma i le fa'aolataga ia Keriso Iesu.

Le vasega matutua, po'o le a se uiga taua o lenei mataupu mo tatou? Ailoga e i ai se aoga o le poto pe a fevaevae'i ma le maua e outou le fealofani? Tatou te fiu e fa'afealofani ma tu'u fa'atasi o tatou loto, ae ina ua tatou maua le poto e iloa lelei ai le finagalo o le Atua, ona atoatoa loa lea ona maua e tagata uma le manuia o le fa'aolataga e pei ona finagalo ai lo tatou Alii o Iesu Keriso. E iloa gofie lava se mea e le o i ai se poto ma se atamai, ma le iloa ai le Atua, ina ua tatou va'ai i aiga, nu'u ma malo o lo'o fevataua'i ma fefulituaa'i. Aisea ua fa'apea ai? Ua mate le ola tatalo. Ia manuia tele outou tamaiti.

GALUEGA FA'ATINO:

Tali o fesili.

1. O le a le uiga o le fe'au a Paulo ia Efeso?

Tali: Ia saili le poto e ala i le tatalo, ona fealofani lea o Kerisiano Iutaia ma Kerisiano Nu'u Ese.

2. O ai le atua fafine o Efeso?

Tali: O Tiana po'o Atemisa.

3. Aisea na fe'ese'eseai ai Kerisiano Iutaia ma Kerisiano Nu'u Ese?

Tali: Ona e mana'o Kerisiano Iutaia ia talia e Kerisiano Nu'u Ese le tulafono a Mose ma le sauniga o le peritomega.

4. O fea sa ogatotonu muamua ai le galuega fa'amisionare a le aposetolo o Paulo a o le i suia mai i Efeso?

Tali: O Anetioka i Suria.

5. Aisea na mana'o ai le aposetolo ina ia maua e Efeso le poto po'o le atamai?

Tali: Ina ia iloa lelei ai le finagalo o le Atua, ia tasi tagata uma i le fa'aolataga.

A'OA'OGA:

1. O le poto po'o le atamai e iloa lelei ai le finagalo o le Atua.

2. O le poto o le meaalofa mai le Atua mo i tatou uma e ala i le tatalo.

.....

ASO SA

6 APERILA 2025

MATAUPU:

FA'ALATAINA (*Betrayal*)

SINI:

Ia malamalama le vasega, o le tagata ola fa'alata e toe tauia lava ia te ia lana amio leaga na fai.

TUSI FAITAU:

Luka 22:1 – 6

FESOASOANI MO FAIA'OGA:

O le ulutala o la tatou mataupu o le fa'alataina, ma afai e fa'auigaina leni upu, o se taumafaiga lea e faia ni faiga e tosoa'iina mai ai lagona o se tasi, ina ia fa'ataunu'u ai se faufauga ua loto i ai se isi po'o nisi tagata.

O le uiga tonu lea o lo'o fa'aalia i le Tusi Faitau o leni mataupu Luka 22:1-6, o lo'o ta'ua ai le taumafaiga a le 'au ositaulaga sili Iutaia atoa ai ma ta'ita'i 'au ina ua latou sa'ili se auala e maileia mai ai Iesu lo latou fili ina ia fasiotia. O nei manatunatuga ma faufauga leaga e mai le ti'apolo lea, ma o lea sa uluitino ai e satani Iuta le Sekara o le tasi lea o le 'au so'o e to'asefulu ma le to'alua o Iesu. Ona alu atu ai lea o Iuta ua tautalatala ma le 'au ositaulaga sili ma ta'ita'i 'au i se togafiti e fa'alataina ai Iesu ia i latou. Sa latou sa'ili'ili se auala e ono le iloa ai e le motu o tagata la latou taupulepulega, aua foi ua to'atele le motu o tagata ua talitonu ma fiafia i a'oa'oga ma vavega a le Alii.

E ui o se mea na taupulepule ai Iuta ma le 'au ositaulaga sili ma ta'ita'i 'au, ae sa fetalai lava le Alii i ona so'o e i ai le tasi o i latou e na te fa'alataina o ia. Ua aliali manino mai ai le taunu'u o le upu a le fai evagelia o Luka 4:13 "Ua fa'auma e le ti'apolo le fa'aosoosoga uma, ona alu ese ai lea ia te ia se'ia i se aso." A lea ua le moe lava le fili ina se'ia o'o i le itu aso e maumautaia ai Iesu le Alii. O le tu'ugatala a Iuta ma le 'au ositaulaga sili, ua tu'u atu ia te ia le tolu sefulu tupe siliva ina ia ona fa'alataina ai le Alii. O nei faufauga uma, o mea ua tutupu ina ua o'o i le taimi na tu'upo e le Atua e o'o ai lona Alo Pele i le fa'ataunu'uina o le ofoina atu o lona soifua e saunia ai le fa'aolataga o le lalolagi. O le vaitau tonu ua lata le paseka po'o le tausamiga lea na amata mai Aikupito ina ua finagalo le Atua e ave'eseina lona nu'u mai le nofo pologa i Aikupito. Lea na fa'atonuina ai Mose ina ia logo le nu'u o Isara'elu e sauni le tama'i mamoe e le pona e fasi mo le paseka, o le ata manino lena o le talisuaga pa'ia e avea ai Iesu le Alo o le Atua ma mamoe le pona e osi ai le taulaga mo le fa'amagaloina o agasala. O le ata foi lena o mea tutupu ua aliali mai, o Iesu lava ua fa'alataina ina ia fasia ma fa'asatauroina e osi ai le taulaga mu mo le

fa'asaoina o tagata uma. Ae talofa e, o le mea faigata tele le fa'alataina e se tasi o sona matai, e pei ona tula'i mai ia Iuta ma lona Alii o Iesu.

O lona uiga, o le fa'alataina o se tasi lea o auala na silafia e le Atua e le alofia ona o'o i ai lona Alo Pele ina ia taunu'u le fa'aolataga na auina mai o ia na te faia. Ae ua fa'aalia manino ai le le fa'amaoni o le tagata i lona va ma le tasi ona uso a tagata, aemaise ai o le tagata i lona matai po'o lona Atua.

O le faiga o lenei uiga o le fa'alata e le tele o tagata, o le fa'alatalata atu lea e le ona o se faia o se mea lelei mo le isi tagata, ae o le fa'alatalata e auga i le fia maua o se mea e mana'o i ai mo sona lelei mo na o ia lava.

Maumau e, pe ana fa'alatalata atu Iuta e lagolago ia Iesu lona Alii, peita'i o le fa'alata e lamatia ai le Alii ma tu'uina atu ai i lima o ona fili. E lelei le fa'alatalata e auai i se mea lelei, ae mata'utia le fa'alatalata ina ia faia ai ni faiga e le talafeagai. Tamaiti o le vasega matutua, ia fa'alatalata i matua ma faife'au e sa'ili le manuia e ala i le usita'i ma le fa'alogi, ae le o le fa'alatalata e maunu mai ni mea lelei i auala taufa'asese ma le le moni. Aua o le i'uga o le fa'alataina o Iesu i le fa'alatalata a Iuta, faimai na iloa e Iuta ua fa'asauaina Iesu ma fa'asatauroina, ona toe alu lea ma fa'afoi tupe siliva e tolu sefulu i le au ositaulaga, ae alu ma sisi lona ua ma ua tautau ifo ma ua pa lona ga'au e pei o le tala a le Tusi Pa'ia i le tusi a Galuega 1:16-19 . Tamaiti, aua le faia lea uiga leaga o le fa'alata aua e iu leaga ma mataga, Ia manuia tele outou.

GALUEGA FA'ATINO:

Tali i fesili:

1. O ai le tagata na fa'alataina Iesu Keriso?

Tali: O Iuta le Sekara.

2. O le a le mafua'aga na fa'alata ai e Iuta lona matai o Iesu le Alii?

Tali: Ona o le mana'o i tupe.

3. Aisea na mana'o ai Iutaia ina ia fasiotia Iesu?

Tali: Ona ua ta'uta'ua Iesu i ana a'oa'oga ma ana vavega, ma ua le talitonuina ai i latou e tagata.

4. O le a le tau na fa'alataina ai Iesu?

Tali: E tolu sefulu tupe siliva.

5. O le a se iuga na o'o ia Iuta i lona fa'alataina o Iesu?

Tali: Na ia sisi lona ua ma ua tautau ifo ma ua pa lona ga'au ma oti ai.

A’OA’OGA:

1. O le amio fa’alata e le iu manuia ae malaia.
2. Aua tatou te fa’alataina le Alii a ia alolofa fa’amaoni.

.....

ASO SA: 13 APERILA 2025

MATAUPU: MALOSI TULAGA ESE
(Revolutionary resilience)

SINI: Ia malamalama le vasega o le malosi tulagaese o Iesu, sa ia onosa’ia ai tiga ma puapuaga o le satauro, aua lo tatou Fa’aolataga.

TUSI FAITAU: Luka 22: 63 – 65

FESOASOANI MO LE FAIA’OGA:

ASO SA O LE LAUPAMA: O sina upu e fa’atatau i lenei Aso Sa o le Laupama, o se tasi lenei aso taua tele i le gasologa o aso o le Vaiaso Sa Pa’ia. Aua sa ulufale atu ai Iesu i lana malaga fa’atupu i totonu o Ieruselema. Sa tietie o ia i le tama’i asini, a o fola e tagata lau o pama ma garova ma o latou ofu i le ala, a o tietie atu Iesu i le asini. Ua alalaga foi i latou: “Osana, ia manuia le maliu mai i le suafa o le Alii, osana i le Alo o Tavita.” Ona vavao atu lea e le au faresaio le alalaga o tagata, ae fa’apea atu Iesu: “A le feganava’i i latou, e alalaga mai lava o ma’a.”

I lenei vaitau o le feagai ai o le Au Kerisiano ma le mafaufau loloto i puapuaga ogaoga sa feagai ai ma lo tatou Alii Fa’aola, o ni mafatiaga mamafa tu sa tauamoina e Iesu le Alii, aemaise ai i lona finagalo alofa ina ia lavea’iina le lalolagi agasala mai le malaia ma le fa’afanoga. O ni tiga fa’apenei, e masani lava ona feagai ai le tagata ma lagona le mautonu ma le fememea’i, ma o’o ai lava ina leai se fa’amoemoe. Ua to’atele ua siilima ma fultua i le onosa’i ma le lototele, ae fa’avaivai ma leai se fa’atuatua e tauivi ma aga’i ai i luma. A le o lena, nai lo le lototele ma onosa’i i mafatiaga ma mea tiga, o nisi lava ua matua leai se fa’apalepale, ae ua matua tete’e ma matamataita atu i e na fa’aoo atu puapuaga ma mafatiaga ia i latou. O le pogai ma le mafua’aga lea o taua ma misa ma fete’ena’iga ua aliali mai. Ua leai se malosi e gafatia ai e le tagata ona

loto fa'amagalo, ona ua manatu ua fai ia ma mea ula ma va'ai maualalo atu nisi ia te ia. Ua le fia to'ilalo ae ua titi'e a'e le manatu e le valea foi nei fanau, ona fa'ataumatatao loa lea ma fete'ena'i se'ia o'o lava ina vagai taua ma femisaa'i. I le ulutala o le mataupu o lenei Aso Sa o le malosi tulagaese, ua tatou matamata atu ai ma le ofo tele i le lavatia ma le onosa'ia ai e le Alii Fa'aola o Iesu Keriso o puapuaga ogaoga ma mafatiaga matuitui na fa'aoo atu ia te ia e tagata amio leaga, ae na matua leai leai lava ma sina va'aiga na iloa atu ai sona lagona fa'avaivai pe solomuli, ae na ia onosa'ia tiga na ia feagai ai. E leai ma se upu po'o se fa'atinoga na iloa ai ua musu e tatali tiga, ae sa fa'alogoina lona loto fa'amagalo ma lona alaga e le fia tau ma sui. Aisea ua fa'apea ai? Pe leai ea ni ona fa'alogoga fa'aletagata? O le mea moni, o le fa'aailoga o lona malosi tulagaese, lona lavatia uiga ese ma lona fa'apalepale le ma fuatiaina. Ua fetaia'i le uliuli pato'i o le natura agasala o le lalolagi ma le pupula malosi o 'ave o le amiotonu a le Atua. Ona ofo ai lea o le lalolagi i le sasa atu lava ma tu'u feanu atu, ae fa'afesaga'i e si ana pupula le gaioia ma lona agamalu e le solomuli. E le o se malosi o se tagata, ae o le malosi tulaga ese o le Atua alofa mutimutivale. O le fesili, aisea ua tulaga ese ai le malosi ua fa'aalia o le Alii? Ona o lona alofa fa'amaoni ina ia lavea'iina le lalolagi agasala. Aua a na le malosi tulaga ese lona alofa, semanu na te le mafaia le satauro mataga, semanu foi na te le gafatia le tu'ugamau pogisa. Ae na ia fa'ato'ilaloina ia mea uma, ona o lona malosi tulaga ese, o ia o le Atua Fa'aola le Puluvaaga o tagata uma lava. Ia manuia outou tamaiti.

GALUEGA FA'ATINO

Tali o fesili:

1. Ina ua fa'atigaina Iesu e tagata tau, o le a se tali atu a le Alii Fa'aola?
Tali: Na tali atu Iesu i e na fa'atigaina o ia, i le malosi o le loto fa'amagalo uiga ese.

2. O le a le mafua'aga na fa'apuapuagaina ai Iesu le Alii?
Tali: Ona o le manatu o Iutaia ua ia upuvale i le Atua.

3. Aisea na maua ai le malosi tulaga ese o le Alii o Iesu?
Tali: Aua sa ia usita'i ma fa'alologo atoatoa i lona Tama.

3. Pe mata e mafai ona tatou maua le malosi tulaga ese o Iesu?
Tali: Ioe, tatou te maua ina ua fa'atuatua ma talitonu atoatoa ia te ia.

4. O ai nisi o le Tusi Pa'ia sa tatou va'aia uiga nei o le malosi tulaga ese?

Tali: O le aposetolo o Paulo ina ua feagai ma tiga ogaoga ona o le tala'iina o le Tala Lelei ia Iesu, atoa foi ma Ioane fa'apea ai ma isi so'o o le tala'iga.

A'OA'OGA:

1. E malosi tulaga ese le alofa fa'amagalo o le Atua.
2. E ao ona tatou fa'afetaia le malosi tulaga ese o Iesu ua lavea'iina ai i tatou.

.....

**ASO SA: 20 APERILA 2025
(ASO SA TOETU)**

MATAUPU: UA TOETU O IA (*He is risen*)

SINI: Ia malamalama le vasega, o le Toetu o Iesu ua faamaonia ai le moni o ana fetalaiga i lona au so'o, a'o i Kalilaia o Ia.

TUSI FAITAU: Luka 24: 1 – 8

FESOASOANI MO FAIAOGA:

O le tatou mataupu o lenei Aso Sa, o le Toetu. "Ua toetu o Ia" O le fesili, O ai lea e faatatau i ai le Ia lea? Ioe, o Iesu. O lona uiga la, e afai foi ona faaupu le tatou autu; "Ua toetu Iesu."

E tala tasi lava lenei mataupu, aua o lo o molimau uma i ai le au-faievagelia o le Tusi Paia; Mataio, Mareko, Luka ma Ioane. E tele vaega e tutusa uma ai nei tala, ae i ai foi nai eseesega e pei lava ona tatou faitau i ai. Peitai, o le sini autu e tasi o lo o taulai uma i ai nei molimau e tusa ai ma talitonuga ma le faatuatuga a le au Kerisiano. O tala foi o le toetu, o se tala lava ua faafagogo tagiao i le faafofoga ma le silafia o tagata faatuatua uma o le lalolagi. Aua o le tala ua atoatoa i ai le alofa silisili ese ma le amioutou a le Atua mo tagata uma. O le tala i le toetu mai o Iesu i le oti ma le tuugamau, o le faailoga o le manumao a'ia'i o lo tatou Ali ii fili uma o le lalolagi, aua o le oti o le toe fili o le tagata.

O le molimau a Luka e pei ona tatou faitauina. O le uluai aso o le vaisapati, na latou o atu ai le tuugamau i le tafa o ata, ma ave mea manogi natalou saunia, (o latou o lo o faasino i tinā) na o i le tuugamau e uu le tino Iesu. Ua latou iloa ua

fulieseina le ma'a, ua latou ulu atu foi i totonu, ae le'i iloa e i latou se tino. Ua latou iloa foi o tagata e toalua ua oofu i ofu pupula, ona latou matata'u ai lea ma punou ifo i le eleele. Ua latou faalogo foi ua la tautalatala mai i upu o lo'o faalogina pea i le tele o tasauga i EKeslia Kerisiano uma. I taeao o Aso Sa o le Eseta." Se a le mea tout e saili ai e ua soifua i e ua oti? E le o iinei o Ia, a ua tu, ia outou manatu i lona fetalai ia te outou ina o i Kalilaia o Ia. E tatau ona tuuina atu le Atalii o le tagata i lima o tagata agasala ma ia faasatauroina, ma toetu mai i le aso tolu (3) (Luka 24: 5e – 7)

Ua latou foi mai nai le tuugamau ua faamatala mai lea o ia mea uma i le toasefulu ma le toatasi atoa ma i latou uma na i ai, ma ua atoatoa ai lo latou talitonu; Ua toetu Iesu; ina ua latou mollimauina e ala i le latou vaai ma faalogo, ua taunuu mea uma e pei ona fetalai i ai Iesu, a'o latou mafuta ai i le ola nei. Ioe, le fanau, o le tatou mataupu lena o lenei Aso Sa o le Toetu. O le toetu mai Oesu, e le o se matuapuna faafuaveta pe taumate le taunuu pe leai. A o se mea lava na tofa i ai le finagalo paia o le Atua ina ia tatou toe tutu faatasi ma Ia i le ola e faavavau.

GALUEGA FAATINO:

Faatino le tala e tusa o le molimau a Luka

PESE: 5 (Pese ma Viiga)

A'OA'OGA:

1. O le Toetu o Iesu o le atoaga o le amiotonu a le Atua.
2. O le Toetu ua atoatoa ai le faaolataga mo tagata agasala.

ASO SA:
27 APERILA 2025

MATAUPU: **LAAU** (*Trees*)

SINI: Ia malamalama le vasega, o laau e tele o latou aoga ma taua i le ola o le tagata. O se tasi o vaega taua i totonu o le foafoaga a le Atua.

TUSI FAITAU: Kenese 2: 8 – 10

FESOASOANI MO FAIAOGA:

O laau o nisi ia o vaega taua ma aoga o le foafoaga a le Atua i le amataga,

Fai mai le tala a le Kenese, ina ua uma ona tuu eseese o le sami ma le laueleele, ona faia loa lea e le Atua o laau, e amata mai lava i vao mua mai le eleele, o laau e afu e tupu mai ona fua, o laau e aina ona fua, e afua mai e taitasi ma lona uiga, o ia te ia lava o ona fatu i luga o le eleele, ua faapea lava. O le aso tolu (3) foi na fai ai e le Atua o laau uma o le foafoaga.

O laau uma e aoga i le ola o tagata aemase foi o le siosiomaga o mea uma na faia e le Atua, e pei o meaola uma e fetolofi i le eleele, o manuvaefa ma manu felelei, ma isi. O laau foi e matagofie i le vaai ma maua ai le fiafia o meaola uma o le lalolagi. Peitai, o fuaiupu e valu (8) e oo i le seflu (10) o le tusi e lua (2) a Kenese sa tatou faitauina, ua suia mai i foafoaga o laau eseese o le siosiomaga, i le faia lea o le faatoaga i Etena.

Ua faia foi e le Alii le Atua le faatoaga i Etena i Sasa'e, ona ia tuuina lea i ai i lea mea o le tagata na Ia faia. Ona faatupuina lea e le Alii le Atua i le fanua o laau uma e matagofie i le vaai, e lelei foi pe a aina ona fua, ma le laau o le ola i totonu o le faatoaga, ma le laau e iloa i le lelei ma le leaga.

O le finagalo o le Atua, ia ola fiafia le tagata na Ia faia, o le mea foi lea na Ia faia i mea uma i le faatoaga i le lelei atoatoa ina ia tusa ma le manaoga o le tagata. Na tuuina foi i ai e le Atua o laau uma o le faatoaga e 'a'ai ai. Peitai, e tasi lava le laau na faasa e le Atua, e 'aua le pa'i i ai pe 'ai ai foi. O le laau lea e iloa ai le lelei ma le leaga. Olaau na fai ma taiala o le malaga faa-le-faatuatua o le tagata ma le va tapuia ma le Atua.

Na faia lava e le Alii le Atua o laau uma i le faatoaga ia lelei mo le tagata. Peitai, o le tagata lava i lona le usitai i le finagalo o le Atua. O laau uma lava na fai e le Atua, na faia lava i le lelei ma aoga mo le tagata.

GALUEGA FAATINO: Tusiga Tala

Tusi sau tala e faatatau i uiga eseese o laau, ma faamatala o latou oaga mo tagata. E tasi le laau e tusi i ai lenei tala;

Faaitaitaiga: Niu
Fa'i
Ifilele
Aoa ma nisi

PESE: 115 (Pese ma Viiga)

A’OA’OGA:

1. Na faia e le Atua laau uma, ia aoga mo tagata.
2. O laau e maua ai meaa’i.
3. O laau e faamatagofie ai le siosiomaga.

.....

ASO SA: 4 ME 2025

MATAUPU: LALO O VINE MA MATI
(Under the Vines and Fig trees)

SINI: Ia malamalama le vasega, o Vine ma Mati e i ai o la faatusa ma uiga taua i tala o le Tusi Paia.

TUSI FAITAU: Mika 4: 1 – 4

FESOASOANI MO FAIAOGA:

O le mataupu mo lenei Aso Sa “Lalo Vine ma Mati” O vine ma mati o nisi ia o laau e ola ma tele i nuu o Sasa’e Tutotonu (Middle East) O laau e i ai ni o la taua i faatinoga o tu ma aganuu a Eleni ma Roma ii a ona po. O faailoga o le ola saoloto o tagata, faailoga o le tamaoaiga, o le fiafia, le atamai ma le potoma le alofa e ala i le faatinoga o lagona eseese o tagata.

O mati o se meaaui faasoaina mo tagata Aikupito lava ia. A’o Roma ua latou fa’aaogaina fua o le vine, e fesootai ma lo latou Atua ua faaigoaina. “O le Atua o Uaina”

O vine ma mati o ni faatusa vavalalata o la fesootaiga i tusitusiga faa-Eperu ma le faa-Kerisiano. Ua avea foi vine ma mati o se faailoa lea o le ola maloloina ma le malolosi o tagata o le nuu o le Atia. O lo’o faaogaina so’o foi e Iesu le fesootaiga o nei lava laau i ana lauga ma ana a’oa’oga pei o le ola fesootai o tagata ma ia latou fua tele mai. E pei foi o le tala faa-faatusa a Iesu. O Ia o le vine, a’o lala i tatou. O la uma e pipii i le vine (o Ia lea) e fua tele mai.

I le tusi sa faitauina. O lo o vaai le perofeta o Mika i le taimi e o mai ai faatasi tagata uma latou te talia, ma usitaia ma le fiafia le taitaiga a le Atua, ma ola ai i le filemu o le Atua ma loto faatasi ma o latou tuaoi uma. O a latou auupega e fa’oaga mo taua, ua latou toe fausia ma faalili i mea faigaluega e galueaina ai le laueleele mo so latou tamaoaiga. Ua latou le toe a’oa’oina foi ni faiga o taua ma ni misa.

A e o le a nofo lava le tagata ia i lalo o lona vine ma ona mati ma le filemu ma lona saotologa. Ua leai se mea e toe popole ai se tasi, aua ua pule aoao le Atua.

GALUEGA FAATINO: Faasoa leTusi Faitau

Vaevae le vasega i vaega e 4

Vaega muamua – fefaasoa’i ile fuaiupu 1

Vaega Lua - fetufaa’i i le fuaiupu e 2

Ia faapea foi i le vaega 3 ma le 4. Tai 5 minute faatino ai. Tofi taitai o vaega taitasi na te laulauina le latou suesuega.

PESE: “O le Atua e tele, malosi e matautia....”

A’OA’OGA:

1. O vine ma mati e i ai lo la taua i a’oa’oga a Iesu.
2. O vine ma mati o le faailoga o le saolotoga, filemu ma le alofa.

.....

ASO SA: 11 ME 2025 (ASO SA TINĀ)

MATAUPU: FOLAFOLAGA, FOLAFOLAGA
(*Promises, promises*)

SINI: Ia malamalama le vasega, o mea uma e folafola mai e le Atua i le tagata e taunuu lava.

TUSI FAITAU: Iosua 1

FESOASOANI MO FAIAOGA:

O folafolaga e mafai ona faapea o ni tautinoga. O se faamoemoe mo le manuia o tagata ua folafola mai mo se aso sa taupoina e faataunuuina ai. Peitai, e i ai le eseese o folafolaga e faia e le tagata ma folafolaga e fetalai mai ai le Atua. O folafolaga a le tagata, e taumate lona taunuuga. A o mea e folafola mai e le Atua e mautinoa le tino mai ma taunuu i le manuia.

O lea ua fetalai le Atua ia Iosua ina ua mavae le oti o Mose, ina ia sauni e faaulufale le nuu o Isaraelu i le nuu folafolaina. O le taunuuga lea o le manuia

na Ia folafola ia Aperaamo, o le nuu na te faasino atu mo ia. Ua le gata foi i lea, ae ua Ia folafola atu foi ia Iosua lona le tuulafoai ia te ia; pe afai e faamalosi ma loto tele aua ua valaauina o ia na te tofia le laueleele o Kanana mo tagata o Isaraelu i mea uma e solia e o latou vae. Ia aua foi nei alu ese i tulafono na tuuina atu e Mose le auauna a le Atua ia te ia i le itu taumatau po o le itu tauagavale. O lona uiga, ia tumau ai Iosua ma ia tautalatala ai e pei ona fai mai, aua nei te'a i lona gutu le tusi o tulafono, ia mafaufau ai i le ao atoa ma le po.

O lea lava ua matua folafola e le Atua le manuuia mo Iosua ma le nuu o Isaraelu pe afai e usitai i ana tulafono ma poloagia, ma ola ai i aso uma o lo latou ola, aemise o tu'utu'uga uma e uiga i le nuu folafolaina ina ia fai mo i latou.

O folafolaga ia ua tuuina atu e le Atua mo Iosua ma Isaraelu uma. Ua ia silafia lelei e le faigofie le ala o le a savalia e Iosua e tusa o le valaauina o ia e fai ma taitai. E faapea foi ia Isaraelu, aua ua uma ona asia le nuu ma faavaivaia ai le toatele ona o le tino ese o tagata o le laueleele.

Tamaiti e faapea foi i tatou, e matua le faigofie leni soifuaga o lo o tatou ola ai. E tele faafitauli e fetai ai ma i tatou i le tele o taimi. E le gata e faaseseina ai i tatou i faaiuga fai, ae faavaivaia ai i tatou i le ola taumafai i mea e manuia ai. E le o se mea tatou te fefefe ma palaai ai aua o le folafolaga na faia e le Atua mo Iosua ma Isarelu, o lona foi le faamalosi mo i tatou. Ia tatou faamalolosi ma loto tetele e faatasi mai lava le Atua mo i tatou, pe afai tatou te tumau atu ia te Ia ma ana poloaiga. Ua uma foi ona folafola mai e lo tatou Alii Faaola o Iesu Keriso le manuia atali mo le au faatuatua uma e i ai ma i tatou. Ua Ia folafola mai foi le ola ma le ala e tatau ma le tagata faatuatua e sao ai i le malo i le lagi e ala i le faaolataga na Ia saunia. O lona uiga, ia tatou usiusitai i ai ma mulimulitai i ai i ia taiala, tatou te manumalo ai i manuia o le Atua ua aumaia mo i tatou.

GALUEGA FAATINO: TUSITUSIGA

Tusi mai sau faamalosiau e ave i sau uo e faalototele ai ona o ni fafitauli ua faavavivaia ai o ia mai le ola taumafai i a'oa'oga po o galuega fai. Ia tasi le parakalafa ma ia le silia ma le 100 upu.

PESE: 219

A'OA'OGA:

1. E taunuu uma folafolaga e fetalai mai e le Atua.
2. E manuia le tagata e tumau i le Atua.

3. Ia tatou faamalolosi ma loto tetele aua e le tuulafoai mai le Atua ia i tatou.

.....

ASO SA: 18 ME 2025

MATAUPU: **FAI MA SUI O LE ATUA**
(Representing God)

SINI: Ia malamalama le vasega, o le fai ma sui o le Atua, o le ola lea i le ola famamaina.

TUSI FAITAU: Iosua 7: 1 – 15

FESOASOANI MO FAIAOGA:

I le foafoaina e le Atua o mea uma i le amataga, na Ia faia ai le tagata i lona faatusa. O le avea lava lea o le tagata ma sui vaaia o le Atua i totonu o le faatoaga ma mea uma na Ia faia. Sa le i ai se leaga na iloa ai e oo lava i le tagata. O le amataga lea, o lo o tu matie ai le ola faamamaina, a o le'i agasala le tagata. O le ola faamamaina ma le faapaiaina lea o lo o finagalo ai le Atua, o loo faapupula mai i ona tagata po o lona nuu filifilia o Isaraelu e pei ona muai foafoaina ai le tagata i lona faatusa i le amataga. Peitai, e pei lava o upu ua msani ai, e toe sei lava le fao ua iloga le mea na tu ai. O le uiga o lea faamatalaga, o lea lava ua toe taumafai mai le Atua mo le tagata, ae ua faigata lava ona ua lualuagia mea uma ma le agasala. O le ala lea ua afua ai ona i ai tua o pata tua. O le tau e mulimuli mai ona ua afaina le ola faamamaina. O lea ua mavae atu le faatoilaloina o Ieriko e Isaraelu. O tulafono foi o taua ma mea e maua ai. O mea ia ua faasaina, e le aoga ona ave e se isi, aua o mea ua malaia i luma o le silafaga a le Atua. O le ala lea o le faapea mai, o mea ua faatoina. O le mafuaaga foi lea ua afaina ai le manumalo o Isaraelu i le nuu o Ai, a o se nuu itiiti lava. Ua moni ai le upu, o le lago mate lava e tasi e faaleagaina ai le suauu atoa.

O le agasala a Akana le sa Iuta i lona ave mo ia ni mea ua faatoina mai Ieriko ua tupu ai le toasa o le Atua ia Isaraelu. O le ala lea na tootuli ai Iosua faatasi ma toeaina o Isaraelu i luma o le atolaau a le Atua. Ua saei ofu ma asu ae lefulefu i o latou ulu ma fesili ae i le Atua pe aisea lava ua toilalo ai Isaraelu i le nuu o Ai, ua afua ai ona liu suavai loto o le nuu, a o lea faatoa mavae atu le fiafia tele o le nuu, ona o le faatoilaloina o le aai tele o Ieriko.

O lea na fetalai ai le Atua ia Iosua ina ia faalatalataina mai Isaraelu i ona ituiaga uma, e saili ai Akana le atalii o Karame, le atalii lea o Sapata, le atalii ia o Sera

le ituaiiga o Iuta, o le na afua ai le toilalo o le nuu ma le toasa o le Atua. O le toe faafoi lava lea o le nuu i le ala mama ma le faapaiaina aua o le Atua e mama ma paia na tofia i latou e fai ma ona nuu e pei ona osia ai le latou feagaiga. Tamaiti o le feau foi lea mo i tatou ia tatou ola ma soifua i se soifuaga mama ma le faapaiaina mo le Atua, ona fiafia mai ai lea o le Atua ia i tatou. Tatou te manumalo ai foi faatasi ma Ia i ona manuia pei lava foi ona afio mai Iesu ma faia le faaolataga mo i tatou uma, ina ia faatumauiina ai lo tatou ola famamaina e fai ai i tatou ma sui o le Atua.

GALUEGA FAATINO: TUSIGA SOLO

Tusi mai sau solo i le autu, “Ua fai i tatou ma sui o le Atua” ia le silia ma le 2 fuaiupu ae ia tai ono laina i le fuaiupu.

PESE: 114

A’OA’OGA:

1. Ia faamamaina ma faapaiaina i tatou mo le Atua.
2. E fai i tatou ma sui o le Atua, pe a tatou faailoa atu lana amiotonu.

.....

ASO SA: 25 ME 2025

MATAUPU: A’OA’OINA I LE GALUEGA
(On the job training)

SINI: Ia malamalama le vasega, o i tatou uma lava o mea faigaluega a le Atua mo lona malo.

TUSI FAITAU: Luka 9: 1 – 27

FESOASOANI MO FAIAOGA:

I so o se galuega lava, e i ai agavaa faapitoa e manaomia ina ia laina tutusa le avanoa faigaluega ma le agavaa o le tagata talosaga. O le taua lea o le ola a’oa’oina i le poto salalau. E a’oa’oina ai fanau ma tapena ai i latou i agavaa eseese mo le taimi e oo ai le soifuaga i le fai ma tagata faigaluega. O lea ua tele na maua ai faiaoga, fomai, leoleo ma le tele o isi galuega.

A o le soifuaga faa-tausi aiga ma le faatinoina o le soifua tautua o tagata Samoa, e ese foi le auala e a’oa’oina ai. E a’oa’oina i le lelei o le faalogo ma le vaai, e

taofimauiina ai i le loto tu ma agaifanua faa-Samoa, ina ia iloa ona tu, nofo, savali aemaise le gagana e tautala ai.

E faapea foi le avea ai o i tatou ma Kerisiano, po o tagata ua talitonu ma mulimuli ia Iesu Keriso le Faaola le faaolataga ua tapuvae tasi i ai lo tatou faatuatuaga.

O le galuega na amata mai i le ausoo o Iesu. O i latou ia na mua'i mafuta ma le Alii Faaola a o i ai o Ia i lana galuega talai. O le ala lea na tuuina atu ai e Iesu i latou e o e talai atu le Tala Lelei ma faatino le galuega. Ua talafeagai foi mo i latou, aua o lo o latou mulimui atu, mafuta ma Iesu i mea uma sa femalagaa'i ai o Ia. Sa latou vaai ma molimau i vavega na faia e Iesu, o le faamaloloina o e mama'i. Sa latou faalogologo foi i le tele o ana a'oa'oga, e taialina ai lo latou ola auauna mo Iesu ma lana galuega. O le a'oa'oina lava lea o i latou, aua o i latou lava o le a feagai ma le galuega tala'i pe a tuua e Iesu le mafutaga. Ai lava o le mafuaaga lea na a'e ai se tofa i le finagalo o Iesu ina ia tuuina atu lona au soo ma lana faamanuia ia i latou, ina ia o e talai atu le Tala Lelei, sei tofotofoina ai lona ausoo, po o ua latou lagona o le taua o lo latou valaauina faa-tagata galue mo le Alii ma lana feau.

O se faatatau ua maoa'e mo le auso'o aua ua silafia e Iesu faafituali o lo o feagai ma i latou i lea vaitau. E le gata o le tuu fesili pea o Herota le tupu, a o le tulituliaina o i latou e tusiupu ma faresaio ina ia tineia ma faaleaogaina le afio mai o Iesu, o Ia o le Mesia.

O le tulaga e maofa ai, o le uma ona auina o le tala fiafia e le auso'o e tusa ma le galuega sa feagai mai latou, ae fetalai Iesu mo ni meaai aua le motu o tagata na lolofi ane ae tali e leai ni meaai. Na o nai areto e lima gafua ma ia e lua lau. O lea na faatino ai e Iesu le vavega mo tagata e silia ma le toalima gaafe. Talofa i le auso'o, o tagata o lo o tapenaina e Iesu mo le galuega tala'i, ae le ma taofimau i le faatuatua. E ui na latou taulagi o Iesu le Keriso o le Atua, ae le tumau ai. O lea na fetalai ai Iesu, mo le tagata e fia mulimuli atu ia te Ia. Aua le usiusitai o ia ia te ia, a ia ave lona satauro i aso fai so'o. O le uiga o lea upu, faatasi ma le faamaumau o le ola ona o Iesu e faasaoina o ia. O tagata ua loto ina mulimuli ia Iesu, ua matua aveese uma lagona faaletagata ma manoaga o lenei lalolagi, ae faalagolago i le mafuta mai o le Agaga o le Atua e faatumuina ai. Na te mafaia ai ona ui i faigata ma faafitauli ma manumalo ai faatasi ma nisi ua faafouina ona o ia ma lona soifua ofoina atu mo le Alii i so o se auala.

Tamaiti, o se a'oa'oga foi lea mo i tatou. O Afioga Paia a le Atua, o lo o aumai ai a'oa'oga ma faataitaiga e tele e a'oa'oina ai i tatou mo le Atua ma lana Tala Lelei. O i tatou lava o so'o o Iesu mo le Tala Lelei. O lea, ia tatou tumau i le faatuatua ma faalagolago i le mafuta mai o le Agaga o le Atua, tatou te malolosi ai e faatino lana galuega ua taatia mai mo i tatou.

GALUEGA FAATINO: TUSIGATALA

Tusi mai sau tala tusia, e faamatala mai ai lou talitonuga, o oe o le tagata galue mo le Atua e tusa ma le tala sa faamatalaina. Ia le silia ma le tasi le laupela le umi.

PESE: Pese maViiga 363

A’OA’OGA:

1. Ave lou ola mo le Alii.
2. O i tatou o mea faigaluega mo le Atua ma lona finagalo.
3. Tumau i le faatuatua.

.....

ASO SA: 01 IUNI 2025

MATAUPU: FAATĀUA MA AVEA MA MOLĪ (*Beholding and becoming light*)

SINI: Ia malamalama le vasega, ia fai i tatou ma moli I le pogisa, o lo tatou lea i le malamalama o le Alii, ma faasusulu atu I e o i le pogisa.

TUSI FAITAU: Luka 11: 14 – 36

FESOASOANI MO LE FAIAOGA:

O le fesili faatupu manatu mo le tatou vasega, o le a le faamoemoe o le molī? Ioe o le moli, o le sulu, ia po o le malamalama e na te faamalamalama ma faasusulu atu. Faataitaiga: o le la, o le malamalama i le ao, o le masina ma fetu o le malamalama i le po. O le moli uila e mumū, i le po pe a pogisa, ia ma le tele ma le anoanoa’i o le taua o le moli.

Peitai o le tatou faitauga i lenei taeao, ua faataua mai ai le avea ma moli. I le fuaiupu e 33- 36 o lo o fai le lauga a Iesu i le motu o tagata e toatele ina ua lolofi mai e matamata ma molimau i le matautia o vavega na Ia faia. I le mataupu o lo o i luga atu fuaiupu e 29 – 32, o loo talanoa ai Iesu i le tupulaga leaga, e foliga mai seiloga lava o ni faailoga ona fa’ato’ā talitonu lea. E pei foi o le tala ia Iona ina ua alu e ta’u le feau ia Nineva. Ae fai mai Iesu o loo iinei le tagata e sili atu na i lo Iona.

Manino lava le fetalaiga a Iesu i le pogisa ma le faanenefu o lo o i ai le motu o tagata. Lea la ua oo mai i le vaega mulimuli o le faitauga, o lo o lauga ai Iesu i le avea e fai ma moli e faamalamalama atu. Peitai o lo o faatatau le lauga a Iesu i le au faresaio, lē talitonu ma lē taliaina aoaoga a Iesu Keriso. Ua fia ni vavega ua vaavaai i ai, peitai e le o mafai lava ona latou taliaina, pei foi ona taua i le fuaiupu 14 – 23 ina ua latou tofotofo ia Iesu ma saili ia te ia, pe maifea ea le mafai ia Iesu ona tulia o temoni.

I le vaega mulimuli o le faitauga, faapea mai “E leai se tutu i le moli ma tuu i le mea lilo...” Ioe o le faamoemoe lava ia o le moli, e tuu i luga o le tuugamoli ma faamalamalama atu. O Iesu foi o le moli na auina mai e le Atua e faasusulu atu lona malamalama i le lalolagi pogisa. Fai mai le molimau a Luka, o mata o le moli ia o le tino. O Iesu o le moli lea i le tino o le tagata, ioe po o a faafitauli e tutupu i le tagata, ae avea Iesu ma moli i lou ala, po o le a lava le pogisa, e le taitai ona mate lena moli.

Fai mai Iesu “...ia oe, nei pogisa le malamalama ua i totonu ia te oe” Le fanau, vaai nei e le faatauaina le moli o lo o i totonu ia te oe, o ai lena moli? O Iesu Keriso. O Ia lava o le moli e faasusulu atu lona malamalama i le pogisa, o moli foi e malolo ai tagata mama’i ma i latou uma o manaomia le fesoasoani. A ia avea oe le tama ma le teine aoga Aso Sa, ma moli pupula e faasusulu atu le malamalama o Keriso, ta’u atu, tala’i atu le Tala ia Iesu, o le tala lava o lona manumalo.

GALUEGA FAATINO:

Faamatala uiga o fuaiupu o le a ta’ua i lalo

Fuaiupu 34 – “O mata, o le moli lea o le tino; o lenei pe afai ua lelei ou mata, e malamalama uma ai lou tino; ae afai ua leaga, e pouliuli ai lou tino”

Fuaiupu 35 – “O lenei, ia oe, nei pogisa le malamalama ua i totonu ia te oe”

PESE: Pese Aoga Aso Sa
(GIVE ME OIL IN MY LAMP)

A’OA’OGA:

1. O Iesu le malamalama silisili
2. Ia fai tatou ma moli e faapupula ma talai atu le Tala Lelei
3. Faatau lou talavou mo le Atua ma lana feau.

.....

ASO SA:

08 IUNI 2025

MATAUPU:

**O LE AGAGA PAIA, O LE FA'AMA'ITE
TATALO**
(The Holy Spirit, prompter of prayer)

SINI:

Ia malamalama le vasega, o le Agaga Paia o le Atua na toia ai lona 'au so'o, lea na mafua au ona tautatala i gagana eseese

TUSI FAITAU:

Galuega 2: 1 – 18

FESOASOANI MO LE FAIAOGA:

Ua uma ona filifili o Matatia e fa'aatoa ai le fuainumera o so'o, o lo o taua i le vaega mulimuli o le mataupu o lo o i luga atu. O le Aso Penetekoso, na auina ifo ai le Agaga Paia ma tautoalua ai le au so'o o Iesu. O le Penetekoso lava ia, o le faamanatuina o le 50 aso talu ona sopoloa le agelu o le oti, e ala i le faasaoina o Isaraelu mai Aikupito i le Feagaiga Tuai. Peitai o le Feagaiga Fou lava ia, o le 50 aso talu ona afio Iesu i le lagi, ae auina ifo loa lona Agaga Paia ma to'ia ai lona au so'o.

O le Agaga Paia e faamaite tatalo, o le Agaga Paia e faatutumuina ai lona au so'o e o atu e talai ma faia le finagalo o le Atua. O le fesili e faatumu faapefea? O lona agaga e ola i totonu o le tagata, o le Agaga Paia e faatupu ma faatumuina le malosi, e faia le finagalo o le Tamā. O le afuaga foi lea o le tautatala o le au so'o i gagana eseese, ina ua faatumuina i latou e le Agaga Paia.

O le fesili, aisea ua tautatala ai le au so'o i gagana eseese? Auā foi e le na o le au so'o lea e i ai i Ierusalem, e le na o tagata Iutaia o lo o i ai i le vaega tonu o taua i le tala. O lea e filogia ma tagata o nuu eseese ma itu e fia o le lalolagi. Le ala lena ua tautatala ai le au so'o i gagana eseese ina ia malamalama ai tagata o nuu ese, i le uiga moni o le Tala Lelei ia Iesu Keriso, ma ia o'o le Tala Lelei i tuluiga o le lalolagi.

Ua maofa le toatele, aemaise o tagata o nuu ese, ina ua tautatala le au soo i a latou gagana. Ua segia o latou mauili, o lona uiga ua matuai ofo lava i le mea ua faia. Manatu foi o le ala lena ua fesiligia ai e nisi le galuega a le au so'o o loo fai, masalo pe ai ua onanā i le inu i le uaina suamalie.

Fai mai le tali atu a Peteru i mafauauga o le motu o tagata, na ia faaaoga ai le upu sii a le perofeta o Ioelu faapea mai “*O ona aso e gata ai, o loo faapea mai ai le Atua, e iu ina ou liligi ifo ai lo'u Agaga i luga o tagata uma lava; ona perofeta mai mai lea o outou atalii ma o outou afafine, e iloa faaaliga, e o outou*

taulelea, e fai miti foi o outou toaina. O ia aso foi ou te liligi ifo ai lo'u Agaga i luga o a'u auuana tane, ma a'u auuana fafine, latou te perofeta mai ai''

O lona uiga o le Agaga Paia lava o le Atua, ua na faamaite mea uma lava, na Ia faatumuina le au so'o e talai atu le finagalo o le Atua. O le Agaga Paia foi, o le faamaite tatalo, aua o le auala lea tatou te fesootei ai i le Atua, ona ia tautoalua lea o i tatou. O le malosi foi lea tatou te tutu ai i luga ma tatou malolosi e fai le finagalo o le Atua, ma tala'i atu o Ia i le lalolagi.

GALUEGA FAATINO: Taliga Fesili

1. Aisea ua tautatala ai le au so'o i gagana eseese?
2. O le a se faailoga o lo o faatusa ai le Agaga Paia e pei ona taua i le amataga o le mataupu?
3. Faamatala le Aso Penetekoso?

PESE: 114 (Agaga Sa e, afio mai)

A'OA'OGA:

1. O le Agaga Paia o lo tatou fesoasoani sili lea
2. O le tatalo o le auupega lea a le Kerisiano
3. E faaogaina e le Atua lo tatou faatauvaa e tala'i lona finagalo

.....

ASO SA: 15 IUNI 2025

MATAUPU: O UPU O LE FAAMOEMOE
(Words of hope)

SINI: Ia malamalama le vasega, e laveaiina lava e le Atua i tatou pe a o tatou faamoemoe ma faalagolago ia te Ia.

TUSI FAITAU: Isaia 40: 1 – 5

FESOASOANI MO LE FAIAOGA:

A o'o ina faavaivaia le tagata ona o se puleaga malosi o lo o saisaitia ai, o le mea moni e le mafai ona maua se nofo filemu. E ātu le loto, e le maua se moe lelei. Ae afai foi e moe i le po, e moe i loimata maligi, ae ala i tiga ma faigata. Aua foi o lea ua sauni nisi foi avega mamafa o le a amo i lea aso ma lea aso.

Atonu e faapena lagona ootia o le nuu o le Atua, ina ua faatafea i Papelonia pe a ma le 70 tausaga. O lagona o le mafatia ma le saisaitia ona o puleaga a nisi. Peitai o le mataupu sa faitauina o lea lava ua manino le fetalaiga a le Atua o lo o taua i le fuaiupu e 2 “Ia outou faamatalaloto ia Ierusalema, ma outou alalaga ia te ia, ua iu ona po o lona tiga, ua tauia lana amioletonu; aua ua na maua faalua mai le lima o le Alii le tau i ona o ana agasala”

Fai mai le Atua, ua iu po o le tiga, o lona uiga o le a sauni le Atua toe faaola lona nuu mai le lima malosi o Papelonia. Ua tauia le amioletonu a Isaraelu, ua lagona foi e le Atua lona alofa i lona nuu. Le alofa lea o le Atua ua na toe tuu le faamoemoe fou, i le loto ma le agaga o le tagata ua mafatia. O le alofa e faigofie ai mea faigata, a lea fai mai Isaia, “O vanu uma e faeaina ia; o mauga uma ma mea maupuepue e faamaulaloina ia; o mea faafatiatamai e fai ma mea faalaugatasi ia, ma mea gaoa e fai ma mea laulelei.

O le alofa le faatuaoia lea o le Atua, le alofa na te faalauleleia ai le ala e savali ai le tagata. O upu o le faamoemoe ola, e i ai lona tau i e mulimuli mai. A lea ua manino lava le molimau a Isaia, e toe aumai lava e le Atua lona nuu mai le lima o lona fili. O upu o le faamoemoe e laveiina ai le nuu o Isaraelu, o le faaliga foi lena o lona alofa.

O le alofa foi “na te leoleoina ai lona lafu e pei o le leoleo mamoe; na te sapaia tamai mamoe i ona lima, ma tauave i latou i lona fatafata; na te taitai filemu foi i mamoe ua fananau.” O upu o le alofa, o upu o le faamoemoe mo le nuu o le Atua. O le faamoemoe na o le Atua, e le gata ina leoleo, ae faapena ona taitai, e faafuata foi i lona fatafata e ua vaivai ma mafatia, ae sili ai, e taitai ma le filemu. Fanau, o upu o le faamoemoe, o upu o le alofa, o upu o le ola, o upu faamafanafana e na te aumaia le faamalosi ma le faalototele ia i tatou. E i ai taimi tatou te vaivai ai ma pauu i mea o lenei olaga, peitai o se upu faamalosi au, o upu o le faamoemoe, e maua ai e i tatou le malosi. Le malosi lena e faatino ai lo tatou valaauina, ua tofia ai i tatou. O le upu a Iesu ao lei maliu o Ia. “Ia taunuu” O se upu ,o le faamoemoe, ona ua maea lana galuega tiga mo le faamagaloina o a tatou agasala.

GALUEGA FAATINO: Fetufaa’iga

Manai a e fai se faaso a le vasega, faamatala pe ta’u mai ni faafitauli na feagai ai i totonu o aoga, totonu o le aiga, le nuu ma le Ekalesia. A maea, ona faatalatalanoa lea po o a ni auala na mafai ai ona foia lena faafitauli. Mafaufau i le uiga o le mataupu, o upu o le faamoemoe e mafai ai ona laveiina se faafitauli o feagai ai.

PESE: 371 (Laulau mai pea ia te i matou)

A’OA’OGA:

1. E le faatuaomia le alofa o le Atua ia i tatou
2. O upu faamalosi au, e faalototeleina ai le tagata vaivai
3. Faamoemoe ma faalagolago i le Atua

.....

ASO SA: 22 IUNI 2025

MATAUPU: E LEAI LAVA SE TASI
(There is no other)

SINI: Ia malamalama tamaiti ua na o le Atua lo tatou maluapapa i taimi faigata.

TUSI FAITAU: Isaia 45: 1 – 7

FESOASOANI MO FAIAOGA:

O le gasologa lava ia ma le agaiga o le soifua nei, fai mai a sologa lelei mea uma, ona sapi lea ma ola fiafia le tagata i manuia o le Atua. Ae a feagai loa ma faafitauli, ona peiseai lea ua totogo a’e lagona faaseā ma tee pea le uluga i le pule faitoatasi a le Atua. Ao le talitonuga lava ia o soo se tagata faatuaia, o totonu o ia faafitauli, o loo ogatotonugalemu ai le alofa tulituliloa o le Atua, i le faamoemoe ina seia toe faatepa lava le i lona alofa e tuutuu vavaau.

E faapena se lagona o lo o taumafai ai le perofeta o Isaia ina seia faailoa ia Iuta. E leai lava se tasi e mafai ona toe faafoisia le tafeaga, ua na o le Atua. E leai lava se tasi e mafai ona faafogaina lo latou saili atu, ua na o le Atua.

A la lea ua manino i le faitauga o lenei taeao. Ua na o Atua i lana lava pule faitoatasi, na Ia tapenaina ai le faaolatagata mo lona nuu, ae faaaogaina ai Kuresa le tupu o Peresia. Fai mai le molimau a Isaia, “*O lo o faapea ona fetalai mai le Alii i le ua faauuina e Ia...*” O lona uiga, o le faauuina ma le filifilia o Kuresa, o se fuafuaga ua leva ona tapena e le Atua, ma le faamoemoe, o ia na te faafoisia le tafeaga a lona nuu i Ierusalem. Fetalai le Atua, “*o le ua ou taofia lona lima taumatau, ia faatoilaloina nuu i ona luma, ou te tatalaina foi sulugatiti o tupu; e tatalaina i ona luma o puipui vae lua; e le punitia foi faitotoa.*”

O lona uiga, o Kuresa - ua mae’a tofia ma tuuina i ai e le Atua le pule ma le malosi uma lava e faatoilaloina ai Papelonia, ma na gauia foi a latou faamau uamea, ma nutininii puipui apa memea. E le gata ina ia iloa ai e le lalolagi uma

ma le nuu uma o Sa Iuta, e leai lava se tasi, ua na o Ia lava o le Atua e malu ai lo latou ola.

A vaavaai i le tala, o lea ua tuana'i fita ma faigata, le vai tau sa nofo pologa ai le nuu o le Atua ia Papelonia, e le fesiligia foi le i ai o faitioga ma le fesiligia so'o e Sa Iuta o le auai ma le le auai o le Atua ma i latou. Peitai o lea ua manino le mata o le vai, o a faafitauli, o a fatiatama'i, 'a'ua lava nei galo o loo tautoaluaina i tatou e le Atua.

Uiga o Upu:

- i) Sulugatiti - Suluga, vaega e sulu ai le ie
- ii) Maupuepue - Nofoaga maualuga

GALUEGA FAATINO: TALIGA FESILI

1. O ai le tupu na ia faafoisia le tafeaga

Tali: O Kuresa

2. O ai Kuresa?

Tali: O le tupu o Peresia

3. O fea na faatafea ai le nuu o le Atua?

Tali: O Papelonia.

PESE: 137 (Pese ma Viiga)

A'OA'OGA:

- 1. E leai se mea e faigata i le Atua
- 2. Ua na o le Atua lo tatou toomaga i taimi faigata.
- 3. E tapenaina e le Atua i tatou mo so o se faamoemoe.

.....

ASO SA: 29 IUNI 2025

MATAUPU: O LE ATIIA E FIAFIA E FAAMANUIA (*The God who loves to bless*)

SINI: Ia malamalama tamaiti o le Atua e tapenaina manuia mo tagata uma.

TUSI FAITAU: Teuteronome 28: 1 – 14

FESOASOANI MO FAIAOGA:

A faalupe le Atua i lona va nonofo ai ma le tagata; fai mai o le Atua pule aoao, o le Atua o le alofa fua ma le alofa mutimutivale, o le Mataisau poto o le foafoaga, na Ia foafoaina le lagi ma le lalolagi ma mea uma o tumu ai. O le Atua foi o manuia ma le tamaoaiga uma lava. O Ia foi na te faamanuia i ona tagata e tusa ma lana na fai.

Manatu e tai foliga faapena se lagona o loo mamamu ai e Mose lana tusi lea. O le Atua o lo o fau ma soloi ai manuia uma lava, e faamanuia ai ona tagata. Pau a lea o le tuutuuga lea e finagalo i ai Mose e ao ona usitaia ma savavali ai Isaraelu. O le “..... matua faalogo lea i le siufofoga o le Alii le Atua, anaana e fai ana poloaiga uma lava na fai atu ai ia te ia i le aso nei, ona faasilisiliina lea o Isaraelu e le Alii le Atua, i nuu uma lava o le lalolagi.”

O lona uiga, o lea lava ua manino le mata o le vai i le faafofoga maua a le nuu o le Atua. O le matua faalogo ma anaana e fai poloaiga. O lona uiga, o le faalogo e le gata o le faalogo, a ia matuai naunau e ola le faalogo i totonu o le loto o so o se Isaraelu. Ia usitai i le faatonuga aemaise o le faasinoga a le Atua, ia ‘alo’alo ese mai mea faafiafia o lenei ola, a ia tuu taula lagona o tagata uma i le Atua, ona faasaga ane lea o le Atua e faamanuia ia te oe.

A vaavaai i le gasologa o le tala, o lea ua aumai faatasi ma manuia e maua e le tagata, pe afai e matua faalogo ma anaana i poloaiga a le Atua. “*E manuia o ia i le aai, e manuia fanua, e manuia lau fanau, ma le fua o lou lau-eleele, ma fanau a au manu vaefa, o tama a au povi, ma ou lafu mamoe.*”

O lona uiga, e leai se mea e toe mativa ai lenei tagata. O le a mautu mea uma. E manuia ai lona nuu po o le aai, o le a fua lau usiusi laau uma o le faatoaga atoa ma mea toto, e manuia lana fanau, ae toe manuia atu ai ma ana mea fafaga. E peiseai lava o lea ua manino lava, o le auala ma ki e ui atu ai ma maua ai e le tagata manuia, o le faalogo ma usitai i le finagalo o le Atua.

Uiga o Upu:

- | | | | |
|------|-----------|---|--------------|
| i) | Siufofoga | - | Leo |
| ii) | Anaana | - | Usitai / Ava |
| iii) | Poloaiga | - | Tulafono |

GALUEGA FAATINO: Tusiga solo

Tusi sau solo i le manatu autu o lenei aso, “**O le Atua e fiafia e faamanuia**” Ia lua fuaiupu tai 6 laina i le fuaiupu.

PESE: 11 (Pese ma Viiga)

A’OA’OGA:

1. O le Atua e tapenaina manuia o tatou
2. Saili le fiangalo o le Atua ona tatou maua lea o ona manuia
3. O le Atua o manuia.

.....

ASO SA: 6 IULAI 2025

MATAUPU: O LE MAU’OA MA LE TAGATA MATIVA (*The rich and the poor*)

SINI: Ia malamalama le vasega e faamanuiaina e le Atua le mauoa e foai ma le alofa i tagata matitiva.

TUSI FAITAU: Faataoto 22: 1 – 16

FESOASOANI MO FAIAOGA:

O le talitonuga lautele lava ia, o le oa ma le tamaoaiga o “meaalofa ia e mai le Atua”. O le faasoa a le Atua i le tagata ua filifili e alu ese mai le ola faapalapala ma le ola paie, ae naunau ma filigā e sailiili manuia o le Atua. O le tamaoaiga foi i le manatu o le tusi o Faataoto, e afua mai le loto ua malie ma matau i le Atua. O le loto, o le faatusa lea o le tagata atoa i le manatu faalutaia. So o se mea lelei e afua mai le loto, o le mea lea mai le Atua.

I le manatu o le tusitala, na o le Atua o le puna o manuia uma lava. Ao la tatou sailiga i ia manuia o le Atua ma lona tamaoaiga, o i e afua ai ona eseese ituaiga tagata i totonu o se siosiomaga; o le tagata mau’oa ma le tagata mativa. Ae le gata i lea, ao sailiga foi ia, e afua ai ona eseese soifuaga e lilifa ai ma lolo i ai, o le isi tagata ua ola mativa ona o le paie. Ua fiafia ai lava foi e ola ai ma fai ma vaisu, ua leai se naunau e alu ese mai lea ituaiga siosiomaga. O isi tagata ua maua mea, saoloto, tamaoaiga, tele uo, ma ua faamanuiaina e le Atua.

A faitau manino i le tala, e le o faaleaogaina e le Tusitala le mativa, leaga o le mau’oa ma le mativa, o tagata uma lava i laua na faia e le Atua. Pau lona eseese e afua ai ona eseese, o le tofā ma le faautaga e afua ai ona mau’oa le isi, ae mativa le isi.

Fai mai le Poto, “O le faautauta, na te iloa atu le leaga, ma lafi ai; a o e ua faigofie, e o atu pea i latou, ona faasalaina ai lea. O le tau i o le faamaulalo ma le mata’u i le Alii, o le oloa lea, ma le viiga, ma le ola.”

O lona uiga, e foliga mai, e ala ona mau’oa le tagata, ona o le ola faautauta, ola faaeteete. A ia iloa le mea e fano ai le ola; ona ‘alo’alo ese lea ma lafi ai. E ala foi ona mau’oa ona e loto maulalo ma āva ma mata’u i le Atua.

Ao le aoaoga lea o lea tatou te aoaoina ai a tatou fanau. Ia ava ma matatau i le Atua, o le amataga lea o le poto. A maua le poto, ua maua le oloa e tele, maua mea e tele e faamalie ai lona manao. Ao le mativa, musua o ia i le poto ma le aoaoina, a ua ua’i atu ona taliga i le paie ma le lē magafagafa.

Ioe le fanau, o le faamanatu foi na mo i tatou. O le oa ma le tamaoiga e mai le Atua mo e saili moni ma le faamaoni ia te Ia. Ao le mativa o le taunuuga o le tagata e musua taliga e faalogo i mea e manuia ai, ae ua fai lava lona loto.

A ua aoga le faamanatu o le tatou mataupu i lenei taeao tamaiti. O le ola faautauta ma le ola magafagafa i faaiuga fai, e laveaiina mai ai tatou mai le ola mativa. A o le ola e finafinau ma le sogasogā, na te mau le oloa faasoa mai o le Atua.

Uiga o Upu ma Fuaitau:

- | | | | |
|------|-----------|---|-----------------------|
| i) | lē no mea | - | tagata nono/aitalafu. |
| ii) | faatauemu | - | amuamu/ulagia |
| iii) | mala | - | malaia |

GALUEGA FAATINO: Taliga Fesili

1. Aisea e afua ai ona ola mativa le tagata?

Tali: Ona ua le faautauta lelei ma ua ola paie.

2. O le a se faatinoga e maua ai le oa mai le Atua?

Tali: Ia ola saili ma faamaoni i le Atua.

PESE: 82 (Pese ma Viiga)

A’OA’OGA:

1. Faamalolosi i le ola galulue.
2. O le tagata lava ia e mafua ai ona mativa, ao le Atua e tele lona tamaoiga.
3. ‘Aua le ola faatamala, mea manū o maua le avanoa.

.....

ASO SA: 13 IULAI 2025

MATAUPU: O LE TULAGA UIGA ESE O IESU
(Jesu unique significance)

SINI: Ia malamalama tamaiti o Iesu e silisili ese i mea uma auā o le Atua lava Ia.

TUSI FAITAU: Eperu 1:1 – 2:4

FESOASOANI MO FAIAOGA:

O le Afio mai o Iesu i le lalolagi, e le o le faamoemoe ina ia faia se faatusatusaga ma perofeta poo ai e sili. Pe ina ia tauleaogaina fo’i le tautiga o perofeta, o e na mua’i faailoa le finagalo o le Atua i le lalolagi, e leai. O lona Afio mai, o le ata vaaia o le Atua ua i le lalolagi, o le faailoa o le alofa silisili ese o le Atua ma lona faamaoni i le lalolagi agasala. O le ta’u tulaga ese o Iesu, o le molimau ola lena a tusitala o le tusi lenei o Eperu, auā ua latou vaai tino i le mana ma le ofoofogia o galuega fai a Iesu.

O le tusi o Eperu, o le tusi na tusia ina ua maea ona tapena e Iesu le faaolataga, ua afio ae o Ia i le lagi ina ua to’ilalo le oti ma le tuugamau e ala i lona Toe Tu manumalo. O le Talalelei ua logo ai itu e fia o le lalolagi uma, o le faamoemoe mautinoa ua maua mai i tua atu o puapuaga ma faigata. O le tusi na tusia i le vaitau o le tau amataina o le uluai ekalesia. O le taimi o le malosi o puleaga a le malo o Roma i le lalolagi. E le gata i lea o le lotu Iutaia foi ma ana tulafono ua taotaomia ai le Au Kerisiano. O le faamoemoe lea o le tusi o Eperu, ia ta’u atu i le Au-kerisiano Iutaia e tulaga ese lava Iesu i mea uma. O ā faigata ma faafitauli o lo o feagai ma le Au-kerisiano, ia lototetele ma faamalolosi, ua manumalo Iesu i mea uma. O Iesu o lo o nofo i le itu- taumatau o lē silisiliese i lugā. E ifo ia te Ia o agelu uma lava. O lona nofoalii e faavavau ma lona tootoo o le amiotonu lea. E oo lava i agelu e auauna ma ifo ia te Ia. O Iesu ua atoa ia te Ia le mana ma le mamalu o le Atua. O le tulaga ese lea o Iesu e tataua ona fai ma faavae malosi e taula iai le faatuatua o tagata uma. Ia auauna ma le mautinoa o Iesu o le Atua lava lea ua Afio mai e togiola i tatou uma e ala i lona alofa e faavavau.

Mo tatou le fanau, o le tatou mataupu lena o lenei aso, ia malamalama tatou le fanau, e leai se tutusa ma Iesu i le lalolagi, e tulaga ese lava ia i mea uma. O ia o le atoaga o mea uma na faia e le Atua. Ia tatou galulue ma le mautinoa, o le

Atua o lea lava ua faaaliala e ala i a Iesu Keriso ma le faaolataga tele ua Ia tapena mo i tatou uma ma le lalolagi atoa. O lona uiga o Iesu o le avanoa ua tatou maua ai le faaolataga, e leai lava se isi suafa e sili atu auā o ia o lo tatou Alii ma le Faaola e to'atasi.

GALUEGA FAATINO: Fa'aali manatu

Faasoa le Vasega e uiga i le mataupu. Ia tuu le avanoa i le vasega e faasoa mai ai so latou silafia e uiga ia Iesu ma lana galuega ua afua ai le autu o lenei aso. “O le tulaga ese o Iesu i mea uma.”

PESE: 370 (Pese ma Viiga)

A'OA'OGA

1. E silisili ese Iesu i mea uma.
2. O Iesu o le ata vaaia o le Atua manumalo ua i le lalolagi.

.....

ASO SA: 20 IULAI 2025

MATAUPU: O LE TOTO O IESU (*The blood of Jesusu*)

SINI: Ia malamalama tamaiti o le toto o Iesu na faamamaligiina ua tatou maua ai le faamamaina ma le faamagaloina o i tatou mai a tatou agasala.

TUSI FAITAU: Eperu 9:11 – 28

FESOASOANI MO FAIAOGA

O lo o fa'aauau pea le tusi faitau o Eperu e pei foi ona i ai la tatou mataupu o le vaiaso na te'a nei. Sa tatou faasoa i le tulaga ese o Iesu i mea uma lava. O le faamanatu mo tagata Kerisiano Iutaia ia tumau pea lo latou faatuatua ia Iesu ma lana faaolataga.

I le ulutala o le mataupu lenei e 9 o lo o faapea mai “Ua faasiliga ese le tulaga o Iesu i a le tulafono.” O Iesu o le atoaga lea o le tulafono. O le afio mai o Iesu i le lalolagi, o le faamoemoe ia faamalosia le tulafono a le Atua ua maea ona tuuina mai mo ona tagata ina ia ola ma savavali ai. Aua o le faamoemoe o le Atua mo lona nuu na auina mai ai tulafono, ina ia amio lana fanau ia te Ia. O lona uiga o le tausī o tulafono o le ata vaaia o le amio Atua, o le faailoga o le

faalogo ma usita'i aemaise o le feagaiga ua uma ona osi e le Atua ma lona nuu. Peita'i tamaiti ua lape le savaliga a Isaraelu, ua le atagia le Atua i tu ma amioga a tagata Isaraelu ona o le agasala. O le faapogai lena o le feagai o Isaraelu ma faigata. Ua masani fo'i Isaraelu i so o se osigataulaga e fai mo latou Atua. O le taulaga o le faafetai, o taulaga mo le faamagaloga ma manaoga a le nuu. O faigataulaga e fai I manu pepeti ma lelei. Peitai ua lē talia ma ua lē toe fia silasila i ai le Atua. Talofa i le tagata ua vava-mamao ma le Atua ona o le agasala, ua le toe maua se leleiga. O le ala lena ua saili mai ai le Atua ina ia tapena le taulaga e silisili ona lelei ina ia laveaina lana fanau. Ua afio mai o Ia e ala i lona Alo pele o Iesu Keriso. Ua ia faamalagi lona toto e fai ma faamau faailoga o le feagaiga fou ua osia e Ia ma le tagata. O le toto lea o Iesu ua magalo ai agasala ae o le ata vaaia o le alofa faamaoni o le Atua ia i tatou ma le lalolagi atoa. O le toto o Iesu Keriso o le faamagaloga ua lava ma totoe mo tagata uma. Ioe le fanau e leai lava se isi alofa e sili i lenei alofa, o le Atua ua liu tino tagata e ala ia Iesu Keriso na ia tapena le faaolataga mo tatou le fanau agasala. E le toe faaluaina lea faaolataga le fanau. O le toto o Iesu o le atavaaia lena o le moni o lona alofa ia te oe ma a'u. ina ia taumagaloina i tatou uma ma toe avatu i tatou i ona manuia e faavavau.

GALUEGA FAATINO: Tusitusiga

Ia tusi sau **solo** faafetai ia Iesu ma le faaolataga ua ia tapena mo i tatou. Ia lua(2) fuaiupu o le solo, ta'i ono(6) laina. Autu: **O le toto o Iesu**

PESE: 360 (Pese ma Viiga)

A'OA'OGA:

1. E faamaoni le alofa o le Atua
2. O le toto o Iesu ua magalo ai tatou
3. E silisili ese le Atua.

.....

ASO SA: 27 IULAI 2025

MATAUPU: UA VAAI PETERU IA IESU, O LE ALO O LE ATUA SOIFUA (*Peters sees Christ, Son of the living God*)

SINI:

Ia malamalama le vasega, o Iesu ua afio mai i le lalolagi o le Alo lava o le Atua soifua.

TUSI FAITAU:

Mataio 16: 13 – 17

FESOASOANI MO FAIAOGA

O le nuu o Kaisareia Filipino, o le nofoaga na fausia e Herota le sili. Na fausia ai foi e lona atalii o Filipino le malumalu e fai ma tapuaiga i le tupu o le malo o Roma. Ua avea fo’i le malumalu e faailoa ai e Roma lona malosi i le lalolagi i ia vaitau. O lona uiga o le aai ua agai atu i ai Iesu ma ona so’o, e le faigofie auā o lo o faamalumalu ai le malosi faafitafita, tainane fo’i o le lotu Iutaia. Ai o le ala lea o le toe fesili o Iesu i ona so’o. Ua fai ane, “Pe a se upu a tagata ia te a’u nei, po o ai?” O le fesili o lo o atagia ai, o loo moomia e Iesu pe faape’i se tali atu a tagata i la latou galuega faaola. Ua tali le auso’o ia Iesu, fai mai o oe o Ioane le papatiso, o isi fai mai o oe o Elia , o isi oe o Ieremia poo se tasi o au perofeta. Ua fesili Iesu i lona auso’o, “ao outou na, se ā sa outou upu ia te a’u nei, po’o ai?” E foliga e faigofie le fesili, peitai e faigata ona taliina. Auā o le tali, o le molimau ola lena o lou soifua auaua ia Iesu.

Ua fesili Iesu i ona so’o “ao outou na, se ā sa outou upu ia te a’u nei, po’o ai?” Ua tali Peteru ia te ia, “Iesu o oe o le Keriso, o le alo o le Atua soifua”. Ua tali ane Iesu “Amuia oe Simeona, auā e le o se tagata na ia fa’aali atu ai ia te oe, a o lo’u Tamā o i le lagi.” Ese le maualuga o le vaai a Peteru ia Iesu. O le tautinoga lava lea o lona faatuatua ia Iesu o lo o auaua i ai. O le Keriso o lona uiga o lē ua faauuina, e fai ma faaola i le nuu. O lea ua faailoa mai e le Atua lana faaolataga i lona auso’o filifilia. O le tali a Peteru ua fetalai manino ai Iesu o le a ati ae lana Ekalesia i luga o lenei papa, e le mafaia foi e faitotoa o seoli ona manumalo i ai. O lona uiga ia faavae le ekalesia ia Iesu Keriso o le alo o le Atua soifua, o le papa malosi lena e taula i ai le faatuatua o lana fanau.

Ioe le fanau, ese le manaia o le tali a Peteru ia Iesu o lo la faatasi, “O oe o le Keriso, o le Alo o le Atua soifua. Ae o le a sa tatou ia molimau ia Iesu poo ai? E le o se tagata na ia faailoa ia Peteru, o le Atua na ia faailoa . E faapena foi tatou le fanau, a faamaoni lo tatou faatuatua i le Atua e mautinoa na te faailoa mai fo’i mea sili mo i tatou. Ia tatou mulimuli pea ma le onosai ma le faamaoni ina ia tatou maua atili pea faamanuiaga eseese mai le Atua. O le Keriso lea o le alo o le Atua soifua lea lava na Ia faia le faaolataga mo le lalolagi agasala ina lavea’iina ma faasa’oloto. O le papa malosi foi lea e taula i ai lo tatou faatuatua ma fai ma faavae malosi o le tatou Ekalesia ina ia tumau ma manuia ai e oo i le faavavau.

GALUEGA FAATINO: Faasoā Manatu

Ia faatalatalanoa le vasega e uiga i le fesili a Iesu na fai i lona auso’o “A o outou pe se a la outou upu ia te a’u po o ai?” Ia tatala le avanoa i le vasega e tali lava le tamaititi ia e fua i lona silafia poo ai Iesu?

PESE: 74 (Pese ma Viiga)

A’OA’OGA:

1. O Iesu o le Keriso
2. O Iesu o le Alo o le Atua soifua.
3. O Iesu le papa e manuia ai o tatou olaga, pe afai e taula ia te Ia lo tatou ola.

.....

ASO SA: 3 AOKUSO 2025

MATĀ’UPU: O IESU LE ALI’I (*Jesus is Lord*)

SINI: Ia malamalama le Vasega, ua na ‘o Iesu le Ali’i tatou te Fa’aolaina ai, e ala i lo tatou fa’atuatua.

TUSI FAITAU: Roma 10: 6 – 17

FESOASOANI MO FAIA’OGA:

O le Tusi lenei a Paulo i Aiga Lotu i Roma, o lo ‘o afifi mai ai se fe’au Fa’a-Matā’upu Silisili fa’apea: “**Justification by Faith alone**”, (*Ta’uamiotonuina i le Fa’atuatua*). O le fa’afitauli tele lea na feagai ma le Aposetolo i lana tala’iga i Nu’u ‘Ese, o le fete’ena’i o le Tala Lelei o lo ‘o ia taumafai e tala’i atu, ma le talitonuga o Kerisiano Iutaia. O le ālā tupu fo’i lea o le fe’ese’esea’iga i le va o Kerisiano Iutaia ma Kerisiano Nu’u ‘Ese. Fai mai le talitonuga o Kerisiano Iutaia, “*ua na ‘o i latou lava o e na tupuga mai ia Aperā’amo, e ta’ua o tagata o le Fa’aolataga. A fia fa’aolaina la se tagata o Nu’u ‘Ese, e tatau ona latou uia muamua ala o le tūlāfono e pei o le peritomeina, ona fa’ato’a avea lea ma tagata o le Fa’aolataga*”.

A’o le tusi faitau o lenei Aso Sa tamaiti, o lo ‘o fa’ailoa mai ai e Paulo le ‘ese’esea o le Fa’aolataga e maua i le tūlāfono, ma le Fa’aolataga e maua i le Fa’atuatua. Lea e fa’atāua ai e Paulo IESU ua fa’alupeina O LE ALI’I,

pei ona fai ma tatou matā'upu o lenei taeao. O le **Fa'alupeina o Iesu o Ia o le Ali'i**, e fa'asino tonu i lona natura pa'ia ma lona tulaga Fa'a-Tupu, ma le pule silisili 'ese ua ia te Ia. Le pule na Ia faia ai fa'amālōlōga, tutuli ai tēmoni, toe fa'atutū ai e na oti, ma le pule na Ia fa'amagaloina ai le lalolagi agasala. O lona maliu tāua ma lona toetu manumālō mai le oti ma le tu'ugamau, ua fa'aolaina ai le lalolagi uma. O lona uiga, o le fa'alupeina o Iesu o Ia o le Ali'i, o le fa'ailoga ua Ia mafatōtōga i mea uma, auā ua fa'atamao'aigaina e le Atua i lona tumu atoatoa.

Lea la e atagia i upu a Paulo pei ona i ai le tusi faitau o lenei taeao lea manatu. A tatou fai se aotelega o le faitauga i lenei taeao, fai mai Paulo, **o le Fa'aolataga po 'o le fa'aolaina o le tagata, tau lava ina fa'atuatua ma talitonu ia Iesu le Ali'i, na toe fa'atuina mai e le Atua mai le oti ma le tu'ugamau.**

E fa (4) lava mea tāua o lo 'o tā'ua e Paulo i le faitauga, tatou te maua mai iā Iesu le Ali'i.

1. O le Fa'aolataga e lē tau sa'ilia i se mea mamao. O lo 'o latalata mai lava. O lona uiga, e faigofie ona tatou maua. Fai mai Paulo, **tau a ina fa'atuatua i le Ali'i o Iesu**. E lē mana'omia ni galuega a le tūlāfono pei ona manatu ai Kerisiano Iutaia. (*fuai'upu 6-8*)
2. E fa'aolaina le tagata e lē gata o le ta'uta'u i le gutu o Iesu le Ali'i, a'o le fa'atuatua fo'i i le loto. (*fuai'upu 9*)
3. O le Fa'aolataga na saunia e Iesu, e lē fa'apito mo na 'o ni nai tagata pei ona manatu a Kerisiano Iutaia, ae ua avanoa ai mo tagata uma e talitonu, fa'atuatua ma talia o Ia. (*fuai'upu 10-13*)
4. Fa'atāuina ai e Paulo le taulogologo pea o le Tala Lelei i tagata uma e tupu ai lo latou fa'atuatua. E tatau fo'i ona latou fa'alogu muamua i le Tala Lelei. (*fuai'upu 14-17*)

Tamaiti o se fa'amanatu fo'i lea o le Tala Lelei mo i tatou i lenei taeao, tatou te lē tau o i fea e sa'ili lo tatou Fa'aolataga. Leai, lea lava e latalata mai, o lo 'o i lou gutu ma lou loto, tau lava ina fa'atuatua iā Iesu le Ali'i. Ia 'aua nei augata ma musu, e ta'uta'u atu, fa'asoa atu ma fa'aailoa ai i isi lo tatou Ali'i o Iesu. Ia lē gata fo'i ina ta'utino atu, ae ia tatou fa'atuatua ma talia Iesu i o tatou loto. E na 'o Iesu lava lo tatou Ali'i tatou te maua ai le Fa'aolataga.

GALUEGA FA'ATINO:

- Vaevae le Vasega i vaega se 4.
- Vaega 1- Fuai'upu 6-8

- Vaega 2- Fuai'upu 9
- Vaega 3- Fuai'upu 10-13
- Vaega 4- Fuai'upu 14-17
- Fa'amatala au'ili'ili le uiga o fuai'upu i sona feso'ota'iga i le tatou Matā'upu, fa'atasi ai ma ni a'oa'oga e maua mai ai.
- Tu'u le avanoa i vaega ta'itasi e fa'amatala ai le latou taumafaiga.
(O le fa'amoemoe o lenei galuega fa'atino, ia si'itia ai le malamalama o le fanau i le Matā'upu ma lona feso'ota'iga i le Tusi Faitau.)

PESE:

Fa'atuatua, fa'atuatua i le Ali'i

Fa'atuatua, Fa'atuatua i le Ali'i
 O le uo moni e lē fa'afiti
 Tusa lava po 'o a ni ou mafatiaga
 Iesu e maua ai lou ola.

Tali: Pese, pese i le susulu o le la
 Pese, pese pe 'a pogisa
 I taimi (i taimi) o le ola (o le ola)
 Pese, pese, pese, pese pese, pese pea....

A'OA'OGA:

1. Ia ta'uta'u atu o Iesu le Ali'i ma tatou fa'atuatua i ai ona fa'aolaina lea o i tatou.
2. 'Aua le manatu fa'apito, ae ia alofa i so'o se tagata.
3. E fiafia Iesu e fa'afofoga i so 'o se tagata e vala'au atu i lona Suafa.
4. Ia tatou fiafia e fa'alologologo i le tala ia Iesu, e tupu a'e ai lo tatou fa'atuatua.

.....

ASO SA: 10 AOKUSO 2025 (ASO SA O TAMĀ)

MATĀ'UPU: AMOINA O TATOU SATAURO
(Carrying our cross)

SINI: Ia malamalama le vasega, o le avea ma so'o o le Ali'i, e lē faigofie lona fa'atinoina.

TUSI FAITAU: Luka 14: 25 – 35

FESOASOANI MO FAIA’OGA:

O le *Amoina o tatou satauro*, o se fuaitau o lo ‘o aumai i le gagana fa’a-fa’atusa, e fa’amatalaina ai le lē faigofie o le fa’atinoina o le *Avea ma So’o (Discipleship)* o le Ali’i. O se galuega e mana’omia le tu’u atoa i ai o lou tagata atoa i le tino, mafaufau, ma le agaga.

Fai mai le tala a Luka, ua to’atele le motu o tagata ua mulimuli atu iā Iesu ma ona so’o. Silafia lelei e Iesu, o le to’atele o ‘i latou nei, e lē ‘o moni lo latou mulimuli ia te Ia. O nisi o lo ‘o mulimuli, e lē o le fia fa’alogo i lona a’oa’o mai, ae o le manatu atonu e maua ai se tamao’aiga tele pe ‘a mulimuli ia te Ia. O nisi fo’i o lo ‘o mulimuli ona o le fia ‘a’ai, ma isi lava mafua’aga.

Lea la na āfua ai ona a’oa’o atu Iesu iā te i latou pei ona i ai le tusi faitau o lenei taeao, e uiga i le avea ma ona so’o. E tolu (3) lava vaega tāua o lo ‘o fa’amalamalamaina ai e Iesu le uiga moni o le ave ma so’o.

1. O le avea ma so’o, ia fa’amuamua lava Iesu nai lo isi mea uma.

(Fuai’upu 26) ‘Afa’i e sau se tasi ia te a’u, ae lē inoino i lona tamā, ma le tinā, ma le avā, ma le fanau, ma uso, ma tuafāfine e o’o lava i lona ola, e lē mafai ona fai o ia mo’u so’o.’ E lē o le uiga o le fetalaiga a Iesu, ua lē tāua ia te Ia so’otaga fa’a-le-tagata. Na te lē ‘o fa’aleaogāina fo’i le tāua o mafutaga pele ia i le olaga o le tagata. A’o le uiga moni o lona finagalo, o le mulimuli ia te Ia, e tataua ona fa’amuamua o Ia nai lo isi so’otaga, faiā ma mafutaga e pele i le ola o le tagata. Ia sili atu Iesu nai lo mea sa fīafia ai i le olaga nei. E mana’omia fo’i le fa’amaoni e fa’atinoina ai lona vala’auina.

2. E tataua ona malamalama lelei le tagata i a’afiaga pe ‘a avea ma so’o.

E lua (2) fa’ataoto po’o tala fa’a-fa’atusa na fa’amatalaina e Iesu, e fa’amalamalama ai le tataua ona malamalama lelei o le tagata i le tulaga e o’o i ai pe ‘a avea ma so’o. (1) E tataua i le tufuga ona fuafua lelei le tau o le galuega a ‘o le ‘i amataina, ne ‘i fai fai lē mā’ea. (2) E tataua fo’i i le tupu ona va’ai lelei, pe mafai ona ia fa’ato’ilaloina lona fili e sili atu ona to’atele lana ‘au tau nai lo ia. O le fa’amoemoe o Iesu mo le tagata e fia avea ma so’o, ia malamalama lelei e lē o se ola e faigofie. Ia mafai ona ia taliaina fa’afitauli ma lu’itau o le mulimuli ia Iesu. Ia tumau pea i le Ali’i tusa lava po’o a faigata e la te feagai.

3. Ia fa'afitia mea uma.

Na fa'ai'u e Iesu lana fetalaiga, 'so 'o se tasi e lē lafoa'i ana mea uma, e lē mafai ona fai o ia mona so'o.' (fuai'upu 33). O le tagata e mulimuli iā Iesu, e lē toe tepa i tua i le lalolagi ma mea fa'afiafia o i ai, ae ua tu'utasi lona fa'amoemoe iā Iesu Keriso. O le ave'ese po'o le tu'uese o mea sa masani ai, ae fa'asaga e fai le finagalo o le Atua.

Tamaiti i lenei taeao, o le lē faigofie lea ona tatou amo o tatou satauro mo Iesu. Aisea? Ona o mea ia pei ona tā'ua i luga, tatou te lē manana'o i ai. E sili atu lava i lē isi tamaitiiti tu'inanauga o le lalolagi nai lo le fiafia e faitau i le Tusi Pa'ia. E sili atu lava i lē isi, le tafao nai lo le to'aga mai i le Aoga Aso Sa. O mea ia lea e finagalo Iesu, ia ave'ese, ona fai lea o i tatou mona so'o. Ona iloa ai lea, ua sa'o la tatou fa'amuumua, ma mafai ai ona tatou ola i totonu o puapuaga o **lenei olaga**.

GALUEGA FA'ATINO:

- Vaevae le Vasega i vaega se 2.
- E lua (2) Fa'ataoto na fa'amatalaina e Iesu, e fa'amalamalama ai le isi uiga o le avea ma so'o.
- Vaega 1- Fa'ata'oto i le Tufuga.
- Vaega 2- Fa'ata'oto i le Tupu.
- Fa'amatala le uiga o le Fa'ata'oto ma sona feso'ota'iga i le tatou Matā'upu, ma ni a'oa'oga e maua mai ai.
- Tu'u le avanoa i vaega ta'itasi e fa'asoa ai lo latou malamalama.

PESE: Pese ma Vi'iga 40. (A 'ou manatu ifo nei i le satauro o Iesu)

A'OA'OGA:

1. O le avea ma so'o o le Ali'i, e lē o se olaga faigofie.
2. Fa'amuumua Iesu nai lo mea tatou te manana'o i ai.
3. 'Ave'ese mea uma o lo 'o tatou fiafia ai, ae fai le finagalo o le Atua.
4. Ia atoatoa lou taumafai mo le Atua.

.....

ASO SA: 17 AOKUSO 2025

MATĀ'UPU: O LE FINAU MAUA'I O LE FAFINE UA OTI LANA TANE (*The persistent widow*)

SINI: Ia malamalama tamaiti, i le itū'aiga tatalo e tatau ona tatalo ai i le Atua.

TUSI FAITAU: Luka 18: 1 – 17

FESOASOANI MO FAIA'OGA:

O le tusi faitau o lenei taeao tamaiti, o lo 'o momoli mai ai se fe'au fa'amalosi'a u a Iesu, **ina ia tumau pea i le tatalo, ae 'aua le fa'avaivai.** O le tatalo lava ia, o le 'aupega lea a le kerisiano e feso'ota'i atu ai i lona Atua. Ae foliga mai i le fa'amalosi a Iesu, 'ai ua fiu le tatalo; po 'o le mea 'ea ua lē fia fa'afofoga le Atua i tatalo a lana fanau; po 'o ua tuai fo'i le tali mai a le Atua i mana'oga a lana fanau.

Lea la na ia fa'amatalaina ai le Fa'ataoto muamua (*fuai'upu 1-8*), se 'i fa'ailoa atu ai i lona au so'o ma e na mulimuli ia te ia, le itū'aiga tatalo e tatau ona latou tatalo ai. O le fa'ata'oto i le fafine ua oti lana tane, sa ia matuā finau atu i le Fa'amasino amiolētonu, ina ia fa'amasino atu i lē ua i ai ana mea.

O le fafine ua oti lana tane, o le tagata e lē taualoa, e lē amana'ia, e fa'asinosinomia, e maualalo lona tulaga i totonu o le sosaiete o tagata Iutaia. Peita'i, tusa ai ma le fa'ata'oto, e lē 'i aveva lea ma mafua'aga na vaoia ai o ia, mai lona finau atu i le Fa'amasino e tusa ma lona mana'o. A'o le itū'aiga finau lea na finau ai le fafine. O le finau maua'i; o le finauvale; o le talosaga so'o; o le tatalo pea; o le tatalo fa'atauana.

O le Fa'amasino na talosaga i ai le fafine lenei, e ta'ua o le Fa'amasino amiolētonu. Fai mai le tala a Luka, e lē mata'u i le Atua, e lē ava fo'i i tagata. O le mea mautinoa lava la, na te lē taliaina le talosaga a si nei fafine, auā o ia o le fafine ua oti lana tane. Peita'i, o le finau pea ma le finauvale o lenei fafine, na i'u ai lava ina talia e lenei Fa'amasino lana talosaga. O lona uiga, e lē'i taliaina ona o le fa'amasinoga tonu a le Fa'amasino, ae ona o le finau tele ma le finau maua'i o lenei fafine.

Lea la o lo ‘o momoli mai ai se fe’au tāua i le ‘au fa’atuatua, ina ia tatalo pea, ae ‘aua le fa’avaivai. ***O le fesili fa’atupu manatu: afai o lea na talia e le Fa’amasino amiolētonu le talosaga a le fafine ua oti lana tane, ona o lona finafinau, e lē sili atu ‘ea ona tali mai le Atua, o Lē amiotonu ma alofa, i tatalo a ona tagata?***

O le fa’ata’oto lona lua (2) na fa’amatalaina e Iesu, o lo ‘o aumai ai fo’i lē isi itū’aiga tatalo e tatau ona tatalo ai le tagata fa’atuatua, o le tatalo ma le loto maualalo (*fuai’upu 9-14*). E lua (2) lava itū’aiga tatalo o lo ‘o fa’ailoa mai ai. (1) O le tatalo a le Faresaio, ua fa’aalia ai lona loto ua tumu i le fa’amaualuga, ma le va’ai maualalo i lē isi uso. (2) O le tatalo a le Ao Lafoga, fa’aalia ai lona loto maualalo, ua ia ta’utino ai o ia o le tagata agasala, ma lona mana’omia o le Alofa Tunoa o le Atua.

Ae mulimuli ane, ua fa’atusa e Iesu i tamaiti i latou e sao atu i Mālō o le Atua (*fuai’upu 15-17*). Aisea le tamaitiiti? O le tamaitiiti e loto maualalo, loto mamā ma ola fa’alagolago. E faigofie ona ia talia mea o lo ‘o a’oa’oina ai o ia, nai lo le tagata matua e masalosalo ma tete’e. O lo ‘o momoli mai ai pea se fe’au, i le loto ma le amio e tatau ona amio ai le tagata tatalo.

Vasega Matutua i lenei taeao, tatou te tatalo uma lava. Peita’i, e i ai lava le tatalo e fa’afogaina e le Atua. O le tatalo lea mai le loto. O le tatalo fa’atauanau. O le tatalo ma le fa’atuatua, e tali mai lava le Atua, pei o le finau maua’i a le fafine ua oti lana tane. O le tatalo ma le loto maualalo pei o le Ao Lafoga, ma ia uiga e pei o le tamaitiiti. O le mea moni lava, o lo ‘o fa’afogaina e le Atua a tatou tatalo, auā e lē o se Atua o tau mamao ma tatou, o lo ‘o Ia fa’atasi mai pea. Na te tali mai e tusa ma lona lava finagalo i o tatou mana’oga.

GALUEGA FA’ATINO:

- Ia fa’atalatalanoa le Vasega ma fa’asoa, po’o le a le tatalo fa’atauanau po’o le tatalo ma le loto atoa.
- Fai se sa’ili’iliga i le tusi pa’ia, ni tagata na tatalo fa’a’pea, ae na talia e le Atua.

Fa’ata’ita’iga:

O le tatalo a Hana (*1 Samuelu 1: 9-20*)

O le tatalo fa’ato’ese a Tavita (*Salamo 51*)

O le tatalo a Solomona (*1 Tupu 3: 5-14*)

O le tatalo a Ne'emias (*Ne'emias 1: 4-11*)

O le tatalo a Iesu i Ketesemane (*Mataio 26: 36-39*)

PESE: Pese ma Vi'iga 190. (Lē Fa'afofoga Tatalo e)

A'OA'OGA:

1. Tumau i le tatalo, ae 'aua le fa'avaivai.
2. Ia tatalo ma le loto, e tali mai lava le Atua.
3. Ia lagona le loto maualalo, ae lē o le fa'amauualuga.
4. Ia maua ola finafinau i mea lelei.

.....

ASO SA: 24 AOKUSO 2025

MATAUPU: FAAMALOSI I Ĕ UA LOTO MAFATIA
(*Encourage the dishearted*)

SINI: Ia malamalama le vasega o le alofa ma faasoa atu i tagata loto mafatia, , o le finagalo lea o le Atua mo i tatou ua talia Iesu.

TUSI FAITAU: 1 Tesalonia 5:12 – 18

FESOASOANI MO FAIAOGA:

A lagona le mafatia, e manaomia le faamalosi ma le faalototele. E afua ona mafatia, ona o i ai se mea o mamafa i le loto. A o le natura lea o le Atua, o le Atua alofa. O le Atua faamalosi. Ae faapefea ona faamalosia le tagata loto mafatia ina ia malosi? O le fefaasoai i mataupu e ola ai le agaga o le tagata ma ia faalauiloa le faatuatuaaina. Faapena le faamalosi a le aposetolo o Paulo i le Ekalesia i Tesalonia. O se aai e le gata ina manuia ona laueleele, ae faapena foi i ana oloa e faatau atu ma faatau mai.

O uiga o upu a le aposetolo i a Tesalonia, ia maua e tagata uma le loto onosai. O le lagona e iloa ai e le isi tagata lagona o le isi, ia malamalama le talavou i uiga ma saunoaga a lē ua fai ma taitai. Ia faamafanafana i e o faavaivai, ma faamalosia'u i ai ae aua le tau i ai e se tasi se leaga. O la Paulo ia Tesalonia; Ia outou talia o outou taitai; o mea alofa na a le Atua aua lana Ekalesia i nuu

taitasi. O lo o ia i latou le aiatatau faaleagaga mai le Atua; e le o ni taitai pule faafitafita, ae o taitai e fai ma faataitaiga o mea lelei mo tagata o le Ekalesia. Aua le faavaivai e apoapoai atu i e amio faatalanoa; faamafanafana i e loto iti; fesoasoani i e vaivai, ma ia outou onosai i tagata uma. Aisea? Aua e auina atu outou, i le va o manu feai. Aua le tau i ma sui i mea leaga, ae ia tausisi i mea moni. Le malosi lena e mafai ai ona fa'auau le galuega. Silafia lelei e Paulo faafitauli faale-tagata ua tutupu mai i Tesalonia, ua vaivai ai le ola faatuatua o tagata ona o talaiga sese ua i Tesalonia, lualuagia ai manatu o tagata i le Tala Lelei ma ana galuega alofa ua fai.

Le fanau, o a lava mea e tutupu i lo tatou soifua ma le ola taumafai ia lava le onosai. A lē onosai ona lē tauia lea o le tatou galuega faamafanafana mo le isi ou uso. Onosai i mea fai, onosai i mea e mafatia ai, faamalolosi e faatino lo tatou ola ofoina mo Iesu. O le malosi lea, e liua mea faigata e avea ma mea faigofie, e faamalosi loto ua faavaivai ma faaloto-teleina lē ua fiu gofie.

GALUEGA FAATINO: Fesili ma Tali

1. O le a se tali a le Ekalesia i Tesalonia i le faamalosi a Paulo?

Tali: Ia tausisi le filemu ma ia ola faaloalo i taitai o le Ekalesia

2. O le a se galuega lelei o loo faia e le Aposetolo?

Tali: Tatalo/Faamalosi

3. Faapei ona tatou faia se galuega mo isi?

Tali: Fesoasoani/Alofa/Faasoia ma le fiafia.

PESE: Pese ma Viiga 175

A'OA'OGA:

1. Ia faatino galuega lelei.
2. Ia maua le loto fesoasoani.
3. Faamalosi i lau galuega.
4. 'Aua le amanaia upu sese mai i isi tagata

.....

ASO SA: 31 AOKUSO 2025

MATAUPU: O TOA FAALEILOGA (*Unsung heroines and heroes*)

SINI: Ia malamalama le vasega, o le Kerisiano e toa le loto e auauna ai mo isi tagata ma le Tala Lelei, e tauia ma faamanuia i ai le Atua.

TUSI FAITAU: 2 Tupu 4:8 – 17

FESOASOANI MO FAIAOGA:

E tele ma anoanoai faalupega o tina ma tamaitai o lo o atagia ai le tulaga lē amanaia o tina i sosaiete. E pei o le upu itupa vaivai, o lo o atagia ai le leai o se malosiaga o lo o i ai. Le galuega faatina e le manao i se mea ae faaletonu i le silasila. Le tina e tapena i le atoatoa e gata ai le malosi. Le tinā e le faalogologotiga, e galue punoua’i mo le siomiaga o le aiga, leitioa foi upu a le atunuu e faapea, “e tapena faafafine toaga” Faapena le faitauga o lenei aso, o le tina loto toa e leai se igoa o taua, ae ua lava lana amio tausaaafia ma le fa’aalalo ma lana galuega talimalo e tau mai ai lea foi toa alofa o le Tala Lelei.

O se tasi aso, na pulunaunau ai le tamaitai Sunema e talimalo i le perofeta o Elisaia ma lana auauna ma ia ta’u atu i le perofeta, o ia o se tagata ola mata’u i le Alii. Atonu na iloa e lenei tamaitai Elisaia peitai e le i tuua ai se galuega fesoasoani e faia ai se mea sili mo isi. O le faatinoga o tiute faaleiloga o lenei tamaitai i lo la va fesootai ma auauna a le Atua, e iloa ai nafa tausii faatina e lē manao i se mea ae faaletonu i le silasila. Pe lē ua lava lea e ta’u mai ai le telē o le tāua o le tautua faasoo, tautua faaperofeta po o le tautua faatina i totonu o aiga ma Ekalesia.

O le mea moni le fanau, na lagona le fiafia o lenei tinā, auā ua le gata ina ua faamalieina le galala o Elisaia ma Kiasi, ae ua toe faamanuiaina i sana tama ina ua ta’u i ai e Kiasi, o le tamaitai e leai sana tama ma ua toeaina foi lana tane. Poo le a le vaivai ma le tofotofoina ai tatou i mea uma, o lo o i ai lava faatasi le Atua ma i tatou. Aua tatou te vaai mauualalo po o ai lea ma lea, a ia tatou faia faapei o le galuega na faatino e lenei tamaitai faaleiloga, ae ua mataina ma faamaupue e le Atua lana tautua.

GALUEGA FAATINO: Tali Fesili

1. O ai le igoa o le perofeta sa ta'ua i le tatou tala?

Tali: (Elisaia)

2. O fea sa i ai le toalua o le tamaitai Sunema?

Tali: (Fesoasoani i lona toalua)

3. O le a le tau i o le galuega a lenei tamaitai?

Tali: O le a ia fanauina sana tama

PESE: 380

A'OA'OGA:

1. Fai se galuega alofa mo isi.
2. E lavea'i mai le Alii i o tatou tigā.
3. E tauia e le Atua au galuega.

.....

ASO SA: 7 SETEEMA 2025.

MATAUPU: TAUTOGA A HANA (*Hannahs vow*)

SINI: Ia malamalama le vasega, o le olega ma le tautoga a Hana i le Alii, sa faia lava ma le loto atoa, ina ia tali mai le Atua i lona fia maua o sana tama tane.

TUSI FAITAU: 1 Samuelu 1:1 – 18

FESOASOANI MO FAIAOGA:

O le upu tautoga, o se mea ua ta'uina atu o le a maua, tutupu pe taunuu foi i le humanai. E foliga e faia o se feagaiga e matuā faamaoni lona taunuuga, o a lava foi faafitauli e fetai ai, e taumafai pea ia taunuu. Tasi lenei o meaalofa a le Atua i le tagata soifua, o le ola lea ma le faamoemoe i mea o'i le humanai. Aua o le iai o le faamoemoe, o le u'unaina foi lea o le tagata e agai pea i luma, tusa lava poo le a le faifai o tagata, po o a foi fitā e fetai ai.

E foliga faapea le tala mai le Feagaiga Tuai. O le saili atu a le tagata i lona Atua mo se fesoasoani. O le tala i le tauiviga a Hana ma ona tiga, i le faalili ma le

faa’ono’ono, o le tauemu ma le taufaaleaga a lona fili, fai mai ua lē fanau ona o le pule a le Atua. E ui lava ina e ese auala a le Atua sa momoli ai se matagofie i le loto o Hana, ae ua manatu Penina, o Hana o le fili o le Atua. Ma le manatu o tagata, ua tuulafoaina o ia e le Atua.

Atonu na matua faanoanoa Hana, ona ua le mafai ona faamalieina lona manao. Ua leai se isi e fesoasoani i ona puapuaga. Talofa i lenei tina, ua matuā uma lava lona faamoemoe. Ua leai lava se isi sulufaiga, na’o le Atua lava. A lea ua tatalo faatauana, ua tagi atu i le Atua ma le loto mafatia, “Ia e foai mai i lau auauna fafine se tama tane, ona ou foai atu lea o ia i le Alii i aso uma o lona ola, e lē oo foi se tafi i lona ulu”

O le tigā i le faalili, o lo o faatusaina i le tigā o se fafine ā fanau. A tuu la i se isi uiga, lona uiga, o le faalili a Penina, o loo faatiga ai Hana ina seia fanau. E matua mataina ma faamomoloto aga a lenei fafine loto manu’a. Lona faato’ato’aina o lo la va ma lē na ita ia te ia. Aua e le i tali e Hana se upu o le faaonono. E le i ita foi i lē na faalili ia te ia. E le i iai foi sona manatu e faatupu se vevesi, ae na lolo uma i le onosai ma le loto mauualalo, ma le naunau ina ia tausī pea le vā lelei ma le-isi. O le Atua tali manao. O le Atua e faafofoga i manaoga o lana fanau, e faapena foi ona tali fa’aaliali mai i ai. E tali lava le Atua i le olega ua faia ma le faatuatua. Feau lea mo tatou, o totonu o le matuitui ma le ogaoga o ona tiga, na valaau a’e ai i lona Tama ina ia faamagalō atu. Na māmā ia te Ia tiga, ona o le Olioli o lo o i tua atu. Lea lava na fanau mai e ona tiga lo tatou faaolaina. Ua tatou Olioli uma ai e faavavau e faavavau lava.

GALUEGA FAATINO:

Fetufaa’i le vasega i le fesili lea.

“O le a sau tautoga na fai ma le Atua?

***Faataitaiga:* E fia avea a’u ma faiaoga**

PESE: 48 Pese ma Viiga

A’OA’OGA:

1. E leai se mea e faigata i le Atua.
2. E ofoofogia mea e faia e le Atua.
3. Na faia e le Atua mea uma.
4. ‘Aua le ola tusitusilima.

.....

ASO SA: 14 SETEMA 2025

MATAUPU: UA FOUVALE SAULO (*Saul rebels*)

SINI : Ia malamalama le vasega, e le o se mea lelei le fouvale po o le ola tetee, ae faataua le ola faalogo ma usitai i le Atua ma lana faasinoga e manuia ai.

TUSI FAITAU: 1 Samuelu 13 : 5 - 15

FESOASOANI MO FAIA’OGA:

O le tatou mataupu ua aumai mo i tatou i lenei Aso Sa e faapea; ‘Ua fouvale Saulo.’ O le vaitau lea a o avea Saulo ma tupu o Isaraelu a o le tulaga faaaauaina pea o le vatau ai o Isaraelu ma Filisitia.

Peitai ua tapena e Saulo le tupu le autau a Isaraelu e tolauapi ma le nuu uma o mulimuli atu ia te ia i Kilikala. A o lea ua matauina e Saulo le toatele naua o le autau a Filisitia, o kariota ma e titie i solofanua, faapea tagata pei o le oneone o le matafaga, o lo o ua tolauapi nei i Mekemase i gagae o Petavene. O le faafitauli la ua tulai mai ua le mautonu Isaraelu ma ua faapena ona atuavale le nuu uma. O le ala lea ua lalafi ai nisi o le nuu i ana nisi, o le vao talatala nisi ma gaoa, o olo maualuluga ma lua nisi o i latou. O le faailoga o le leai o se faamoemoe aua ua matata’u ma fefefe ia Filisitia.

O le ala lea ua manatu ai Saulo, ua le toe manatu i se fesoasoani ma se fautuaga mai le Atua; peitai ua fai lana lava ia faaiuga e ala i le fai loa o le taulaga mu ma se faafetai. Ua uma ona fai o le taulaga mu a e oo atu loa Samuelu ma ia faafetaia’i ia te ia ma ofo atu ia te ia. Ua lagona le faanoanoa o Samuelu i lona faapea atu; Se a lau mea ua fai na? na tali Saulo “Na ou vaai, ua taape le nuu sa ia te a’u, ma oe foi ua e le sau i aso na atofaina mai, ma ua faapotopoto Filisitia i Mekemase.” Ua manatu Saulo o le a oo mai Filisitia ma siitau mai, ua afua ai ona fai le taulaga mu. O le tali a le tagata ua faamuamua lona loto ae tuu le finagalo o le Atua. O le ata o le tagata lē usitai ma lē mata’u i le fetalai mai o le Atua i le tulaga e tatau ona usitaia ma faalogo i ai. O le faailoga lava lea o le fouvale o le tagata i le Atua ma tetee atu aua ua le faalogo ma usitaia le faatonuga mai le Atua e manuia ai mea uma.

O le a le tali o le tagata fouvale? Ioe, o le tali lava lea na folafola atu ai e Samuelu ia te ia. “Ua e valea i le mea ua e faia, ua e le tausia le poloaiga a le Alii lou Atua na ia poloai atu ai ia te oe; aua na fai a faatumauina nei e le Alii o lou malo

ia Isaraelu e faavavau. A o lenei, e le tumau lou malo; ua sailia e le Alii se tagata e tatau ma lona finagalo.” Lea la ua tu’u lava e le Atua Saulo i se tulaga maualalo ae filifilia ai e le Atua ia Tavita e avea ma tupu mulimuli ane ai.

Ioe, o le feau lena o le Tala Lelei ua aumai mo i tatou le fanau i lenei Aso Sa. E le o se mea lelei le fouvale o le tagata i le Atua. po o le a le maoa’e o le potu ma le iloa ua maua e se tama po o se teine i lenei lalolagi, po o le a foi le mamalu ma le tamaoaiga ua maua e se tagata ae a aunoa loa ma lè ola mata’u i le Atua ma lana faasinoga mana, e valetuulima mea uma i lona olaga. E mautinoa e i’uvale ona faamoemoega uma ma mea e i ai i lenei ola. O lona uiga, e tatau lava ona ola mata’u o so’o se tagata i lenei lalolagi i le Atua; ia faalogo ma usitai pea i le fetalai mai o le Atua. O le faasinoga ma le faatonutonu mai e le Atua o mea uma tatou te fai, e pei o tofiga ma valaauina eseese e auauna ai mo le Atua, o le mea aupito sili lena ona taua ma faasili i loto ma mafaufau o soo se tasi. Aisea? Auã o le ala lena ma le faavae mausali lena e ao ona uia e i tatou uma, ina ia mafai ai ona tatou faia ai mea uma e tusa ma lona finagalo alofa, ina ia i’u lelei ma faamanuia mai i ai le Atua ia i tatou.

O le upu moni le fanau e, o le fouvale o se tagata i le Atua pei o Saulo, e le o se mea lelei. O le tasi lava lea uiga a le tiapolo e fano ma i’uvale ai le ola taumafai o i tatou ma le agai atu i le lumanai o le olaga oloo tatou tausinio ai.

O Iesu Keriso le Alo o le Atua na afio mai i lalolagi e lavea’i ma faaola le tagata agasala ona ua le faalogo ma usita’i i le Atua talu le ulua’i tagata. Na faalogo ma usitai lava i lona Tama i mea uma na poloa’iina ai o ia e faataunuu ma faatino aua le galuega o le faaolataga. Na alu lava ma le faalologo i le loloto o puapuaga ma faigata, ina ia maliu ma toetu manumalo mai le oti ma le tuugamau, ina ia ola ai i tatou i lona alofa tunoa tele ma maua ai e i tatou uma le Ola faavavau faatasi ma Ia.

GALUEGA FA’ATINO:

Fa’aaliga manatu : Faaali mai sou manatu e tusa o le ‘Fouvale’ pei ona aumai i le mataupu.

PESE: **Faalogo ma usitai e leai se isi ala.**

A’OA’OGA:

1. Ia faalogo ma usitai i matua aemaise le Atua le ala e ola ai.
2. Ia ogatotonu le Atua i lou olaga atoa
3. ‘Aua le ola fouvale pe tetee i mea lelei e fai e isi tagata.
4. Faailoa ma tala’i atu le **ola mata’u i le Atua** i lou aiga ma lou nuu.

.....

ASO SA: 21 SETEMA 2025

MATAUPU : **PALENI MEA UMA** (*Everything in balance*)

SINI : Ia malamalama le vasega, e tatau ona paleni mea uma i le olaga o le tagata.

TUSI FAITAU : Failauga 3 : 1 - 8

FESOASOANI MO FAIA’OGA

O le mataupu ua aumai mo i tatou i lenei Aso Sa e faapea; **‘Paleni mea uma.’** O le talitonuga lautele, e mafai ona paleni mea uma i le olaga o le tagata pe afai tatou te maua le ola aoaoina lelei i le poto salalau i mataupu eseese, e faavae i luga o le lalolagi ma le foafoaga paia ua aumai tatou te ola ma fiafia ai i aso uma ma taimi uma. O lona uiga, e le mafai ona tatou maua le paleni o mea uma, pe afai tatou te le malamalama ma le iloa lelei le gasologa o le olaga ma mea o tutupu ai. O o tatou manaoga tau le ola ma galuega tatou te fai, e ao lava ona i ai le tu’u faafeagai ai o mea uma ina ia faatumauiina le paleni lea o mea uma. O lona uiga, o faiga ma fuafuaga a le Atua i le ola ua ia aumai mo le tagata, e paleni lava mea uma; o lo o i ai le lelei ma le matagofie, o i ai le ola, le filemu ma le manuia o le Atua.

Lea o lo o talanoa ai le tusi lenei o Failauga i le mataupu lenei e 3. Le taimi ma le aso ma tausaga i mea uma, ma ona lava po i mea uma lava i lalo o le lagi. Le foafoaga a le Atua na ia faia, ua atoatoa ma lelei. Lea ua faamanuia i ai le Atua, ma faapaia e le Atua, lea e iai ma le tagata. Le foafoaga ma mea uma lava, e faavavau, e tusa ma le finagalo paia o le Atua, na faia ai. Peitai ina ua agasala le tagata, ona faatoa iloa ai lea e le tagata, lona amataga ma lona taunuuga.

Peitai, o lo o silafia e le tagata, e faavavau le foafoaga. Silafia foi e le tagata, e faavavau le Atua. O lona uiga e leai se oti, e leai se faanoanoa, e leai foi se tagi, e leai se leaga, e leai foi se agasala. Ae ua a nei? Lele ua sopoutu le tagata i le Atua. Ua sopo le tai i le eleele. Ua fia Atua le tagata....Ua fia pule le tagata. Ua fia taimi foi e le tagata le pule-aoao a le Atua, atoa ai ma mea uma. Le ala lea o le faaseã o le Failauga i le tagata, E mafua i se a? Aua e le’i iloa e le tagata, o lea sa iai i totonu o le Faavavau o mea uma. Ua galo i le tagata, o lea sa saofai lava i totonu i manuia faavavau, ma le ola Faavavau. O le liliuina so’o la o mea o le foafoaga talu le tagata agasala, lea la e sa’i ai le Failauga, Lea foi pei ona

aumai i le fuaiupu e 4. “O ona po e tagi ai, ma ona po e ataata ai; o ona po e taufaitagitu’i ai, ma ona po e saasaa ai.”

Peitai la i le faataotoga e le tusitala o le mataupu lenei e tolu o Failauga, o lo o tulituliloaina ai pea le faamoemoe ola ma le taunuuga lelei e ao ona toe maua ai le avanoa o le tagata...i le Atua. Le ata vaaia o le Atua e tuu-avanoa ma alofa pea i le tagata e ui ina agasala. Le alofa tunoa o le Atua e leai se tuaoi, e tumau, e lē liliu ae faavavau. E le silasila masei i lana tagata na fai, ae galue ma aapa atu ina ia tata’i mai i le moa o le ala, aumai i le malamalama o le Ola. Afai ua sipa le lamaga i lona va ma le Atua, e feagai ma puapuaga ma faanoanoaga. O tiga ma faigata e fetaiiai pea e luitauina ai, seia oo ina salamo ma fulitua i le leaga,

Ona salamo lea ma toe fuata’i le ola i le ola fou, foi i le Atua ma le loto ua faamaualalo. Faiga na ma ala na o le Atua, e liliuina ai mea uma, ina ia toe maua le sootaga mafanafana o le tagata ma le Atua. Mai le leaga i le lelei, mai le pogisa i le malamalama, mai le faanoanoa i le fiafia, mai le pologa i le saoloto, mai le oti i le ola. Mai ona po e tagi ai, i ona po e ataata ai; Mai ona po e taufaitagitu’i ai, i ona po e siva ai.” Fai mai le manatu o le Failauga, “E matua faatauavaa, e faatauavaa mea uma lava.”

Le uiga o le manatu, E gata loa lau vaai i le lalolagi, ona e tiga loa lea, Ae a mamao ma oo atu lau vaai i le lagi, ona suia loa lea o lou taimi. Se a le uiga? Olea e ola i le taimi o le Atua, taimi o le manuia, taimi o le Faavavau, taimi o le ola fou faatasi ma le Atua. Le faatufugaga poto lena a le Atua, ina ia le fano lana tagata, a ia faaolaina i Lona Alofa tunoa tele.

O le feau lea o le Talalelei mo i tatou le fanau i lenei Aso Sa. Fai mai Paulo – “E sili le taimi e oti ai, i lo le taimi na fanau mai ai.” Le ata lena o le au-kerisiano ÷ o momoe i le Atua.

E le toe taumateina faa-meli afifi le faaolataga a le Atua. Ua mautinoa ua tatou agavaa uma i ai – aua o Iesu lava na fetalai. “O a’u nei le toetu ma le ola; o le faatuatua mai ia te au, e ui ina oti, ae ola lava ia” (Ioane 11:13). Le ola paleni lena o mea uma tatou te maua ai le ola manuia i aso uma ma taimi uma o lo tatou ola. Ia iloa e le tagata , e paleni gasologa uma o le olaga pei ona faia e le Atua. E i ai le taimi e ata ai, e i ai foi le taimi e tagi ai. E tatou te tigaina e galulue ma ola i le amiotonu a le Atua, ae i ai foi le taimi e faasaolotina ai tatou.

GALUEGA FA’ATINO

Fa’aaliga manatu : Faaali mai sou manatu e faatatau i le faaupuga, ‘**paleni mea uma**’ pei ona aumai i le mataupu. I le ma lenei; Ae faapefea pe a le paleni mea uma i le olaga, o a ni mea e tutupu ma alia’e mai?

PESE: 73 E le alofa o Iesu.

A’OA’OGA:

1. E paleni mea uma pe a tumau i le faatuatua i le Atua.
2. Ia ogatotonu le Atua i lou olaga, ona paleni lea o mea uma.
3. Onosa’i i puapuaga ma faigata e maua ai le paleni o mea uma.
4. Taumafai e paleni mea uma I le ola ina ia manuia ai nisi tagata.

.....

ASO SA: 28 SETEMA 2025

MATAUPU : **FAATUATUA – MALAGA I LE MEA E LEILOA**
(Faith – journeys into the unknown)

SINI : Ia malamalama le vasega, o lou malaga ma le faatuatua i le Atua i lenei olaga, e taunuu manuia ai i le mea e te le iloa.

TUSI FAITAU: Kenese 12 : 1 – 3, 10 – 20

FESOASOANI MO FAIA’OGA

O le mataupu mo i tatou i lenei Aso Sa e faapea; **‘Faatuatua – malaga i le mea e leiloa.’**

O le faamoemoe ma le finagalo o le Atua ia Aperamo na poloa’iina ai ina ia tuua o lona nuu, ma tagata o lona nuu ma le aiga o lona tamā, a e alu i se nuu e faasino atu ai ia te ia.

O se poloaiga e faigata ma e le talia gofie e se tasi pe a fua atu i le faasinomaga ma le tupuaga na ola mai ai Aperamo. O se tama ua matua le soifua ma ua iloa ai o se tagata ua lava lona silafia ma lona faatuatua i lona Atua. Peitai, o lea ua faalogo ma le manino Aperamo i mea uma ua fetalai mai ai le Atua e tusa o faamanuiaga na te maua, o ia ma lona aiga. Manino upu o le faamanuiaga a le Atua mo Aperamo; “Ou te faia oe ma nuu tele, ou te faamannuia foi ia te ia, ou te matua faamamaluina lou igoa, e manuia foi oe. Ou te faamanuia atu ia te i latou o e faamanuia ia te oe, ou te faamalaia atu foi ia te i latou o e fetuu ia te oe, e manuia foi ia te oe o aiga uma o le lalolagi. O lea na alu ai loa Aperamo e pei ona poloa’iina ai o ia e lona Atua.

Fai mai ua alu le malaga i Kanana i le mea e i ai Sekema i le aluna o More, ma avea ma o ona nuu, toe malaga ma taunuu i Peteli ma aga atu i le itu i toga, ae o le taimi lea faimai na oge ai lea nuu, o lea na toe o ifo ai loa i Aikupito e nonofo ai. O le tala malie, fai mai ua fai ane Aperamo i lona toalua o Sarai; afai e vaai ane tagata Aikupito ia te ia, ona fai ane lea o lana ava, ona latou fasioti lea ia te ia a e faaolaina ia. Ae fai atu i ai, o ia lona tuafafine ina ia saogalemu ai o ia, e ola ai foi Aperamo. Ua agalelei Farao ma ona tagata ia Sarai ma o lea na foaiina i ai o mamoe, o povi ma asini po'a e oo lava i auauna asini fafine ma kamela. Peitai ua faatigaina e le Atua o Farao ma lona aiga i mala tetele ona o Sarai le ava a Aperamo. Ua salamo Farao i le mea ua tupu na te le'i iloina. O lea na tuuina atu ai loa lea o Aperamo ma lana ava e o ma ave uma mea ua maua.

O le aotelega o le mataupu ma le tala pei ona tatou maua, o faiga ma fuafuaga loloto ma le mamao a le Atua mo Aperamo ma lona aiga ma lona nuu, o ata vaai ia o le Atua e le oo i ai se poto o se tagata. O le Atua alofa ma le Atua e faamaoni ana folafolaga mo lana auauna. Ua silafia ma ua filifilia ai e le Atua Aperamo ma ana auauna, e ala mai ai le manuia o aiga uma ma nuu uma o le lalolagi. O faiga ofoofogia a le Atua e tapena ai le tagata faatauvaa e malaga ai i le mea e leiloa, o se nofoaga e le'i vaai muamua e Aperamo, o ni faamanuiaga e le'i manatu foi Aperamo na te mauaina. A o le tino mai o le faamoemoe o le Atua mo Aperamo ona o le faatuatua o ia i lona Atua na afua ai. O le faalogo ma le usitai o Aperamo i lona Atua na tutupu ai vavega o faamanuiaga na tapena e le Atua, lea ua 'ae'ae ai Aperamo ma lona toalua o Sarai e oo lava i ona aiga ma ona tagata.

Le faamoemoe e le'i iloa e le tagata peitai o lea ua manuia atu foi ma aiga uma o le lalolagi. O le tagata oloo malaga faatasi ma le Atua ma le faatuatua, e pule aoao le Atua i mea uma e oo lava i le tagata na faia e Ia, e ola ai i le lalolagi. O se feau taua lea mo i tatou i lenei Aso Sa le fanau e, e faamanatu ma toe faatepa i ai lo tatou ola ai i aso uma. E i ai le taimi ma le aso e fetalai mai ai le Atua ia te i tatou taitoatasi, i le mea ua finagalo i ai le Atua. afai o mea e le oo i ai so tatou malamalama ma se iloa, ia manatua, ia tatou faalogo lava ma le usitai, e faia e le Atua mea sili ma aumai ana faamanuiaga mo oe ma a'u pe afai tatou te malaga ma faatino lona finagalo i le malosi o lo ta faatuatua ia te ia. Pe afai foi, tatou te lē popole lava pe fefe i faigata ma ni puapuaga e fetaia'i i le ala. O lo tatou ola e le sologa lelei aso uma, e iai taimi e lofia ai i tatou i puapuaga ma faaososoga a le fili ma le tiapolo, a o lē tumau i le faatuatua ma faamoemoe i le Atua i taimi uma, e mautinoa e faia e le Atua mea sili tatou te olioli ma fiafia i ai. Ia manuia tele lenei Aso Sa i le alofa ma le agalelei o le Atua.

GALUEGA FA'ATINO: Taliga-fesili:

1. O le a le faatuatua?
2. O ai e te faalog ma usitaia i ai ma faatuatuaina i lou aiga?
3. O le a sou manatu, na faatuatua foi Sarai i le Atua a o malaga ma Aperamo?
4. O le a le tau'i o le tagata faatuatua i le Atua?
5. O le a le faamoemoe o le galuega faaola na faia e Iesu mo i tatou?

PESE : 122 O outou e fia sao.

A'OA'OGA:

1. O le faatuatua o le ala lena ua aumai e le Atua e te taunuu manuia ai i le mea e te le iloa.
2. O lou faatuatua e te ola ai.
3. 'Aua le masalosalo i folafolaga mai le Atua.
4. Faailoa ma tala'i atu le **Faatuatua moni** i lou aiga ma lou nuu.

.....

ASO SA 5 OKETOPA 2025

MATAUPU: 'AUA LE VAVEVAVE I FAAMASINOGA (*Don't rush to judgement*)

SINI: Ia malamalama le vasega, ina ia 'aua ne'i vavevave ni a latou faaiuga e faamasinoina ai isi tagata, a ia mafaufau muamua, ona iloa tonu lea o le mea e tatau ona fai.

TUSI FAITAU: Galuega 5 : 33 – 39

FESOASOANI MO FAIA'OGA:

O le mataupu ua aumai mo i tatou i lenei Aso Sa e faapea; '**Aua le vavevave i faamasinoga.**' O le upu faamasino e foliga o se suesueina e se tagata o se mataupu i se isi tagata. O le fia iloa ma fia malamalama i le isi tagata i se mea o tupu ai. A o lo o manino foi upu a Iesu e faatatau i le mataupu leni tau faamasinoga e faapea; "Aua e te faamasino atu ina ne'i faamasinoina ai oe" Peitai le tala ua aumai i lenei Aso Sa, o le ata vaaia o ni vaega se tolu o aafia i totonu o le tala e uiga ia Iesu ma lana galuega tala'i sa fai. **Muammua** o i latou na latou vaaia ma leoleoina pagota. **Lua** o i latou o ta'ua o le a'oa'o tulafono

ma le au satukaio na faamasinoina i latou sa mulimuli ia Iesu sa tuua'ia i latou e faapea na i ai i le fasiotia o Iesu; ma lona **tolu**, o Peteru ma le ausoo na tuua'ia i aoaoga ma talaiga sese sa fai ua faamasinoina ai le pule o se tulaga matautia lea i totonu o le sosaiete.

I totonu la o lenei tulaga faigata pei ona tulai mai, na tulai ai loa Kamalielu o le tasi a'oa'o tulafono ma faapea atu, "ia tuu atu le au aposetolo i fafo seia toe itiiti ane" ona faapea atu lea o ia ia te i latou, "Outou Isaraelu e, ia outou ma mea a outou faia i nei tagata" A o lele foi ua toe faamanatu ma tautala atu ma le potu Kamalielu i le 'au saneterini e uiga i taimi ua tuanai na tulai ai Tiuta ma sa fai atu e sili lava o ia; na pipii foi ia te ia o tagata e to'afagalau pe a faitauina na fasiotia o ia, na taapeape foi ma i'uvale i latou uma lava e na 'ana'ana ia te ia; ua faapea foi i le tala ia Iuta o le Kalilaia.

O le ānau atu lea a Kamalielu ia i latou ina ia latou manatunatu i ai e tusa o latou faamasinoga. E maeu le tulai mai o Kamalielu i lea taimi taua o le taumafai lava o le 'au saneterini e faigofie ma maua a latou faaiuga, i le faia o faamasinoga e tua i ai a latou faaiuga fai i tagata; a o le manaia ia o upu a Kamalielu mulimuli ane e faapea, "O lenei ou te fai atu ia te outou faamamao ia ma nei tagata, ma ia tuu pea ia ia te i latou; aua afai ua tupu mai tagata lena sauniga ma lena galuega, e faaumatia ia; a e afai ua tupu mai le Atua, tou te le mafai ona faaumatia; ina ne'i iloa ua outou fai taua i le Atua lava". O le ata o le mea moni ma le amiotonu ua faailoa atu ia i latou, e tusa o la latou fonu. E leai ma se sa'o o a latou faaiuga fai ona e faavae i luga o le le fiafia ma le ita i aoaoga a Iesu. O tulaga le lelei ia e ono toe faamasinoina ai i latou. O lona uiga, e malosi atu le mea moni, i lo se mea malosi ae le moni. o le ala lea e le mafai ai ona vavevave pe faanatinati i faamasinoga aua e le o se mea amiotonu lea i luma o le Atua.

O le feau taua lea mo i tatou le fanau i lenei Aso Sa. E taua le manatunatu ma mafaufau lelei muamua i vaega eseese ma faamoemoega lelei oloo fai ma faatinoina. E le faia se faaiuga i ni auala sese ma le piopio e faavae i luga o le ita ma le faamaualuga o se tagata i sona tulaga ma sona mamalu. O le Atua lava ia e tonu ma faamaoni ana faamasinoga i so o se mea tatou te fai. E faatinoina foi auaunaga ma valaauina e faavae i le finagalo paia o le Atua. Aisea? Aua o le Atua ma le afio mai o lona Alo o Iesu i le lalolagi, o le faailoga o lona alofa tunoa ma lona faamaoni ina ia faaolaina ma ta'ita'iina tagata uma i le malamalama ma le ola.

O lona uiga, 'Aua ne'i o tatou amanaia fua ma popole fua ia i latou o tusitusilima ma faamasino mai i lo tatou talitonuga ma le faatuatuaga i le Atua ma lona finagalo tala'i; o a mea tatou te taumafai e faamasino a e faavae i le loto leaga ma le fia tagata, e mautinoa lava e i'uvale ona taunuuga, ma o faiga na a le tiapolo ma ana 'au.

Tatou faamalolosi ma faamoemoe pea i le Atua, o Ia na te faia mea sili ma faailoa mai e lona lava mana ia i tatou mea tonu uma tatou te fai, mo le tala'iina o le Tala Lelei ma le faasusuluina atu pea o Iesu, le suafa Silisili, e silisili i suafa uma lava, tatou te maua ai le ola, i le ma le ola e faavavau ua ia folafolaina mai..

GALUEGA FA'ATINO:

Fa'aaliga manatu : Fa'aali mai sou manatu e uiga i le fesili lenei:

Aisea e fefaamasinoa'i ai tagata mai lea taimi i lea taimi?

PESE: Pese ma Viiga 82 Avatu i le tupu.

A'O'A'OGA:

1. 'Aua e te faamasino atu, e faamasinoina ai oe.
2. Ia mafaufau muamua i le mea tatau ma talafeagai e ao ona e faia i lou uso a tagata.
3. 'Aua le amanaia le pola e motu i tua, ae galue pea oe mo le viiga o le Atua.
4. O le mea e te fuaina atu, e toe fuaina mai ai ia te oe.

.....

ASO SA: **12 OKETOPA 2025**

MATĀ'UPU: **O SE FELEILOGA'I O TAGATA MA ATUA (A mix of people and God)**

SINI: Ia malamalama le fanau o le feifiloi o talitonuga ma faatuatuaga, e lē o se mea lelei ma e lē o se mea e finagalo ai le Atua.

TUSI FAITAU: 2 Tupu 17: 24 – 34

FESOASOANI MO FAIAOGA:

O le tala na tatou faitauina, na tupu ina ua faatoilaloina le Malo i Matu o Isaraelu e Asuria. Na fa'atafea tagata Isaraelu, ae avatu tagata mai nuu ese e nofoia le eleele na faia lea ina ia 'aua ai ne'i toe maua se maopoopoga, ma taofia ia le nuu mai le fouvale. Ua fa'ata'ape'apeina atu tagata Isaraelu i vaega eseese o

Asuria, ma ua le mafai ai ona toe tuufa'atasia ma toe maopoopo ona tagata. O tagata Isaraelu foi sa totoe i le nuu, sa fa'anonofo ma tagata o nuu eseese, ina ia faigata ai ona toe maua se fa'asinomaga fa'a-Isaraelu moni. O le augatagata fou la lea na feola ma tutupu a'e i le laueleele, sa le toe fa'aigoaina o tagata Isaraelu, a ua fa'aigoa o tagata Samaria. Sa inosia latou e Sa Iuta.

Ua i ai tagata fou ua nofoia Isaraelu; sa latou tapuai i le Atua ae latou te le'i tuulafoaia o latou faiga fa'apaupau. Sa latou tapuai i le Atua tau lava ina ia fa'amalie ai le finagalo o le Atua, ae e le'i moni lo latou gauai atu ia te Ia. Sa latou manatu i le Atua peiseai o se tasi o o latou tupua e maua ai le manuia. O le amio lava lea o lo o fai i ona po nei. E toatele tagata ua fa'apea latou te talitonu i le Atua, ae latou te mumusu e taofi uiga ma talitonuga, e inoino ai le Atua. E le mafai ona avea le Atua ma se tasi o o tatou talitonuga fa'avae. Ina ia tatau ona fa'amuumua le Atua, o lana Afioga Paia foi e foafoaina ma limataitaiina uma ai o tatou amio ma manatu.

Faimai le tala, ua fa'atoilaloina Isaraelu aua ua le toe iloa le Atua moni e toatasi, ma le taua o le mulimuli ia te ia. I le taimi na fa'ato'aina ai e Isaraelu le laueleele, sa poloaina e le Atua le nuu e alo ese mai uiga fa'apaupau e ono ta'ita'ieseina ai latou. Ae ua le mafai e le nuu, ma ua iuvale ai lava. O lenei foi ua fa'aopoopo isi tagata ese i le laueleele, ua saga tupu atili ai pea le aofai o tupua ua tapuai i ai tagata.

O le mea moni, ua le masino le tele ma le anoanoa'i o fa'aosoosoga ma mailei a le fili ua filogia ai le olaga i lenei lalolagi. A ua a'oa'o mai le Tusi Paia i lenei taeao, e ao lava ona tatou tapuvaetasi i lo tatou talitonuga ma lo tatou fa'atuatua i le Atua moni, o le Atua Tolutasi Paia, le Tama, le Alo, ma le Agaga Paia. O le Atua lava lea o lo o manuia ai lo tatou ola, o Ia foi e ou le pule uma lava, ma o Lona finagalo o le ala o le amiotonu lea. Manino i le a'oa'o mai o le tala sa tatou faitauina, e lē mafai ona va'ava'alua lo tatou fa'atuatua. E lē mafai ona tatou talitonu i le Atua, e tumau pea lo tatou ola i amio to'ilalo ma uiga masesei.

Auā foi, o le fa'atuatua i le Atua, o le fa'atuatua lea i le Talalelei e toe fuata'iina ai lou ola. O le Atua e suia le soifuaga o le tagata mai le lē lelei i le lelei. O le mea lea e faigata lava i le tagata, e fa'atuatua atoatoa i le Atua ma ola pea i le tuinanauga o le lalolagi. Auā e lē mafai ona o gatasi mea ia e lua. I le silafaga paia o le Atua, o lou fa'atuatua ia te Ia ma lou toilalo i uiga masesei, o lou agasala lava lea ia te Ia.

A o le mea lea e uiga ese ai lava le Atua, auā e tu'u avanoa mai lava o Ia mo i tatou. E fa'ateletegese lava Lona to'asa, ae tumau pea Lona alofa tulituliloa e na te toe aumaia ai oe i totonu o Lona li'o o tagata fa'atuatua. Pau le mea, ia 'aua ne'i tu'uvalelimaina lena alofa mai le Atua. Auā e lē fa'apea ua tatou iloa lea alofa lea o le Atua ma avea ai ma auala tatou te ta'aalo ai ia te Ia. Ia tumau

pea lo tatou fa'atuatua ma tapuvaetasi ai lo tatou talitonuga i le Atua e ou le mana ma le pule aoao uma lava.

GALUEGA FA'ATINO: Talanoa

O a ni fa'aosoosoga fa'aneionapo e ono aveesea i tatou, ma tosina i tatou e o ese ma le Atua? Ia avea lenei fesili ma ta'iala o se talanoaga ma le fanau, fa'asoa foi i ai po o a ni auala e mafai ai ona fo'ia nei fa'afitauli.

PESE: 74 (Toatasi lē ua sili)

A'OA'OGA:

1. Ua na o le Atua lava e toatasi, e manuia ai lo tatou ola.
2. 'Aua ne'i faigofie ona fa'atosina i tatou i fa'aosoosoga o le lalolagi.
3. Ia tumau pea lo tatou fa'atuatua, ma ia tatou tatalo e fa'amausalī ai lo tatou talitonuga.

.....

ASO SA: 19 OKETOPA 2025

MATĀ'UPU: UA FEUTAGA'I APERAAMO MA LE ATUA
(Abraham bargains with God)

SINI: Ia iloa e le fanau le tāua o le fesili, fesili i matua, fesili i Faifeau, fesili i le Atua ia maua ai le tonu moni mo i latou.

TUSI FAITAU: Kenese 18: 16 – 33

FESOASOANI MO FAIAOGA:

O le fesili faatupu manatu i le amataga o lenei mataupu. Na liua le finagalo o le Atua ona o Aperaamo? Leai, ae na suia le mafaufau o Aperaamo ona o le Atua. Ua iloa e Aperaamo e amiotonu le Atua, e fa'asala i e amio leaga, ae e foliga mai ua tau masalosalo Aperaamo i le alofa mutimutivale (mercy) o le Atua. Sa peiseai foi ua suesue Aperaamo po o le a o'oo'o o le alofa mutimutivale o le Atua. E maea ifo le la talanoaga ma le Atua, a ua malie atoatoa le loto o Aperaamo, i le agalelei o le Atua. O le uiga la lea o le taofi, ua suia le mafaufau o Aperaamo fa'ataua i le Atua, ona o le mutimutialofa a le Atua. E le

faatonutonuina e le tatalo o le tagata le finagalo o le Atua, ae e toe suia lava le loto o le tagata i lona lava tatalo, e pei o la Aperaaamo. O le tatalo foi e fesoasoani mai tatou te malamalama atili ai i le finagalo o le Atua.

Ao le fesili. Aisea ua tu'uavanoa ai le Atua ia Aperaaamo e suesue i lona amiotonu, ma taumafai e fa'asao le aai ua agasala? O le upu moni, na iloa lava e Aperaaamo e tau e le Atua le agasala o tagata; a ua ia iloa foi le alofa mutimutivale o le Atua, ma ua silafia foi e le Atua e le atoa se toasefulu o ni tagata lelei i le aai o Sotoma, a o lona alofa mutimutivale lea na tuu ai Aperaaamo e fa'aleo ona lagona, ma iu ina ia fa'asaoina ai foi Lota.

O le ata lea o le Atua alofa. E tutusa lana amiotonu ma lona alofa mutimutivale; e ao foi ona tatou loto fa'afetai ona o le alofa mutimutivale o le Atua, lea ua fa'asaoina ai tatou.

Faimai le tala, sa toe tuuavanoa le Atua i tagata Sotoma, e vaai pe latou te salamo ma toe foi ia te Ia. E faapena foi ona fa'atalitali le Atua mo i tatou e o' o mai i le taimi nei, ma o lo'o tuuavanoa i e ola ma fa'asaga ia te ia. Lea foi e saafai ai Peteru i lana tusi lona lua (2 Peteru 3.9). "O le tagata atamai e toe liliu i le Atua, manu e le'i muta lona onosai."

O fesili e faalautele ai pea le taua o lenei tala. Na tonu ea le fa'aiuga a le Atua ia Sotoma? Po o lona finagalo ea, ina ia fa'aumatia fa'atasi tagata amiotonu ma e agasala? Leai, ma o pine ia ua iloa ai le alofa mutimutivale o le Atua: 1) Na fa'asao le aai atoa pe ana maua ai ni tagata amiotonu se toasefulu i le aai; 2) Na ia fa'asaoina Lota, ona ua na o le pau lea o le tagata na tau latalata ane sona iloa lelei o le Atua (e ui e le se mafutaga lelei atoatoa foi); 3) Sa tele lona onosai ia Lota, ua toetoe a tuli fa'amalosi ai e le Atua Lota mai le a'ai manu e le'i fa'aumatia.

O le mea lea, ia tatou loto fa'afetai foi ona e le o ū mai ia i tatou le pule faa-fa'amasino a le Atua i le taimi nei, e pei ona sa ia fa'afanoina ai Sotoma.

E lelei lava le fesili i le Atua mo so o se mea lava e moomia. Peitai e tele taimi e tali mai ai le Atua i se auala tatou te le'i manatu ai pe fa'amoemoe i ai, a ua na o le Atua lava e silafia le mea e silisili ona talafeagai ma lelei. Masalo e i ai nisi o o tatou tatalo ua uma ona tali e le Atua, a ua tatou le iloa aua e le'i auala mai i se auala na tatou mafaufauina!

GALUEGA FA'ATINO: Talanoa

O a ni taimi na e fia fesili ai, ae ua e palaai, pe lagona le fefe, ona ua e musu e iloa le tali? Ia fai ma ta'iala le fesili fa'atupu manatu lea i se talanoaga ma le fanau. Fa'asoa i ai, ma fa'aילו e leai se mea e ta'u o se fesili valea.

PESE: 182 "Le Alii e, o au savali"

A’OA’OGA:

1. E tumau pea le alofa tunoa ma le agalelei o le Atua.
2. E lē mafai ona tatou liua le finagalo o le Atua, ae e mafai ona suia i tatou e le Atua.
3. O le tatou talatalanoa ma le Atua e ala i le tatalo, e maua ai le fa’asinoga moni mo i tatou.

.....

ASO SA: 26 OKETOPA 2025

MATĀ’UPU: O SE FAATA’ITA’IGA I TAGATA UMA
(An example to all)

SINI: Ia malamalama le vasega, e mafai foi ona avea i latou ma fa’ata’ita’iga lelei mo isi tagata, a o ai foi ni fa’ata’ita’iga lelei mo i latou.

TUSI FAITAU: Tito 1: 1 – 16

FESOASOANI MO FAIAOGA:

E foliga mai sa fai si malosi o le pepelo o Kereta. Sa manino lava le mau a Paulo mai le amataga, e le pepelo le Atua. O le fa’avae o lo tatou fa’atuatua, o lo tatou talitonuina lea o le natura ma le amio o lo tatou Atua. O le Atua lava ia o le upu moni, o le sosia o le upu moni, e le mafai foi ona ia pepelo. O le talitonu i le Atua, e tupu ai le amio Atua, ma le ava i le Atua (1.1). Tatou te maua le ola e fa’avavau ua folafola mai e le Atua mo tatou, aua e tausii folafolaga lo tatou Atua. Ia fa’avae lo tatou fa’atuatua i luga o le Atua fa’amoemoeina, e le pepelo pe fa’aoleole lava ia.

Sa saunia e Iesu le fa’aolataga e ala i lona maliu mo o tatou agasala, ua avea ai o Ia ma o tatou Fa’aola. O le Atua sa fuafuaina ma tapenaina le galuega o le Fa’aolataga, na te fa’amagaloina foi o tatou agasala. Sa galulue fa’ataisi le Tama ma le Alo ina ia laveaiina tatou mai o tatou agasala.

Sa faimalaga fa’ataisi foi Paulo ma Tito i Ierusalem (Kalatia 2.3) ma Kereta (1.5). Ona tu’ua lea e Paulo Tito i Kereta na te taitaiina ekalesia fou ia ua amata ona fotufotua’i i le motu. Sa ia Tito tomai fa’ataitai, o le ala lea na tuu atu ai e Paulo ia te ia matafaioi fa’ataitai, ma fa’amalosia ia e fa’aaoga fa’alelei ona tomai.

O 'mea ua totoe', e fa'asino lea i le fa'amautuina o a'oa'oga sa'o, ma le tofia o tino matutua mo aai uma o le motu. O le galuega foi lea a Paulo i ekalesia na ia asia i ana faigamalaga. Sa lē mafai ona ia nofo pea i ekalesia nei, ua ia iloa foi e mo'omia e ekalesia le taitaiga mautu. O e na tofia, sa fa'amoemoeina e taitai o latou Ekalesia e ala i le a'oa'oina atu o le talitonuga sa'o ma tonu, ma fa'atuputupu le au fa'atuatua ina ia matutua i la le agaga, ma fa'atamaoigaina latou ina ia ola mo Iesu Keriso, e ui i malosiaga e ono lepetia.

Ua oto'oto e Paulo nisi agavaa moomia e taitai o Ekalesia. E fa'apea foi se lisi o agavaa na tu'u atu e Paulo ia Timoteo mo le Ekalesia i Efeso. O le tele o agavaa e moomia ai le amio lelei, ae le o le potu po o le agavaa. O uiga a le tagata ma ona sootaga ma isi, e atagia ai lona amio. Ia tatou manatunatu i agavaa nei a o tatou iloilo po o ai nisi e ono umia ni tofiga taitai i o tatou Ekalesia. E moomia taitai e agavaa i le tala'iina o le Afioga Paia a le Atua, ae sili atu le moomia o taitai e mafai ona fa'atino le Afioga Paia a le Atua, ma avea ma fa'ataitaiga lelei e mulimuli ai isi tagata.

O se tasi o agavaa taua mo le avea ma taitai, o le alofa i tagata ese (a tu'u foi i la tatou aganuu, e mafai foi ona fa'apea o le tali malo). Ia iloga taitai Kerisiano ona o lo latou alolofa i tagata ese. I ia ona po sa mautinoa le maua o le apitaga ma le meaai mo a'oa'o ma faiaoga femalagai, i fale o tagata Kerisiano. E maua manuia i le tatalaina o o tatou faitotoa mo isi tagata, e o mai tatou te aai ma mafuta fa'atasi – o tagata tafafao mai, o sui o Ekalesia, o tagata talavou, o e moomia le fesojasoani. E taua tele le alofa atu ma le tali malo i le ituaiga soifuaga o aso nei ua tumu i le manatu fa'apito; aua e le masino le toatele o tagata ua afaina ona o le nonofo toatasi, e aunoa ma se isi e mafuta ai (loneliness). E mafai ona fa'atino la tatou molimau e ala i le tali malo. Sa tatau i tagata Kerisiano ona talia tagata uma, pe Kerisiano pe le Kerisiano, sei vagana ai a'oa'o pepelo (2 Ioane 1.10). E finagalo le Atua ina ia tatou lima foai, amio fa'aaloalo, ma tali malo i tagata e le ni Kerisiano, ina ia taitaiina atu nisi ia Keriso, e ala i le mafutaga fealofani ma tatou.

GALUEGA FA'ATINO: Talanoa

O a ni auala e mafai ai ona avea oe ma fa'ata'ita'iga lelei mo lou uso-a-tagata? A o ai foi nisi o lo tatou Ekalesia, aiga ma nuu o fai ma fa'ata'ita'iga lelei i lou olaga? Ia fai ma ta'iala fesili nei auā fa'atalanoaga ma le fanau.

PESE: 176 :Tatou finau atu ia”

A’OA’OGA:

1. Ia ‘aua ne’i inoino se tasi i lou talavou, a ia fai oe ma fa’ata’ita’iga lelei mo lou uso.
2. O Iesu le fa’ata’ita’iga sili, e iloa ai i tatou le ola amiotonu ma le ala e tatau ona savali.
3. Ia alofa i so o se tagata, ma mafuta lelei ma lou uso auā e tāua foi ia i latou lou mafuta atu.

.....

ASO SA: **02 NOVEMA 2025**

MATĀ’UPU: **NAUNAU E SA’ILI LE FILEMU**
(Desperately seeking peace)

SINI: Ia maua e le fanau ni auala e maua ai le nonofo filemu
ma o latou uso-a-tagata

TUSI FAITAU: Esoto 2: 23 – 25

FESOASOANI MO FAIAOGA:

O le moemitiga ma le faanaunauga o so o se tagata soifua lava, ia mafai ona nofo filemu le lalolagi, aua nei toe iai ni taua, aua foi nei toe iai ni fevesiaiga, a ia fealofani malo ma atunuu uma o le lalolagi. Peitai, e le o mafai lava ona taunuu lea faamoemoe, e le o mafai lava ona faatino lea lagona, aua foi, e le tutusa manatu ma lagona o tagata, e eseese faavae ma faiga, e eseese foi tu ma aga i fanua mai lea atunuu i lea atunuu. Ioe, o le mea e lelei i leisi e leaga i le tasi, o faavae o nisi malo e le taua i leisi malo, o le filemu foi o le tasi, o le vevesi lena i leisi. O uiga ia ma faiga o lo o fetosoaina ai faapau tolo a loi manatu ma lagona o tagata, ua le mafai ai ona ola fealofani, ua faapena ai ona faigata, ona maua se filemu aoao.

Na folafola e le Atua, e na te laveai Isaraelu mai i Aikupito. Ua loa tausaga o fa’atalitali tagata mo le laveai a le Atua, ae na o le Atua na silafia le taimi pito talafeagai e fa’ataunuu ai. A o’o ina lagona ua fa’agalo tatou e le Atua, pe ua tuulafoai tatou i o tatou tiga, manatua o le polokalame a le Atua e le iloa e mata o tagata.

Ia pulea o tatou tagata e le filemu o le Atua, ia faapena foi ona nofo afioga a Keriso i totonu ia i tatou, ona faigofie lea o le faatinoga o lana feau ma lana

galuega, aua foi, o le a lima taitaiina lo outou soifua ma lo tatou ola e le agaga o Keriso, le Agaga lea na te lapataina i tatou, e fesoasoani, e fautuaina ma timai ia i tatou, e aoao ma aoai mai, e faatonu foi ma faailoa mai le filemu moni o Keriso.

O le upu moni lava, e le faigofie le soifuaga i lenei vaitau ma lenei foi atunuu, tele faalavelave matuia ua tutupu i le soifua ma le ola, o faafitauli foi ma tootuga e luitauina ai le soifua taumafai ma le ola ofoina atu i le Atua, peitai, a maua e le tagata le filemu o Keriso, o le a faapena ona maua le onosai, e maua le faapalepale, e ola faamagalalo foi, e inu i tiga, e loto maualalo ma agamalu, ae maise ai lava, le alofa i le Atua.

A ia manatua, e le mafai ona filemu le lalolagi, pe afai e le muai faafilemu o tatou loto, Ioe, a mafai ona pulea o tatou tagata, o le a faapena ona faasolo atu le filemu o le Atua i totonu o aiga, alu atu ai i nuu ma alalafaga, faasolo atu ai i le atunuu ma le Ekalesia ma oo atu ai i le lalolagi atoa.

GALUEGA FA'ATINO: Talanoa

Faatalanoa ma faalautele le taua o le mataupu i lenei taeao, i le faatalatalanoa o ni auala taua e mafai ai ona maua le filemu i totonu o tatou aiga, nuu ma ekalesia.

A'OA'OGA:

1. Pulea o tatou loto, ona maua lea o le filemu
2. Tumau le tatalo, ma faatuatua ma le faalagolago i le Atua, ona o tatou maua ai lea o le filemu moni.

.....

ASO SA: 09 NOVEMA 2025

MATAUPU: AUA LE POPOLE (*Do not Worry*)

SINI: Ia malamalama le vasega, ua saunia e le Atua mea uma, e ola ai le tagata

TUSI FAITAU: Mataio 6:25 – 34

FESOASOANI MO FAIAOGA:

O nisi nei o upu o le lauga a Iesu i luga o le mauga, i ana aoaoga o lo o fai i le motu o tagata, ua faai'uina ai le Mataupu lenei e 6, ua Ia faamamafa ai le *ola popole* o le tagata faatuatua itiiti. O le soifuaga lea o le tagata, e popole i le meaai o le aso, o le vai e inu ma ofu e ufiufi ai le tino. O mea ia e sili ona aogā i le ola o le tagata.

A'o lea ua fetalai Iesu, ia outou vaavaai i manu felelei, ua saunia e le Atua, laau eseese ma o latou fua, e ola fiafia ai. E leai ma so latou popole i se mea e tasi, ua na ona felelea'i solo, ma saili ia maua sana meaai, auā o loo tele ma anoanoa'i laau eseese na faia e le Atua i le lalolagi. Ua faapea fo'i i lautalotalo o le vao, e ola lausiusi lava latou, e le galulue, e le milo fo'i i latou. Ae tupu olaola pea i aso uma

Ua na o le lua lava faata'ita'iga ua fetalai i ai Iesu, o manu felelei ma lautalotalo o le vao. Ua faaali manino mai ai e Iesu, le ata o le saunia ma tapenaina lelei e le Atua, o mea lelei uma mo le tagata faatuatua, ina ia ola fiafia ai ae aua le popole fua.

“E le sili ea le ola i mea e ‘ai, ma le tino i le ofu? O se fesili e lu'itau ai pea le tagata, poo fea e tatau ona ave i ai lana faamuamua. Ua fetalai foi Iesu, *“auā o mea ia ua sailia e nuu ese, ua silafia foi e lo outou Tamā o i le lagi, e aogā ia mea uma ia te outou”*.

O le mea ua manino, ia aua lava nei fai ma mafuaaga e popole ma atuatuvaile ai le tagata i ia mea o le soifuaga. Ua uma ona tapenaina e le Atua mea uma mo le tagata. Ia iloa foi e le tagata, e tatau ona galue malosi ina ia maua pea mea e manaomia mo le ola i aso uma

O se faamanatu lea o le Mataupu o lenei taeao, ia aua le popole i meaai, vai ma ofu. Ua faasoa mai lava e le Atua ia mea mo i tatou i aso taitasi. E finagalo foi le Atua, ia tatou vaai atu ia te Ia, ae le o le popole i mea o le a tutupu taeao. Auā ua lelei mea uma ua saunia e le Atua mo tagata uma.

E le finagalo le Atua, ia popole le tagata i mea ua le oo i ai lona malosi. Ae ia tuu tasi le faamoemoe o le tagata i le Atua, e manumalo ai i le tele o mea e tutupu o le olaga. E ala i le tatalo ma ole atu i le Atua, e tusa o mea e manomia e le tagata.

GALUEGA FAATINO: FAAALIGA MANATU

Tuu le avanoa i le vasega, e faasoa mai ai so latou manatu aga'i i le Tusi Faitau ma se mea o lo o popole agai ai i lenei vaitau o le soifuaga i le aoga po o galuega. Fttg- vaai i manu felelei, laau e tōtō, i'a o le sami..

PESE: A i ai Iesu i lou va'a

A'OA'OGA:

1. Ua saunia e le Atua mea lelei mo tagata uma
2. E tali mai le Atua i o tatou mana'o
3. Ia malosi lou faatuatua i le Atua

ASO SA: 16 NOVEMA 2025

MATAUPU: NA FAIA E LE ATUA AURO
(And God created gold)

SINI: Ia malamalama le vasega, o tamaoaiga o i le laueleele ma le foafoaga uma a le Atua, ua Ia faia lava mo le tagata

TUSI FAITAU: Kenese 2:10 – 14

FESOASOANI MO FAIAOGA:

O le auro o se maa tāua e sili lona taugatā i le lalolagi atoa. E i ai lava atunuu ua manuia ma tamaoaiga ona tagata i lea maa tāua, ona e maua i o latou laufanua, o lo o tanu i lalo o le palapala. O se maa tāua e taugatā tele, e eli e tagata mai le eleele ma faatau atu i isi tagata ma maua ai tupe e tele, ma e faaaogaina foi e teuteu ai falesā ma malumalu, aemaise fale o tagata mauoa ma tagata maualuluga o lenei lalolagi.

O lona uiga, e taua tele lenei maa o le auro. E saili e tagata ona e vave maua ai le tamaoaiga e ola ai. E le mafai e se 'ele (dust) ona pipii i le auro. E le mafai foi e le afi, ona mu ai le auro. O se maa e le mafai ona tafi esea lona iila ma lona lanu, e tumau pea e oo i le faavavau. O le ala lea, ua sili ona taua ai le auro i lenei lalolagi.

I le tatou Tusi Faitau, i le fuaiupu 12, e lelei foi auro o lea nuu. Ua manino mai lava i lea fuaiupu, sa faia lava e le Atua nei mea uma i le amataga o le foafoaga. O lo o i ai faatasi ma isi maa taua e pei o siliva ma ario, taimane ma isi maa o lo o i ai. Molimau le perofeta o Hakai 2:8, **“O lo o ia te a’u le ario, o loo ia te a’u foi le auro, ua fetalai mai le Alii o ‘au”**.

Molimau le au suesue o le Tusi Paia, sa faaaoga e tagata Eperu le auro i aso ua mavae, e fai ma tupe e fai ai fefaataua’iga i mea e mana’omia e tagata. Ina ua tele le malamalama o tagata, ua gaosia ma faaaogaina ai loa le tupe, e sui ai le auro

E leai lava se isi maa tāua i lenei lalolagi e tutusa ma le auro. Ona o lona tino mai, ai o le ala lea, ua sili ai lava lona tāua ma taugata ai. O se tasi nei o meaalofa foai fua mai e le Atua mo le lalolagi. O le ata o le i ai o le tamaoaiga, malosi ma le aogā i mea uma na faia e le Atua mo le tagata.

I se vaaiga faa tagata lotu, o le auro, ua fai ma faatusa o le i ai o le alofa tunoa o le Atua i le lalolagi, ua avea ai o se meaalofa e maua fua e le tagata ua saili ma faatuatua i le Atua. E ala mai ia Iesu Keriso, na faasatauroina, maliu ae na toe soifua manumalo mai le oti. Ua atoa ai le faaolataga auro mo tagata uma.

GALUEGA FAATINO: Tali Fesili

Tali fesili nei

1. O le a sou manatu, e faafefea ona i ai auro i le lalolagi
Tali: Na faia e le Atua i le amataga
2. E tāua le auro, ae o le a se mea e sili atu lona aogā i lo le auro?
Tali: O le poto, faamaoni, faalogo ma usitai
3. E i ai sau filifili/tau-taliga auro? E te fiafia i ai? Aisea?
4. O fea la e sili ia te oe?

PESE: Pese ma Viiga 8- E lelei o mea uma

A’OA’OGA:

1. Na faia e le Atua mea uma
2. E tāua atu le Tusi Paia nai lo auro
3. E aoga le auro i le tagata

.....

ASO SA: 23 NOVEMA 2025

MATAUPU: POTO: O LE FILIFILIGA SILI – TĀUA ATU NAI LŌ LE AURO (*Wisdom: a better choice-better than gold*)

SINI: Ia malamalama le vasega, o le filifili ma le poto e tāua atu nai lo le auro, auā e maua ai mea tonu mai le Atua

TUSI FAITAU: Faataoto 8: 1 – 21

FESOASOANI MO FAIAOGA:

O le mata’u i le Atua, o le amataga lea o le poto. O le mata’u i le Alii, o le ‘inoino lea i le leaga; o le faamaualuga, ma le loto fefete, ma le amio leaga, ma le gutu faapiopio, ou te ‘ino’ino i ai.

O le auala manino lea e maua ai e le tagata le poto mai le Atua. O le poto e o faatasi ma le faautauta. E inoino le poto i mea leaga. E fa lava mea tetele o loo aumai e le Tusi Faitau, o le faamaualuga, loto fefete, amio leaga ma le pepelo. Ia tatou saili muamua le poto, auā e sili atu le poto nai lo le auro ma siliva. E sili atu foi lona tautele nai lo penina ma mea faafiafia o le nei lalolagi. E le mafai foi ona faatusaina i isi mea uma e te mana’o i ai. A e maua le poto, ua e maua ai le tele o faamanuiaga mai le Atua mo oe.

Ae o le faautauta e tatau lava ona o faatasi ma le poto. Auā a leai se faautauta, ua le aogā le poto o loo ia te oe. O le faautauta, na te aumaia le isi filifiliga lelei ma sa’o, e fesoasoani ia te oe. Ua faapei ai o se fautua mo oe, a’o e i ai i taimi uma o le ola

E le maua e tagata uma le poto, ae ua tutusa tagata uma i le alofa ma le finagalo o le Atua. O le ala lea o le faamamafa mai o le Mataupu i lenei aso. E mo tagata uma, ina ia iloa le mea e tatau ona fai. O le poto, e sili lona taua nai lo le auro O le upu foi a le Tusi, o le poto i lalo nei, o le vale lea i lugā. O lona uiga, ia tatou faamuamua lava le Atua i soo se mea, e manuia ai mea uma tatou te faia.

Ia tatou faitau i le Tusi Paia, ma tatalo i le Atua, e faatasi mai ia te oe, e iu manuia ai lo tatou taumafai

Amuia le tagata ua ia maua le poto mai le Atua, o lona lea fesoasoani mai le Atua. Ae aua nei galo le faautauta ma le alofa atu, auā e faatumuina e le Atua o latou fale teuoloa, i oloa o le tino ae ua sili ai meaalofa o le agaga, i le tagata ua maua le poto e ola i le finagalo o le Atua

GALUEGA FAATINO: Faasoia mai

Tuu le avanoa i le vasega, e fa'aali mai so latou manatu, poo fea e sili, auro poo le poto? Auro po o le Tusi Paia? Auro poo le alofa?

PESE: O le poto e tāua

A'OA'OGA:

1. Ia maua le poto ma le faautauta
2. Ia faalagolago i le Atua mo filifiliga fai
3. Ia filifili i mea lelei ae le o mea pepelo

ASO SA: 30 NOVEMA 2025

MATAUPU: **TAIMI MO LE FILIFILIGA A MARIA** (*Decision time for Mary*)

SINI: Ia malamalama le vasega, na usitai Maria ma lona loto atoa i le finagalo o le Atua

TUSI FAITAU: Luka 1:26 – 38

FESOASOANI MO FAIAOGA:

O lea ua tatou taunuu mai le siui o lenei tausaga, ua lata mai le taimi o faiga-meaalofa ma mafutaga i totonu o aiga ma Ekalesia. Ae o le taimi foi o filifiliga e tatau mo le tagata lava ia.

I le tatou Tusi Faitau o lenei taeao, o lo o amata mai le tala ia Sakaria ma Elisapeta, matua o Ioane le Papatiso. O le ono o masina o Elisapeta, ae fa'aali

foi le agelu a le Atua o Kaperielu ia Maria, i se tala fou, ua atuatuva le ma popole ai Maria. O le a to ia, ma fanauina se tama tane, e te faaigoa ia te ia o Iesu.

E ui i le fefe o Maria ona o lenei mea ofoofogia o le a tupu, ae na ia toe tali lava i le agelu; *“Faauta, o a’u nei o le auaua a le Alii, ia faia ia te a’u e tusa o lau fetalaiga”*. Ua manino mai ai, le talia lelei e Maria o le feau a le agelu, ma ua mau ai lana filifiliga, ia faia pea le finagalo o le Atua, ae ’aua le faia lona loto

O i tonu lea ua pei ua sili ai ona tāua ai Maria, nai lo teine uma o le lalolagi, ona o ia ua ala mai ai le faaola mo le lalolagi uma. Ai o le mafuaaga lea na ia pese fiafia ai, ina ua alu e asiasi ia Elisapeta le tina o Ioane

Ai foi o le ala lea e faatāua ai e le Lotu Pope, Maria le tina paia, ona o ia lea na ala mai ai Iesu le Faaola o le lalolagi, o le Alo foi o le Atua.

GALUEGA FAATINO: TALI FESILI

Tali mai Fesili nei

1. Na faapefea ona iloa e Maria, o le a to o ia?

Tali: Na fa’aali i ai le agelu o Kaperielu

2. O ai na ia faaigoaina le pepe a Maria?

Tali: O le Atua

3. O le a sou iloa, o ai e sili ona tāua, Maria po o Iesu?

Tali: O Maria- o le tinā o Iesu

Iesu- o le faaola o le lalolagi/Alo o le Atua

PESE: Pese a Maria- Vivii lou loto i le Alii

A’OA’OGA:

1. Ia talia le musumusu mai o le Agaga o le Atua

2. Ia filifili faatasi ma le Atua

3. E pule aoao le Atua i mea uma

.....

ASO SA:

7 TESEMA 2025

MATAUPU:

O A'U NEI O LE MALAMALAMA O LE LALOLAGI (*I am the light of the world*)

SINI:

Ia malamalama le vasega, o le a'u, ma le malamalama o lo o talanoa ai le manatu autu, o Iesu Keriso lava ;ea. O Ia o le malamalama e ola ai meauma.

TUSI FAITAU:

Ioane 8:12 – 30

FESOASOANI MO FAIAOGA:

O le manatu autu o lenei taeao, i le molimau a Ioane 8:12 lea na fetalai ai Iesu, “O a'u nei o le malamalama o le lalolagi, o lē mulimuli mai iā te a'u, e lē savali o ia i le pōuliuli, a e ia te ia le malamalama o le ola. .” O lenei tautinoga, o se faatusa loloto e talatala ai le taua ma le iloa lelei, o le faamatalaina o le malamalama o ala i le manuia, ma le pogisa o ala o le malaia, e pei ona faamauina i le Tusi Paia atoa.

I le anofale lava ia o lenei tala, o i o lo o a'oa'o atu ai Iesu i totonu o le malumalu i le taimi o le Tausamiga i Fale Apitaga (po o Sunako), o se tausamiga faa-Iutaia lea e tutuina ai moligao lapopoa, e faamanatu ai le afi faaniutu lea na taitaiina atu ai le fanauga a Isaraelu i le toafa, e pei ona faamauina i le tusi a (Esoto. 13:21).

Ma ua fa'aaogaina ai le vaaiga e fai ma ala e faailoa ai e Iesu le taua o lea malamalama i le savaliga faa-le-faatuatua. Ma faatusa ai lea malamalama ia te Ia lava. Ae o le a le malamalama ma lona uiga, ma lona taua i le manatu o Iesu?

I le upu “malamalama”, pe a faamatalaina, e masani ona faatusa i le poto, lelei, amio lelei, ia ma le faatasi mai o le Atua. Fai mai Iesu, o Ia o le na te faaalua le upumoni a le Atua ma aumaia le malamalama faaleagaga i tagata.

Pe faapea foi, o le malamalama, o le ta'ita'iga e ta'ita'i ai le tagata i le faaolataga, ma fesoasoani e taofia ai le tautevateva o le tagata i le faiga pogisa a le fili ma le tiapolo. Le pogisa lea o loo faatusaina ai le valea, agasala, ma le vavaeeseina mai le Atua.

O lona uiga, o i latou o e mulimuli ia te Ia, o le a le savavali i le pogisa. O le ata manino o le ola saoloto o Ona so'o, ma tagata faatuatua uma ia te Ia, mai le tauaso faaleagaga lea e faamatalaina ai le agasala ma le oti.

Ae o lea se tali atu a le 'au Faresaio? (Ioane 8:13-30)

I fuaiupu 13–30, na luita ai e le au Faresaio le pule a Iesu, ma fesiligia ai le moni o Lana molimau. E tusa ai ma tulafono a Iutaia, so o se itu tagi lava, e masani ona mana'omia ni molimau se to'atele e fa'amaonia ai le mau. Ae faimai Iesu, na auina mai o Ia e le Tamā ma e moni Lana faamasinoga, ma o le finagalo lava lea o le Atua.

Ua faamamafa mai foi e Iesu o i latou e le iloaina o Ia, e tauaso faaleagaga ma latou te le iloa le Atua. A le talitonu ia te Ia, e oti i latou ia latou agasala (f.24). O lona uiga, a le talia ma savali i ala o le malamalama e pei ona finagalo i ai Iesu, e oti lava i tatou.

O le upu moni, o le afi faaniutu na i ona po na ta'ita'i ai le folauga a Isaraelu, a o le taimi nei, o Iesu o le malamalama lava Ia, e na te aumaia le manino ma le lelei i le tagata, e faaaliga ai ala o le Atua mo le ola e faavavau.

I le aotelega, fetalai Iesu, “O a'u nei o le malamalama o le lalolagi,” o se tautinoga e faailoa ai, o Lona lea valaauina, ina ia faailoa le upumoni, i le faaolataga, ma faaaliga faa-le-lagi i tagata. O Ia foi, e tafiesea ai le pogisa, o le valea ma le agasala, ina ia taitaiina ai tagata uma i le saolotoga e ola ai, ma tu ma aga faaleagaga e ogatusa ai ma le finagalo o le Atua, ma maua ai le manuia.

GALUEGA FAATINO: Faatalatalanoaga

Saunia ma tapena lelei e lau susuga i le faiaoga ni fesili e faatatau i le mataupu o lenei Aso Sa, ina ia faalatele ai le malamalama o fanau i le uiga moni o fetalaiga a le Alii Faaola e pei ona faa-autuina ai le mataupu o lenei Aso Sa. Ma fesiligia ai ni aoaoga taua ua maua mai i lea mataupu matagofie.

PESE: Pese 363 (Pese ma Viiga)

A'OA'OGA:

1. O Iesu o le malamalama Ia o mea uma
2. Ia savavali i ala o le malamalama, ae le'o ala o le pogisa e fano ai

3. Amio lelei, ma alofa faamaoni i le Atua.

.....

ASO SA: 14 TESEMA 2025

MATAUPU: FOUVALEGA (*Conspiracy*)

SINI: Ia malamalama le vasega, e tapena e le Atua manuia mai totonu o mea leaga e mafaufau i ai le tagata.

TUSI FAITAU: Isaia 8:11 – 15

FESOASOANI MO FAIAOGA

O le upu fouvalega e pei ona tau faamatalatala ai le manatu autu o lenei Aso Sa, e tai uiga tutusa ma le upu taupulepulega. O le gagana matau'a ma le fia malosi. O lona uiga o se faatinoga e le lelei.

E le o manino mai i tusitusiga, ae o loo i ai elemeni e fesootai ma le fouvale, o le le malamalama, ma le tetee: o ata ia e mafai ona atagia ai le uiga o le fouvalega, po o le taupulepulega.

O le Isaia 53 o se vaega e masani ona ta'ua o le "Auauna Mafatia" (Isaia 52:13 i le 53:12). O lenei vaega o se faamatalaga faavaloaga o se auuuna e mafatia, puapuagatia, ma iu ai lava ina fai ma togiola e totonu ai se sala ua matuia. I le vaai faa-Kerisiano i lenei fuaitau o se valoaga e faatatau ia Iesu Keriso, e ala i lona soifua atoa na oo lava i le oti ma le tuugamau ae na toetu manumalo. I vaaliga faa-Iutaia, o le "auuuna mafatia" e mafai ona faatusaina ai se Isaraelu le amiotonu.

O lona uiga pe a faamatalaina le Isaia lenei e 53. E lua a manatu taua o lo o mamalu ai le vaega lenei o le tusi a Isaia.

1. **O le Togiola natia:** O lona uiga pe a faamatalaina, o le Isaia 53 o loo fa'aali mai ai se fuafuaga sa lei malamalama i ai le lautele pe taliaina i lona taimi. E mafai ona faauigaina lenei mea o se faamoemoe sa "natia" ae o fuafuaga lava ua maea tapena e le Atua. E ui e le o se taupulepulega e ta'ita'ia e le tagata, ae o lona uiga o se vaaliga, fa'ale-Atua na fa'aseseina e le to'atele.

2. **Tete’e i le Mesia:** Afai e faitauina i le gagana suesue o le faaliliuga faa-Kerisiano, o le faasatauroga o Iesu na aofia ai se taupulepulega leaga a taitai o le lotu ma faiga faapolotiki. (e pei ona vaaia i Evagelia) o e na taupulepule, ma fouvale e faasaga ia te Ia. Na latou tuua’ia pepelo ma tuuina atu o Ia ina ia fasiotia. O lona uiga, O le Isaia 53 e fa’aalia ai leni ituaiga gaioiga fa’atasi e faasaga i le auuana amiotonu.

I le aotelega la o mafaufauga o le mataupu i leni taeao, o le manatu i se taupulepulega leaga, po o se fouvalega e pei ona masani ona tatou malamalama ai (o se fuafuaga faalilolilo a se vaega e faia se mea e le tusa ai ma le tulafono pe afaina ai). Ae ui i lea, e mafai ona iloa le fouvalega i manatu ma lagona o tagata i le le malamalama, o le ola tete’e ma teena ai le taua o le auuana mafatia ma puapuagatia, ae o loo tauaveina agasala, ma iu i le manumalo e ala i le amiotonu. O manatu fouvale lava ia, e pei ona le talia ai le Mesia puapuagatia, ao le togiola sa natia i fuafuaga alualu mamao a le Atua, e ala ia Iesu. Ae o le mea ia mautinoa, e teena i manatu le malamalama faa-le-tagata, ae o lo tatou ala lena i malo, ma le manuia i le ola e faavavau.

GALUEGA FAATINO: Tusiga Solo

Tusi mai sau solo i le autu o le mataupu i leni taeao. “FOUVALEGA” Faamolemole tapena ane ni A4 mo tusiga solo a le fanau.

PESE: Le fale o Manu na fanau mai ai

A’OA’OGA:

1. E faigata le ola auuana, mulimuli ane, faaeaina i manuia
2. O le Atua Pule Aoao.

ASOSA 21 TESEMA 2025

MATAUPU: TULAI IA, INA MALAMALAMA IA! O LE A TE’A ATU LE POGISA (*Arise, Shine! The night is nearly over*)

SINI: Ia malamalama le vasega, ua tatau ona tula'i ia, ma faasusulu atu le malamalama o le ola, aua ua liua e le Atua mea sa faapogisaina ai i ona manuia.

TUSI FAITAU: Isaia 60:1 – 6

FESOASOANI MO FAIAOGA:

O le Isaia 60 o se vaega o le lautele i le tala i le tusi a Isaia, i le lumanai o Isaraelu. Ua folafola mai ai se taimi o le a susulu mai ai le malamalama o le Atua i luga o Ona tagata, e tafieseai ai le pogisa ma aumaia ai le manuia, aloaia, ma faamanuiaga faa-le-lagi. O le faatusa o le malamalama ma le pogisa i nei fuaiupu o lo o i ai se uiga faafaatusa loloto, e masani ona fesootai ma le faamoemoe, faa-faaaliga, ma le mamalu o le Atua.

O le po ua faatusaina i se vaitaimi o mafatiaga, faigata, po o le pogisa faaleagaga. O le poloa'iga ia “Tula'i ia, ia susulu atu” ua faailoa mai ai ua i'u lenei vaitaimi faigata, ma ua tafa mai ata fou. O lona uiga, o lea ua oo mai le malamalama o le Atua. Ae e iloa faapefea? Faimai le tala e iloa lona mea, i le tosina atu o tupu i lenei malamalama ma le mamalu. Ma ua faaaliga ai foi i le sasa'a mai o le tamaoaga, ma tagata omai i Siona, ma aumai meaalofo ma viiga: e fa'a'iloa mai ai ua fa'ai'u lenei vaitau faigata, ua fotu malamalama o manuia.

O lona uiga, o le oo mai o le malamalama o le Atua ua faailoa mai ai ua latalata mai Lana faaolataga, o Lana laveaiga, ma ana faamanuiaga mo Isaraelu. Pe faapea foi, ua to i tua taimi o le faavauvau ma le sauaina, a ua suia i tafa o ataata o le mamalu o le Atua.

O lenei fuaitau o lo o aumaia ai le faamoemoe ma le faafouga mo Siona, ua fautua mai ai ina ua mavae ni vaitaimi umi o tofotofoga po o le faaunuuaina, ua toe fuataina ma faacaina tagata o le Atua. O le malamalama o le Atua na te tafieseai le pogisa na ufitia ai le lalolagi ma aumaia ai le olioli, manuia, ma se mafutaga faafouina ma Ia.

O le malamalama o le faatusa lea o le afioaga vaai o le Atua. Pe a oo ina oo mai le mamalu o le Atua i Ona tagata, e faailoa mai ai ua latalata mai o Ia, e aumaia le finagalo malie ma le faataunuuina o Ana folafolaga. O le valaaulia ina ia susulu atu ua atagia mai ai o Ona tagata ua avea nei ma ipu o Lona malamalama, ua faamoemoe e faasusulu atu ai i atunuu.

E mafai fo'i ona iloa le Isaia 60:1-6 o se valoaga e faatatau i le Mesia, o loo faatalitalia le oo mai o se taimi i le lumana'i o le a aumaia ai e le faaolataga a le Atua e ala i le Mesia le malamalama e lē na o Isaraelu ae i atunuu uma. E feso'ota'i lenei mea i talitonuga fa'aKerisiano lea o lo'o va'aia ai Iesu Keriso o le "malamalama o le lalolagi" (Ioane 8:12) na te aumaia le malamalama faaleagaga ma le faaolataga.

I le aotelega o mafaufauga, o loo aofia ai le folafolaga o le lavea'iina mai le pogisa ma le tafa o ata o se vaitaimi fou ua faatumulia i le faatasi mai o le mamalu o le Atua. E avea o se valaau mo le faamoemoe, ma le sauni e talia faamanuiaga e oo mai i le faamalamalamaina e le malamalama o le Atua o ona ala mo i tatou. O le fuaitau foi o lo'o i le Isaia 60:1-6 o se faamanatu o le mana o le Atua, e liua ai taimi o tofotofoga i taimi o le olioli ma le manuia.

GALUEGA FAATINO: Faatalatalanoaga

E taua le faatalatalanoa, ma tatala le mataupu i tulaga o suiga o le soifuaga ua i ai le lalolagi i ona po nei, ma mea o tutupu ai. Ina ia mafai ona malamalama atili ai tamaiti i le Silisiliese o le Atua. Ma lona matautia e mafai ai ona liua mea faigata o le ola, e fai ma ata o faamanuiaga mo le soifua ma ola o le tagata faatuatua i le Atua. O a ni faaitaiga o ni mea ua tutupu i nei aso?

PESE: Le po paia

A'OA'OGA:

1. E liua e le Atua le pogisa i le malamalama o manuia
2. Aua le faavaivai, ae finau ma taumafai, tulai ma tauivi, faamoemoe i le Atua tatou te maua ai manuia.

.....

ASOSA: 28 TESEMA 2025

MATAUPU: SOLA'AGA IA SAOGALEMU
(Flight to safety)

SINI: Ia malamalama le vasega, o le solaaga ia saogalemu, o mea uma na faia e le Atua, ina ia o tatou maua ai manuia, e ala i le faaolataga mo le ola e faavavau.

TUSI FAITAU: Mataio 2:16 – 18

FESOASOANI MO FAIAOGA:

I le vaega lenei o le Evagelia a Mataio, na faatonuina ai e le Tupu o Herota, le faamata'u mai o le tala i le fanau mai o Iesu, le "Tupu o Iutaia" na valoia mai, ina ia fasiotia o tama tane uma i Peteleema ma ona vaipanoa uma, lua tausaga le matutua, ma lalo ifo. O lenei faiga sauā o le taumafaiga lea a Herota e aveesea so o se tasi e ono tauva i lona nofoālii.

Faimai le tala, a o lei tupu le fasiotigā tagata, na fa'aali mai le agelu a le Alii ia Iosefa i le miti ma fai atu ia te ia, e ave Maria ma le pepe o Iesu ma sosola i Aikupito mo le saogalemu (Mataio 2:13–15). I le ma le faamoemoe, ina ia mautinoa ai le faasaoina o Iesu. Pe faapea foi, o le solaaga i Aikupito e avea o se faatinoga o le puipuiga, ma le taitaiga a le Agaga, e faamatilatila ai fuafuaga a le Atua mo le faaolataga e ala ia Iesu, e le mafai ona taofia i ala sese ma togafiti faa-le-tagata.

E mafai foi ona faapea, o le solaaga i Aikupito, o le saunia lava lea e le Atua o se lafitaga pea oo i taimi o puapuaga. E atagia ai foi le manatu faapea, a mulimuli i fuafuaga a le Atua, tusa lava pe faamata'u mai mea faigata o le ola, ma le fili ma ana au, e mautinoa lava, o loo i ai pea le taitaiga mana a le Atua.

O le solaaga foi lea ua fai ma sui o le malamalama tumau o le faamoemoe mo le faaolataga, e manumalo i le fasiotiga a Herota o lo o aofia ai le pogisa o le pule sauā, ma le fefe. Ma o lo o faamatilatila mai e le tala faapea e ui -e foliga mai e manumalo le leaga mo sina taimi, ae manumalo lava le finagalo o le Atua.

I le aotelega o mafaufauga, o le "Sola'aga ia saogalemu" e pei ona fa'aalia i le Mataio 2:16-18 ua fa'aalia ai sa faamata'uina le soifua o Iesu mai lava i le amataga, ae o le fuafuaga a le Atua mo le ola o le Mesia ma le misiona mo le faaolataga o le lalolagi uma. O lona uiga, o le solaaga, e avea o se molimau i le puipuiga faaleagaga, i le faataunuaina o perofetaga, ma o le fuafuaga a le Atua, e tapena ai manuia mo le lalolagi uma i le ola e faavavau. O le fanau mai o Iesu, o le manuia lena ua ia'i tatou.

GALUEGA FAATINO: Faatalatalanoaga

Ia fesiligia le fanau e uiga i le tala o lenei taeao, i so latou faasoa, ma so latou malamalamaaga e uiga i mea ua faia e le Atua, ma auala na tapena e le Atua na

oo mai ai le manuia i le lalolagi atoa, e pei ona fanau mai ai Iesu Keriso ua o tatou faamanatuina i leni kerisimasi.

PESE: Ia manuia le Kerisimasi

A’OA’OGA:

1. E tapena e le Atua lo tatou lumani manuia
2. E le tau masina le iloa o le tagata ma le finagalo o le Atua
3. E tafiese e le malamalama mea leaga a le pogisa.

Manuia le Kerisimasi ma le Tausaga Fou